

萬有文庫

第一集一千種

王雲五主編

清詩別裁

(四)

沈德潛選



商務印書館發行

萬有文庫

第一集一千種

總編纂者

王雲五

商務印書館發行

上海圖書館藏書




A541 212 0004 0702B

清詩別裁

(四)

沈德潛選



國學基本叢書

沈詩別裁

卷二十六

沈用濟

字方舟浙江錢塘人國子生著有方舟集○方舟足跡半天下至廣南與風翁山梁藥亭定詩乃大進遊邊塞留右北平久詩皆燕趙聲一時名流幾莫與抗行然所成詩一句一字實之同人

燕山

我行經燕山憑弔古戰場當時銳頭兒誓死事戎行功業未得成金鏃遺山岡
阜鵬如車輪飛來立人旁黃雲蔽四野風沙浩茫茫驅馬行出關悲歌慨以慷身著短後衣劍佩百鍊鋼
扼吭度飛狐仰面看天狼生當爲冠軍死當爲國殤慨當以慷阜鵬十字讀者如置身邊塞間

妾受命辭

妾受命兮少孤師氏教以詩書阿母愛予早有家託君子以賤軀解一
乘華軒兮歸德門曳綺縠兮羅金尊上事公姥兮無間言俯蓄五子兮今有孫解二
何以奉君朝餐銅盤或皎或燔何以奉君禦寒裁縫越布吳紈解三
鼠穿墉兮狼入室唇乾口燥兮不可與說無褐無衣兮迫冬日解四
晨雞吟喔天雨霜明星煌煌出洞房爲君秣馬遊四方解五
丈夫氣磊落朗如日照臨渴莫飲盜泉水倦莫憩惡木陰解六
出門常言遠在家常

苦貧。女子當門戶。百難萃其身。七解思我君子兮。蔚爲國華。富貴勿喜兮。貧賤勿嗟。履仁服德兮。名乃紛葩。八解○此代其配朱夫人立言也。先言奉公姥。撫諸雛。次言持門戶。次言遭家難。次言送遠人。未勉以修德行。得雄雉不忤不求。何用不臧之意。立意音節。在東西二京之間。

黃河大風行

黃河之水自天落。我舟來向黃河泊。遙看雲氣如飛龍。知有東南大風作。大風一起天茫茫。排山倒海不可當。浪花捲起高十丈。虛擬沉牛截狂象。危檣大扁撼不停。霎時飄散同流星。高岸倒震鼙鼓裂。怒濤亂捲較涎腥。暝來打篷聲。臍膊半爲雨。點半冰雹。夕陽欲下風更狂。吹落孤帆天一角。一舟重有萬鈞力。颺入泥沙脫不得。一舟觸石摧鵠尾。窺見青天在艙底。水面一舟飛鳥輕。無枝可棲心目驚。其餘溜急難鼓柁。客船十個碎兩個。同泊尙餘四五船。船船相觸繩相聯。長年當風立至曉。我輩安得高枕眠。近見青齊成水府。況聞中州少安堵。皇天降災良有因。汝曹定觸河神怒。不爾風濤何太苦。男兒勿恃膽氣粗。要知蹈險非良圖。新河安穩路徑直。汝何不趨趨畏途。豈惟黃河爲畏途。波瀾平地無時無。詩亦有雲垂海立之勢。近七子中李

獻吉結意忽然
換境感觸者深

大同道中

千嶺朝陰嶽。三城控大同。雲形隨列嶂。山響應瑠弓。馬踏黃河雪。鷹呼白草風。飛狐那用塞。天險古來通。一路邊塞之詩。俱沉雄峭拔。不在李北地下。○沙乾奔渴馬。風急下飢鷹。亦邊塞中詩。附錄於此。

太行山

山作潼關險，艱哉勢獨雄。千盤拔河內，一折走遼東。大壑雲雷伏，陰崖日月通。巍巍天下脊，元氣結鴻濛。

登八達嶺

策馬出居庸，盤迴上碧峰。坐窺京邑盡，行繞塞垣重。夕照沉千帳，寒聲折萬松。回瞻陵寢地，雲氣總成龍。

行經將軍猛虎諸灘

高高灘十丈，直下響成雷。舟擲波心去，人穿石窟來。虹蜺雙瀑挂，菡萏小峰開。濁酒酌三老，傾危仗汝才。

擲字穿字千捶百鍊而得。

潼關二首

重關踞天險，三輔重神京。繡嶺遙尊嶽，黃河曲抱城。一夫今保障，羣盜昔縱橫。星隕何年事，徒傷父老情。

自注謂孫督師傳庭。

窺關如在井，立馬一峰高。竟失山河險，徒誇汗血勞。沙蟲迷白日，陵谷徙洪濤。翻使黃巾笑，橫行遇汝曹。

黃巾笑謂不能力戰，疊進降表諸人也。孫督師周寧武外有一人忠勇者乎。

登建陵

鼓櫂辭西粵，開帆趁北風。水聲飛弩下，山勢鬪雞雄。雨歇秦關外，秋深蜀道中。稻粱謀故拙，吾愧信天翁。

前所鍊在虛擲字穿字是也。此所鍊在寔飛弩鬪雞是也。

昭平道中

灘勢奔騰下舟行次第高。瀑流爭一石。人力盡千篙。壁峭奔雷雨。林深聚羽毛。江鄉歸未得。夢寐亦風濤。
此所鍊詩眼。又在爭字盡字。加捶鍊功。則無草率之患。

從彭蠡轉九江泊小孤山下

不信滔滔者。洪荒直至今。高帆轉湖口。片石奠江心。鷹匝亭臺迥。龍蟠窟宅深。迎神歌一曲。絃響下青禽。

花田

埋玉傳南漢。花田今尚存。雪中香不散。煙外月無痕。芳草尋詩路。青旗賣酒村。漫將蝴蝶數。一一美人魂。
前一路詩皆英雄氣。此首又兒女情。見英雄兒女。原不必分也。雪中謂花開如雪。非真指雪言。

登泰山絕頂

丹梯飛磴接天門。杖底風雷萬壑奔。四嶽共推青帝長。一峯還占丈人尊。漢家雲氣封中出。秦代松陰石上存。俯仰不知天下小。蓬萊宮闕射朝暉。
無懈字。無浮詞。勝于鱗元美作。○方舟詩。雖切磴於藥亭。然古體或遜藥亭。五七言律。遠過之也。近人用耳不用目。誰能信之。

望西嶽

五千仞削勢崔巍。西鎮坤維玉作臺。海日夜從金掌出。蓮花春向石盆開。宮臨白帝三峯立。城繞黃河九

折來欲跨茅龍問酒母。芝田堪種乏仙才。精神滿腹亦勝元美作。先與之騎龍上華山亦成仙呼爲酒母。見列仙傳。

湘江道中

越客歸舟向洞庭。心隨一鴈入空冥。烟開沅水雙流合。帆轉衡山九面青。魂返江楓哀楚些。曲終瑤瑟怨湘靈。振衣已出塵埃外。漁父何因笑獨醒。

由麗江抵北流

頻年鞍馬歷荒陬。唐代羈縻是此州。猺洞千蟠攀嶺怯。鬼門一線入天愁。朝昏吹角呼林鹿。婦女張弓射野牛。卻望伏波銅柱在。飛鷺跼跼海西頭。鬼門七字筆下有陰險愁慘之氣。

天下大師墓

曾聞道跡入禪關。身似浮雲到處閒。解道龍蛇潛草野。何年弓劍傍橋山。緇衣那有中官識。御馬誰迎老佛還。一自櫻桃無薦地。肯留封樹在人間。曰曾聞曰解道曰那有曰誰迎曰肯留見建文之歸皆致身錄宮自焚中使出其屍於火七日乃葬是明明死於火矣至天下大師墓朱竹垞謂房山僧塔或題司空司徒或題帝師國師金元舊制皆然後人附會爲建文墓也此詩故作疑詞使人言下自得。

海幢寺觀大水西下

鬱水西來萬壑奔。倒翻塔影盪雲根。中間一束高腰峽。直放驚濤出海門。

題謝皆人詩後

紅桂飄香月露清。玉完天上奏瑤笙。白頭弟子秋風裏。來聽霓裳第一聲。

筍溝早發

北風獵獵水茫茫。多謝吳門鼓柁孃。鐵鹿長檣四千里。送人夫婿早還鄉。

載兒夫婿去。劉采春怨之。送人夫婿歸。方舟又謝之。舟人受怨。

乎。受謝乎。各見吐辭之妙。

櫂歌

風江潮動月茫茫。懊藹聲中夜未央。南北東西盡蓮葉。不知魚戲在何方。

毛張健字今培。江南太倉人。貢生。官訓導。

寄衣曲

去年寄衣秋月明。絡緯索索窗前鳴。今年寄衣風復雨。不識何時到邊土。邊城八月多早寒。清霜觸體愁衣單。千絲萬縷妾手製。中有珠淚焉能乾。不願功成垂竹帛。但願全軀返鄉國。學張王體。難於別開生面。意緒自抽。一歸敦厚。如舊

穀中春出新粒也。

少年行

千金寶刀紅玉弮。繡鞍蹴踏長楸下。揚鞭不避執金吾。橫過禁園矜善射。自云生長金張門。意氣雄豪那可論。小時便食天家粟。曾向長楊奉至尊。隴西老將七十戰。絕域剝身空浩歎。羨君不識兜與整。襟中骨

相當封侯。以飛將軍之身絕域。瀕出少年之寵榮。卽所云生年十二有重封也。寒郊類轉蓬。烏乎知之。

賈客樂

布帆滿幅高百尺。知是賈人遠行役。賈人生小樂風波。不戀家中好田宅。瞿唐豔潁平地過。此行金錢十倍多。更促前程向江口。淮南米貴今如何。春閨少婦空房宿。聽罷烏啼淚盈掬。原詞極形賈客之樂。此於賈客逐利中。形出閨房之

苦。末二語總於換韻。換意中翻新。

毛

序字東球。江南太倉人。著有靜娛集。

偕同人散步

殘紅委煙水。潭深淥更淨。臨流弄清泚。鬚眉淡相映。泠然洗我心。迴絕非人境。鯁魚從容游。鷗鳥度明鏡。物我兩俱忘。不減濠梁興。回首林邱間。閒房一聲磬。心和氣平。物我皆得其不著力處。正不易到。

輓龔敬五

執友驚淪逝。霑袍涕泫然。卑飛辭捷徑。少別卽重泉。燈暗匡衡壁。塵淹子敬甔。如君瑚璉器。何可使無年。天意原難問。龍蛇厄運過。青山仍落魄。白髮竟如何。講誦生徒散。叢殘著述多。黃墳感存歿。回首邈山河。

陳培脈

字樹滋。江南長洲人。國學生。○樹滋篤於友誼。壯歲與諸才士角。逐名場。然衆人升雲路去。而樹滋終老諸生。無幾微見色也。詩宗法盛唐。晚遊新城。尙書之門。所詣益進。

相逢行贈宋六木天

一年相逢在輦下。秋雨槐花對僧舍。同時獻策不見收。劇飲淋漓共悲咤。一年相逢在濟南。擁鑪未盡深宵談。烏啼曉霜催別緒。送君道上鞭羸驂。一年相逢在淮口。我挂征帆方疾走。君時追送騎馬來。隔岸遙遙但揮手。淮口一去歲一更。斷蓬落葉愁飄零。詎意今宵燈火裏。相逢又在曹邱城。人生聚散本難定。暗中物持其柄。一年一度一相逢。如我與君良足慶。歡遊莫道在異鄉。寒梅著花春酒香。日日看花共飲酒。從今且得無參商。只敘聚散。自見交情。

登娑羅坪

絕壁迢迢上。忘危勝可探。百盤窮大壑。千仞度層嵐。采藥逢毛女。藏書問老聃。白雲如可臥。一枕學圖南。

南越王墓

天下亡秦日。乘時據粵中。自娛聊竊帝。大長竟稱雄。炎海風濤壯。孤墳草木空。千年餘霸氣。常繞尉佗宮。一筆寫就。不加追琢。比之羶丸脫手。

登慈恩寺浮圖

飄然天半御風輕。身在浮圖絕頂行。三輔山河掌上盡。五陵雲樹望中平。氤氳香界從朝暮。高下桑田幾變更。故事尙傳唐進士。曲江宴罷共題名。五陵三輔。收之指掌。問何等胸次。元登此塔。至云危梯暗踏。如穿洞絕頂初攀。似出籠。幾不成語。當時元白盛稱之。何耶。

蓬萊閣觀海和觀察宋公

傑閣峻嶒倚杳冥。憑高望遠極東溟。龍宮潮湧千重白。蜃市烟消萬點青。鞭石荒唐懷霸主。浮槎恍忽遇仙靈。蓬萊咫尺非難到。便欲攜筇叩紫扃。

徐州懷古

紛紛楚漢當年事。憑弔西風向戰場。隆準至今尊帝號。重瞳終古怨天亡。呂梁濤落蛟龍走。芒碭雲深虎豹藏。王氣彭門消歇盡。孤城一望水茫茫。

恆山

上應天樞象北辰。衆山環拱碧嶙峋。雲霞隱見金銀闕。昏旦盤旋日月輪。呼吸蒼冥通一氣。逍遙紫嶠會羣真。陽終陰始扶元化。朔漠長留太古春。

氤氳霧靄擁危巒。象肖靈虵勢鬱盤。望去神光凌斗極。飛來秀色落桑乾。龍潭雲出千崑雨。虎口風生萬壑寒。我欲摩崖登絕頂。扶搖何處覓青鸞。恆山詩罕有佳者。作者以全副本領赴之。遂覺神力俱佳。

陳留弔蔡中郎二十四韻

道出陳留郡。車停潁水濱。不勝懷古意。爲弔鼓琴人。王粲稱前輩。張衡記後身。軼才真曠世。偉貌迥殊倫。淹貫鴻都學。輝皇清廟珍。干時良策蘊。應詔直言陳。鸞鳳偏垂翅。驪龍漫觸鱗。幽囚北寺獄。遠徙朔方塵。禍稔天心酷。憂深國步屯。妖氛纏黑氣。賊寇起黃巾。炎祚傾危日。梟雄剝亂辰。徵車憐迫促。解綬悔逡巡。

殄滅嗟元惡。彌縫賴大臣。然臍誠已晚。動色亦何因。過細寧難宥。冤奇竟莫伸。踉蹌付廷尉。涕泣遍朝紳。已矣儒宗失。悲哉史筆淪。無兒延嗣續。有女歷艱辛。忠孝名終在。風流蹟未泯。篆書垂一代。碑版照千春。尚論追芳軌。遐思托德鄰。茫茫尋故里。寂寂委荒榛。事往浮雲似。文傳炳日新。虎賁猶得似。想像為傷神。
董卓既誅。中郎在王允坐上。言之而歎。有動於色。是其所短。餘如諫三五法。諫市賈。謬為宣陵孝子。諫天降災異。條列七事。皆原本經術。有裨政治者。即董卓初徵時。因不能逃避。始就既就。亦屢次箴規。而王允恐其作史。誦之。必欲死之。毋乃已甚乎。詩中逐層排比。得失並陳。工力悉敵。頗得少陵家數。

張錫祚 字永夫。江南吳縣人。○永夫野居南園。後遷木瀆之下沙。三旬九食。經年臥病。居半以藥石為餐。殯也。詩初以生新為宗。能盤硬語。後一歸平澹。在韋左司柳柳州之間。年五十餘。窮餓以卒。葬靈巖山麓。碣曰。詩人張永夫墓。好事者每攜酒醉之。

編籜

林壑有真趣。塵俗難相通。清晨飯藜藿。荷鋤春風中。薜荔劓鄰園。杞菊采榛叢。枯朽既芟除。柯條盡青葱。日入返茆檐。羅植清溪東。屏藩宛天成。束縛隨人工。放誕世所棄。舒散豈爾容。
已造自然。

重九後溪南采杞菊

佳節條復過。寒商激林杪。霜清杜若洲。花發蒹葭島。空庭無嘉卉。何以慰幽抱。緣源路轉迥。穿林人漸少。朱實披榛叢。黃花掇香草。尋異心無厭。適己物逾好。即此俗慮遺。逍遙可忘老。

贈澗上僧

竹庭殘雪淨。林壑寒流清。經聲靜夜闌。水月生空明。道人了觀化。心止神流行。空齋一相對。澹然離俗情。
色香臭味俱淨。此種詩幾不能品評其佳。

訪沈石田故居

抗心希古賢。閒情緬高士。孤舟渡平湖。日落遵枉渚。逶迤入荒村。徘徊覓遺址。人語散鳧鷖。草長眠鹿豕。何處有衡門。田中問孫子。

田家詩

礪确土無膏。人棄爲原陸。釋子云西來。挂笠結茆屋。學空易爲悅。機熟遂衆欲。嫗老苦力田。薄言往種福。日出聽談經。暮歸悔碌碌。惟我喜飲酒。醉鄉數往復。酒醒春鳩鳴。踏月起浸穀。所願穀抽芽。生理良已足。
學空兩言。見空幻易於動人也。然福田之虛無。孰如力田之實獲乎。飲酒浸穀。乃見本分。

雨夜懷曇長老

寂寥湛深夜。青燈照空宇。花發嶺頭梅。人聽窗間雨。情虛遺衆緣。境清望眞侶。釋子臥雲居。幽襟共誰語。
晨詣南園采蕨

閒居窮篇翰。理生愧無術。隔屋聽鳴雞。啓扉看曙色。逶迤板橋西。俯仰清溪側。薄物世所遺。采掇欣有得。悠然盈傾筐。延詠忘朝食。

題美人歲朝圖

和氣散林臯。江梅香滿屋。佳人愛新節。朝光畫眉綠。素琴靜清聲。翛然倚修竹。不須粉繪。如見美人。覺周昉諸人。祇傳形似。

寒食日龍友于旦招集歸愚書屋感舊述懷用昌黎寒食出遊韻

一百五日修復來。羣陰盡剝陽氣盛。惠風出谷雲霧開。霽色花光共輝映。病夫寂寞臥蓬蒿。囊空莫與繁華競。忽逢朋輩遣長鬚。招我城南共遊詠。林塘歷盡入溪灣。到門始覺日影正。滿堂豪翰筆不停。猛氣紛紜鼓已更。曹鄴淺陋真小邦。曷敢與抗惟稟命。憶昔橫山有遺老。海內獨司騷雅柄。良辰燕賞集嘉賓。泉流風發交相慶。當時豈有文雅飛。但期不失門人敬。詩壇十載淪荒蕪。墓門草塞音容負。荒郊茆屋晝閉門。得句欣欣謂予聖。那堪畏友今盈前。陳劉應徐四座併。銑心劘目豈人工。文章窈渺出天性。洪濤初過澄波鮮。平坡未盡奇峯橫。諸公才調皆挾天。如予只合遐荒迸。奈何並轡得聯鑣。好醜妍媸同一鏡。雕蟲小技不足豪。正變源流那能政。由來人物忌刻削。萬事終須蓄餘勁。日斜投筆酌深杯。束手高齋聽號令。中一段感舊述懷悼橫山先生已亡無人主持風雅也。一氣卷舒略無痕迹。○連上一章皆三十歲時作。

冬夜懷天寧曇長老

野塘無暮柝。燈暗識深更。溪盡斷人語。月明聞櫓聲。薄帷塵夢冷。趺坐道心生。遙憶安禪客。龍眠萬慮清。

謁韋刺史祠

平生輕吏舍，祠宇傍宮牆。誰載花林酒，來分畫戟香。道心棲野寺，詩思冷秋塘。日暮瞻遺像，斜陽正滿堂。

牡丹

深院東風入，開簾香氣清。名花愁采摘，獨立殿殘春。格貴誰求價，庭空欲避人。玉臺今寂寞，對爾覺傷神。

杏花

零落江梅悵別離，小樓人靜倦吟詩。孤村花發春當路，十日雨晴紅滿枝。谷口耕夫歌斷後，壇邊漁父棹回時。南軒老樹誰相賞，日暮淒涼傍酒旗。數枝艷拂文君酒，半里紅欹宋玉牆。自是凡筆此則清遠過之。論品格不論風藻也。

遣愁

老屋欹斜挂薜蘿，柴門寂寂斷經過。擁階梧葉落無數，帶雨黃花開正多。三易龍蛇輕動蟄，二南鐘鼓自平和。素心人遠誰同調，絳綵淒風獨放歌。動蟄則悔吝生焉，平和則嶮巇泯焉。二語已見易詩大旨。

蔣廷鑑字律先，江南吳縣人。諸生，著有半關詩集。○半關嗜義山詩，不喜老杜。不知義山詩正從老杜出也。茲錄其有神韻三章，得義山之一體者。

落花詩和韻

王孫何事不重遊，零落穠華略似秋。燕蹴恰逢沾舞袖，風扶猶欲上歌樓。今生約已東皇判，未了緣從夕照留。色相由來總無著，有生只合住丹邱。第四語寫得無情者有情，今生約未了，因天然對偶，合之感舊二章，知借題以託興也。裴回吟誦，輒喚奈何。

感舊

玉洞桃花也自紅。擬將爛漫答春風。豈知狂客歸來晚。零落青山碧澗中。
習靜長翻般若經。每依月觀與風亭。自從環珮無消息。簷馬丁冬不忍聽。

殷譽慶

字彥來。江南江都人。○王漁洋嘗稱殷彥來之才。憐其屈抑未遇。余未與相識。竟其稿不易得矣。於友人處得近體二章。皆首尾完善。有聲光者。

玉山亭

萬頃澄光倚翠屏。磯頭縹緲峙孤亭。窗收吳楚千帆白。座揖金焦兩點青。高岸浪交遙似沒。危崖木落倒堪聽。扁舟待渡依江滸。疑有魚龍積氣腥。

暨陽懷古

此地勾吳戰壘開。尙餘重鎮楚江隈。城邊斥堠連天遠。海上魚龍捲浪來。黃歇塚荒迷蔓草。延陵碑古蝕蒼苔。西風入夜鳴哀角。并和砧聲徹曉催。

李鱣端

字蒼存。江南盱眙人。著有焚餘稿。○王漁洋稱蒼存詩文從衡有奇氣。江淮間才子。今讀其集。工麗之作居多。

寒日登寶積山與客談宋南渡事懷古有作

自注。宋與金和於此山納歲幣。因以得名。

愁雲萬疊鎖層峯。石徑猶疑戰馬蹤。南渡衣冠慙小國。北人臣妾視高宗。金繒不惜拋流水。社稷何曾復故封。登眺枉爲韓岳恨。夕陽寒寺一聲鐘。

芳樂苑故址

王氣江東勢漸傾，紛紛土木壯臺城。苑從趙鬼歌中起，花向潘妃步底生。蔓草久依馳道長，清塵無復屬車行。山僧莫更談遺址，落日秋風只雁聲。東昏從趙鬼之言起芳樂苑鑿金為蓮花貼地令潘妃行其上。句與前寶積山一結相似。唐入許丁卯亦每有此病。

仲春漫興

午困常貪睡不醒，殘書架上任零星。年饑未敢呼庚癸，命賤何煩問丙丁。疎幕婢留飛燕路，小窗童挂護花鈴。春來頗說山遊好，愛惜芒屨懶踏青。隊仗工穩不落下家。

張元昇

字時升江南江陰人布衣著有半園詩○半園早歲壯遊中年後隱居荒江之濱不與人接。入選中意者自嫌工巧未歸高格耶余嘗寄詩贈之云潮回疑蝕岸雲動欲移山穴並壑佟鑿門同栗里關傾倒之者素矣。

送友人東軒對月

今夕不為樂，明月竊笑之。故人有好懷，招我坐軒墀。涼風颯然至，葛巾吹欲欹。金樽泛清醕，滿酌不容辭。蕭條人間世，昔人渺難期。作者詩學杜陵一起又卻似太白。

舟中

一身嗟浪迹，九月更浮舟。宿鶯依頽岸，寒花逐亂流。江雲昏對雨，市火細明樓。漂泊孤帆暝，悠悠動旅愁。

氣味近杜。
不在形貌。

眼復明呈諸舊遊

不信多愁眼。還堪照古今。
皇天終不棄。孤客亦何心。
身世宜新哭。山川續舊吟。
但能從我好。窮餓自鳴琴。
亦突兀。
亦骯髒。

贈別雲間高日采

兀傲嗟予舊。清狂識汝新。
蒼天憐骨格。老眼拔風塵。
倚劍寒燈夜。題詩異國身。
從來嵇性懶。相對獨情親。
沉鬱蒼涼。上章言會合。
下章言送別。詩中章法。

乍見真堪樂。將歸卻可憐。
亂山孤客影。斜日欲離天。
別淚江亭上。鄉心馬首前。
淒涼分手處。後會在何年。

度隴雜詠

寂寞經荒縣。蕭條只幾家。
邊雲迷古堞。嶂月冷清笳。
小市都無米。居民不解茶。
破檐門不設。愁殺曉風斜。

高秋

寂寞高秋晚。微霜下古城。
西風吹鬢老。落葉入詩清。
天地孤鴻影。關山畫角聲。
只思歸去好。閒臥聽春鶯。

落葉入詩清。五
字苦吟而得。

過雁

遠渡湘江水。來悲海國秋。幾重黃葉路。萬里曉霜愁。片影迷寒月。孤聲落暮樓。西風正蕭瑟。對汝淚堪流。

曹叔方以久客夜吟題請予賦詩。自注。叔方楚人。時值兵亂。流寓江陰。

清漏迢迢夜正闌。寂寥孤館劍光寒。半天霜墮杵聲急。一院月明人影單。海國燕鴻秋思苦。湘山烽火楚城殘。自憐頭白不歸去。空倚西風泣路難。

晚秋感懷

霜濃日瘦半溪陰。一片西風百感侵。窮海天高寒鬢影。空山木落老秋心。年荒貧病堅辭鶴。竈冷淒涼泣問琴。卻歎吟殘重岑寂。更誰載酒過花林。五語言無糧放鶴。六語言無柴鑿琴也。貧況可想。

夏

弘字任遠。江南揚州人。○殷彥來。寄亡友夏任遠詩於漁洋。漁洋賞其中有晚唐佳句。并謂彥來友道可風。皆古人誼也。見分甘餘話中。附記於此。

秋夜讀九歌

娟娟涼月生虛壁。酒罷攤書讀九歌。興託美人情最切。思深公子怨何多。湘皇淚雨滋叢竹。山鬼悲風帶女蘿。一夜寒砧催木葉。洞庭今已起微波。末點秋夜。仍關映九歌。

春寒

門掩蒼苔一徑中。鞦韆閒在曲闌東。梨花落地半窗雨。柳絮入簾三日風。鬪草懶舒紅袖冷。啼鶯無奈畫屏空。江南二月韶光賤。孤負枝頭蛺蝶叢。搖之曳之。風神無限。

孔東塘博士招同人集傍花邨

傍花村裏花如雪，撲席浮觴二月時。莫向伶人爭畫壁，雙鬢都唱使君詩。死事活用。

廖

燕字人也廣東曲江人諸生。

飲酒

萬古此一時，天地爲我宅。紛紛各有求，何時免憂戚。我心清且閒，順逆等朝夕。微酣意自佳，興至境多適。悠悠欲忘言，仰睇寒空碧。是飲酒起法。

劉祖啓

字顯之廣東東莞人貢生。

喜鍾狔是至

草色滿階除，君來獨慰予。人當離亂後，交在死生餘。冒雨沾村酒，衝泥得野蔬。共談身世事，款款月來初。
王文潛字清淮廣東南海人布衣。○清淮流寓吳中落拓不偶詩成隨手散去他人製之亦不知爲己作也客死同人葬於虎邱之半塘詩一首從友人冊子中錄出。

丙申歲春留別松蘿

驛路梅開春正芳，歸心偶動問輕航。經年半醉湖田上，自注松蘿隱居湖田。何日重攜虎阜旁。煙水夢魂千里月，乾坤吟嘯一頭霜。同懷莫訝輕離別，難遣羅浮業盡荒。留別後仍未得歸卒物於旅寓亦可悲其窮矣。

黃河激

字葵之廣東南海人著有葵村詩。

歸燕

昔別依窮海。今來逐暖風。細微無物役。飄泊有人同。正喜銜花語。仍勞葺壘工。遙憐楚江外。棲止盡林中。
寫歸燕而已之去來無定亦在其中咏物詩須如此作

送胡長史從軍鬱林

野燒明虛帳。秋聲落戰旗。可能聞笛夜。相忘在家時。阮瑀工書劄。陳琳解賦詩。知君年少日。曾慕帝王師。

嬌女

嬌女如新月。微光欲照人。眼邊頻顧汝。掌上更無珍。紺髮翦齊額。紅衫裁過春。歲華看漸老。歡喜入佳辰。
比嬌女以新月不類而類情至者知之

邊馬

暴露風霜早。長嘶傍塞門。歿無文梓槨。身有僕姑痕。暮齒愁相棄。成功不與論。殊方來汗血。玉輦日承恩。
三四典雅結意深遠明皇用蕃將代漢將言外可思

南海神祠

神奠南溟靖海妖。開門風浪極天遙。凌虛臺榭觀初日。排仗魚龍候早潮。祝版御名皇帝署。祠官儀品太常標。地靈不共桑田變。賸有唐碑歷數朝。

翁

誥字元將江南吳縣人上舍生

題金亦陶運甃圖

清談坐嘯晉祚圻。五馬南奔避劉石。長沙勵志向中原。朝暮州齋運百甃。樽蒲戲具收奴事。生既無聞死何益。高論猶堪振懦夫。光陰分寸誰珍惜。金君名字慕古人。昂藏磊落自寫真。雞羣獨立千里鶴。形貌不與尋常論。八州富貴非所羨。名山大業當精勤。君不見棄官歸去彭澤令。祖孫高躅千秋敬。撫松采菊良可師。運甃君偏希士行。吁嗟乎。少年掣電須臾過。努力不早奈老何。及時矻矻休蹉跎。亦陶之考爲孝章節者亦陶不師淵明而師淵明之祖意各有取也然亦陶非用世人故云八州富貴非所羨而勉以能惜分陰用意微不至。

吳之麟

字鳴夏江南歙縣人諸生○此友生吳太史瑾含祖也詩稿甚富瑾含郵寄偶然散失祗存記憶二章比於吉光片羽惜之益珍重之

登金山塔

踏盡層梯到半空。洪流一柱鎮蛟宮。羲娥近走簷楹際。江海平分指顧中。帝子鳳笙吹縹緲。仙人桂館啓鴻濛。三山採藥堪長往。我欲歸乘萬里風。賦此題者過於求奇每流荒幻若此氣足神完無一閒筆浪墨洵推高唱。

出寧羌馬上漫成

亂鴉散盡曉煙濃。馬首青橫劍外峯。斥堠東連秦鎖鑰。雍梁西界漢提封。天邊鳥道秋無際。雲裏猿聲樹萬重。極目黎城何處是。西風寂寂下高春。

先著字遷夫四川瀘州人遷於金陵著有之谿老生集○遷夫自云先世瀘州或云託言蜀地并託言姓先猶明代之孫一元不知果秦人否也詩有生趣不必以正聲繩

述懷

勞生百年內。患有入之形。一身歸虛無。萬念偏營營。雖有賢智人。惟與憂患并。不能棄人紀。焉得辭天刑。絕類廢羣生。造化難爲情。已矣何所逃。安之以無爭。老氏之學歸到不能棄人紀安之以無爭仍是孔門一脈矣

堰北水

堰北水。一日高一尺。十日一丈強。秋來淫雨多。千里萬里洪流長。報水汎人善涸水。入水不愁沉水底。順流一日五百里。自注裹皮漚泗水面日五百里。修堤築堰年復年。安得水勢倒行還上天。決口乍塞塞口決。明年再請司農錢。

病起截句之一

移植甘蕉爲綠陰。經年長大已成林。天寒霜落休輕翦。恐有秋來未死心。自寫逸民身分

贈海雲子

相逢炎月亦蕭森。來處家鄉是古斟。自注壽光即古斟國。與論山川幾人物。仕秦王猛亦何心。自注景略縣人○荷

孔明魚水之合。然責其不仕晉而仕秦。自是正論。

李

崧字靜山江南無錫人布衣著有芥軒詩集○芥軒天真未漓視天下無不善人。人有機械者。崧對芥軒亦無所施。生平在春風和藹中也。居鵝湖之浣香園。妻子奴婢蕭然自得。晚歲盲於

目詩成每令童孫書之

沈莊樗古隸歌

銀光橫陳瀉寒玉。力排龍虎斷鰲足。兵甲銷磨古戰場。折戟沉沙遺鏃鏃。是誰作此古隸書。莊樗先生出凡俗。先生耆年鬢蕭騷。手撫碑版情偏豪。蒼崖古廟及破冢。每過其處常周遭。一點一畫無假借。心摹手追不輕下。青霄紛紛亂粟雨。颯颯呼號鬼神詫。秦有程邈漢蔡邕。鍾繇梁鵠稱神工。有唐鼎足韓擇鄰。李潮兼擅數子推元宗。封禪碑直追漢人國初顧苓與鄭篋。大江以南稱兩雄。苓也謹嚴筆屈鐵。篋也流宕徒橫

從。先生奮起更超越。網羅今古無遺蹤。贈予長箋并短幅。大如盆盎細如粟。玉軸牙籤座上陳。周鼎商彝眩人目。海陽程旭吾及門。善寫丹青頗得名。一見法書狂叫絕。臨摹面壁搜杳冥。苦心經營忘晝夜。形枯神瘁戕其生。嗚呼造物毓才稟元氣。君之精力雄健誰能爭。此芥軒贈先大夫作中間品評恰如分量結意從橫恣肆不得以尋常方幅繩之

宴溪亭翫牡丹舊歌者

去年清宴此花前。一串歌珠粒粒圓。今日花前追往事。空留白髮照嬋娟。

周龍藻字漢荀江南吳江人○漢荀為忠毅公後學使者試士輒冠其曹名著大江南北間以歲貢士終藝林惋惜之詩稿甚夥所鐫惟樂府三卷諸體俱未遇目故所收亦止在三卷中

大牆上蒿行

牆上蒿。自誇託根高。根高苦不固。萎落隨風飄。牆上蒿。自喜擢秀早。秀早苦不長。離披抱霜槁。蒿生蒿死

曾足計。但恨踞盤難得地。明堂選柱少成材。等閒齊把蕭繁棄。伏波慕良臣。肯逐井蛙住。亞父好奇策。終被重瞳誤。丈夫未遇魚水知。且辦隆中高臥處。眼前富貴輕秋毫。搏扶豈必假羽毛。紛紛依傍何其勞。君不見牆上蒿。見居高位而不能有爲。不如棲隱蓬廬待時。而出也。元辭含意未申。此以議論傾吐之。

隴頭水

隴坂遙遙九折長。驅車欲渡心蒼茫。忽聞有水喧道傍。人言此水聲聲別。盡是征夫眼中血。萬古千秋共嗚咽。嗚咽聲流未已。輓轡聲行不止。夜半吹寒笳。邊風四面起。悲莫悲隴頭水。

後怨歌行

藕絲斷不再連。銅鏡破不再圓。卽看金屋人如舊。昨日恩情今日捐。情多情少安足計。只道色衰恩始替。驚心最是落花風。偏在溫存旖旎中。妾恨不爲珠娘樓。窈娘井。骨碎君前猶耿耿。求鳳曲化白頭吟。撥盡紅爐灰已冷。當初離鄉來。滿望登玉階。玉階非不登。轉瞬沉草萊。乃知苦樂真相倚。纔隔衾裯同萬里。升沉反覆變須臾。縱有容華難久恃。雨落不上天。水覆難再收。只道得色衰愛弛。此卽從溫存旖旎中。見已者爲可久也。

周在延字龍客。河南祥符人。樸園侍郎幼子。

送吳冠五至歷城

白雲縹緲唱驪歌。朔雁迎帆渡大河。自昔吳公天下少。至今名士濟南多。探奇莫負勞山約。觀禮應先闕里過。齊魯當年故友在。煩君問訊近如何。三語送冠五美其治之第一也。四語至歷城嘉其地之多賢也。詩能典切便不膚浮。

錢良擇

字玉友。江南常熟人。著有撫雲集。玉友隨大吏出使海外。又同朝貴使塞外絕域。爲詩感激豪宕不主故常。而所選唐詩又兢兢規格。如出二人議論。不可一律拘也。

觀小妓娟娟舞劍作

蛾眉有英雄。晚妝脂粉薄。短髮白衣裳。窄袖錦纏縛。背人緊湘裙。端捧蓮花鏢。請爲當筵舞。佐此良宵樂。取筆漬硯池。授客使分捉。舞急各蘸灑。客漫應曰諾。小立寂無言。左右試展拓。微卓蠻鞞尖。撒手忽然作。初如雙玉龍。盤空鬪擊攫。漸如曳匹練。旋繞紛交錯。須臾不見人。一片寒光爍。直上驚猿騰。橫來輕燕掠。膽落迂儒愁。傾心壯士作。羸童縮而遯。姦人戰欲瘡。墨灑密雨叢。筆敗硯池涸。罷舞視其身。點墨不能著。媯然泥人懷。腰肢瘦如削。兒時見湯丈式九舞劍。謂矢不能入。衆以鳴鏑試之。連斷三矢。此蘸墨灑之。不能著。點同一神伎也。自初舞及罷舞。如見其人。妙在是美人不是壯夫。此作者極用意處。

關山道中

千役方知行路難。兼程莽莽過重關。鳥隨落葉下枯樹。人帶夕陽穿亂山。廢耒江淮愁木酪。荷戈秦楚盼刀環。季鷹豈有封侯骨。甘棄蓴鱸去不還。

寄內

六分春色四分過。夢斷家山近若何。九陌鶯花情緒少。十年夫婦別離多。無方賢俊皆簪筆。有道乾坤漸止戈。只有恨人歸未得。鏡奩閒殺舊青螺。三四語天然入妙情。到最真不煩鑿琢。

得劍村寄懷詩次韻答之

亦知信美非吾土。誰說狂夫不憶家。昨夜客窗風雪裏。夢歸山館種梅花。憶家成夢。夢歸種梅。於不著緊要處寫情。語淺情深。得古風人

秋夜聞歌

雲停碧落桂飄香。竹肉齊聲起後堂。壯士尊前驚變徵。美人帳下怨清商。繞梁何處傳新譜。擲笛誰家傍短牆。流落江南老詞客。還思天上詠霓裳。

陸

蔭字念爾。江南長洲人。著有湖村詩。○念爾天才高曠。謂詩專主性靈。以人工累之。猶太虛中。著浮雲也。此言恐開廢學之漸。然冰雪襟懷。略無渣滓。朋儕中無與偶者。三十餘中。菌毒死。倘使之永年。加以學力。所詣可限量耶。

白雲洞

我遊白雲洞。身在白雲裏。落葉和松風。時聞響山雨。石牀不可留。清寒逼衣履。隔塢暮鐘聲。雲留我歸矣。

從柳州小
記中悟出。

遊鄧尉山

停橈費家湖。山翠圍幾重。捨舟事筇屨。漸入香林中。鄧山峙湖濱。峯勢高龍從。三萬六千頃。湖流浸長空。花外見晴雪。花裏聞香風。朝煙而夕月。泠泠沁心胸。小憩上竹閣。恍然覩支公。趺坐鳴蒲牢。嗒如吼蒼龍。清音應虛谷。餘響入深松。憶昨西谿宿。醒時聞此鐘。

山行

去祖塋數武。循小徑入。泉聲淙淙可聽。梓籬半掩。蘿屋一椽。有僧居之。樵者置束薪於門。僧鑰扉以去。松風吹衣。蒼苔濕屨。獨行久之。了無人跡。唐一序清絕似人小文字。

獨行披荒叢。信步得異境。山色淨杉柳。泉聲寒藻荇。恍疑石屋中。疎磬烟蘿暝。欲問無人家。夕陽照孤影。

次和荃谷寒夜獨坐之作

抱鄰虛堂上。燈前顧影雙。霜林風葉盡。山月正當窗。庭訝翻巢鳥。村疑吠客厖。有懷淞水畔。一葦釣寒江。不著一字。盡得風流。

過石樓贈山僧不羣

萬峯臺下碧山岑。疎竹圍窗白日陰。僧古已無煙火氣。樹枯饒有雪霜心。洒空松吹飛寒雨。捲壑風泉響夜琴。不是樵人偶相識。那知尊宿在祇林。

陳

鍊字道柔。江南武進人。諸生著有西林詩鈔。

野望書懷

霜晨閒踏舊魚磯。地僻應憐屐齒稀。何處水雲孤雁叫。滿天風雪一僧歸。杜陵廣廈蓬茅是。白傅長裘犢鼻非。豈獨袁安正僵臥。千村隨在足寒飢。書生負如許懷抱。韻語中可以想見生平。

朱

經字恭庭。江南寶應人。諸生著有燕堂詩鈔。

寡言

隴山多飛鳥。翱翔適其生。鸚鵡誇能言。樊籠苦拘縈。鐘鼓懸太常。考伐聲鏗鏘。不叩而自鳴。羣謂之妖聲。吉人以行重。躁人以舌輕。緬懷磨兜堅。守口心忪忪。

責己

勿謂寸陰短。既過難再獲。勿謂一絲微。既緇難再白。赴善登崇山。寡過掃塵積。一日省一愆。三月未盈百。責人不肯恕。責己每自匿。願言砥廉隅。此身敢虛擲。

惜日

江河日流注。難挽東逝波。羲和日奔馳。難回魯陽戈。終日但飽食。冉冉歲月過。此後悔失時。荒耄無如何。浮游水上萍。奄忽霜餘莎。勉旃復勉旃。慎無悲蹉跎。以上三章。吾輩讀之。幾欲通身汗下。○嘗論詩貴理。每以語錄成詩。不無泛腐。若切已箴規。可以省身治心者。又當別論。蓋有覺德行。基命宥密。雅頌中不廢斯言也。

徐恪字昔民江南江陰人貢生

桃葉曲

春雨木蘭舟。春風桃葉渡。嬌鶯自在啼。雙槳橫塘去。橫塘繞山斜。一徑采山花。門前舊湖水。還對莫愁家。三月桃李飛。四月蘼蕪歇。五月南風來。谿頭長蓮葉。蓮長過人頭。折來寄西洲。西洲望不見。煙雨空江樓。樓前雨如絲。樓上烟凝黛。日暮瑣窗寒。風吹雙縷帶。雙帶結同心。江深情更深。相思不相見。獨自理瑤琴。瑤琴復何許。憶得橫塘語。郎從蓮葉翻。儂比蓮心苦。千里下關山。不將書報還。夢中金錯剪。擊碎雙鴛環。殷勤再三道。西風寒料峭。只恨柳絲輕。莫遣桃花笑。昨夜佇回車。葱隴聞井鴉。那知風雨隔。望斷長風沙。

全學西洲曲神行於纏聯策鎖之間。

謁方景二公祠墓

蒼松吼靈雨。白日搖孤光。宗臣儼像設。肅拜趨祠堂。成王周公辨。大義聲雷硠。精誠動星象。袍笏飛秋霜。當時棄朽骨。匿跡埋山岡。後來公是非。何曾恕文皇。年號削建文。瓜蔓屠忠良。一死明大義。萬古扶綱常。鍾山石馬蹲。孝陵寢殿荒。雲旂肅奔扈。千載遙相望。成王周公一聯指方公。精誠星象一聯指景公。下合言之。是非長存。不恕文皇。人心所以不死也。此種詩乃不徒作。

顧紹敏字嗣宗江南長洲人陳生著有陶齋詩鈔。○嗣宗屢試南北闈。終於不遇。晚而著書自娛。亦足悲其志矣。詩自中唐以下。兩宋金元明無不含咀采擷。彙而成家。平昔論詩以情韻爲上。

風骨次之。故稿中詩品亦恰如其議論。

牧牛詞

秧鉞短短湖水白。場頭打麥聲拍拍。絲楊影裏繫烏犍。雙角彎環臥溪碧。晚來驅向東阡行。踢角上牛鞭。兩聲短童腰。遂唱歌去。草深撲撲飛牛蝨。但願我牛養黃犢。更築牛宮伴牛宿。年豐不用多苦辛。隴上一犁春雨足。

澹泊居花下。招同惠仲儒。鄭季雅。沈歸愚。徐龍友。王斗文。小飲作歌。卽送季雅入都。

清明雨過春濛濛。情懷索莫如寒蛩。西河有淚久嗚咽。夜半夢魘驚惺忪。古香荒土鬪新塚。一杯清醕澆蒿蓬。書齋魚尾鎖寂寞。蛛絲罨席垂簾櫳。誰知造物每多事。也復亂發花叢叢。鼠姑兩本色欲絕。開軒一笑驚春紅。家人怪我少歡緒。依然羅幕張輕風。竹萌如玉鱠如雪。好友招集開醅濃。索郎快覩碧椀凍。花光酒色相瞳矓。清平三調久稱絕。元輿一賦誰爭雄。諸公才思並清俊。妍雅合度吹笙鏞。所疑雲龍本一氣。愈何軒達郊何窮。飲停鄭子語刺促。忽爾言別辭江東。榆錢散打綠陰暗。黃沙撲面飛蓬鬆。去年作客太無賴。秋南春北隨飛鴻。何如束腹臥窮巷。卷書細讀聽長松。鄭子掉頭意不爾。令我愁別悲忡忡。一路平

敘去。注意在送鄭入都。見出不如處。果能薄身厚志。窮居亦足自樂也。贈人以言。猶見古道交意。得此一段。遂覺通體皆活。○時主人喪子。起手從此敘入。

秋夜聞笛有懷

雨過秋堂夢不成。旅人獨坐夜淒清。竹梢露下鶴初警。牆角月明蛩有聲。舊恨每從燈底得。閒情只向笛邊生。誰憐一掬窮途淚。獨有陳留阮步兵。山雨乍來茆溜濕。溪雲欲墮竹梢低。石田句。寫微雨入神。此寫秋夜入神。覺韋莊羅隱風趣猶存也。聞笛有懷。只於來路一點。

秋日感懷

霜染林臯木葉催。蒹葭秋水隔重隈。美人有怨收團扇。狂士歌呼托酒杯。映日芙蓉依淺沼。撩寒楊柳下荒臺。子山詞賦傷搖落。秋老江南亦可哀。

夢醒孤窗細雨斜。賸將薄病對黃花。心情略似窺籠鳥。歲月渾如赴壑蛇。楚國有人憐息媯。蜀箋無信報秦嘉。天涯知己誰相問。好負羊裘上釣槎。息媯。媯音平仄兩收。

秋來無事不傷神。風物從教又一新。沙雁隔雲將別浦。寒蛩覆葉漸依人。中郎應自憐焦尾。巧匠何堪笑斲輪。只有閒情忘未得。柴門還對舊松筠。三味寫景中便帶比興。當合言中言外求之。○寒蛩一語。狀寒士依人。見王粲馬周未遇時。俱不能免。爲之慨然。

贈山陽程爽林

無端意氣漫崢嶸。知己天涯涕欲傾。駿骨可能招樂毅。狗屠從此識荆卿。論交不忘期終始。有道真堪託死生。與爾蒼茫同弔古。黃金臺畔暮雲平。爽林慷慨好義。能赴友朋之難。有難。真堪託死生一語。足以見其匡略。

渡江

驛路長亭復短亭。柳花漠漠晝冥冥。人歸冀北衣原素。山到江南眼更青。雨過夕陽看度鳥。風來遠浦數

揚脰開尊且酌高郵酒。不共靈均歎獨醒。此陶村北閘不遇渡江而歸也。三語反用素衣化爲緇句。妙於點化。四語倍形南還之樂。親嘗此境者始知其工。

卷二十七

金志章

字繪甫。浙江錢塘人。雍正癸卯舉人。官口北道。著有江聲草堂詩集。

因樹亭觀唐明皇磨崖碑

明皇昔日侈東封。千乘萬騎紛雲從。超然意象小秦漢。七十二代思兼容。金泥玉檢著符瑞。江茅鄣黍昭虔供。禮成大祀頌聲作。鴻文典誥鏗鐘鏞。天章神筆縱揮灑。鸞飄鳳泊翔遊龍。磨崖深刻紀歲月。萬古照耀天門東。是時國家正全盛。地大物阜民和豐。廟堂宴安漸鳩毒。玉魚繡襪酣深宮。侈心一開蠹隨入。九廟俄頃飛灰紅。淋鈴蜀道馳萬里。百神不救塵埃蒙。徒存茲碑峙巖巖。雨蝕蘚剝雲煙中。牧兒野火燒不得。至今椎搗傳遺蹤。吳郎嗜古得此本。世守什襲裝池工。高齋招我共銷夏。披襟展玩清宵同。規連珠樹矩折玉。墨彩騰上光熊熊。手摹口誦極贊賞。忽憶往事心神忡。中興反正頌神武。亦有巨刻磨巖崧。盛衰治亂互倚伏。鑒戒實可垂無窮。殷憂啓運滿致覆。此理自古關昭聳。開天已遠代幾易。猶留寶刻珍書叢。摩挲掩卷三歎息。人君莫漫誇豐功。

鈴山行

鈴山四繞青谿，銜袁江一線盤脩蛇。東西峽口兩洪東。東為昌山洪，西為鐘山洪。臨城中裏如蓮花。此邦何人昔最著。

豪貴屈指推嚴家。早年登第競名譽。追逐何李矜浮華。歸來築室此山頂。圖史枕胙旁人誇。青詞晚歲博

金鉉。萬事橫決如搏沙。文章不掩孔雀毒。膝下豺虎兼婁緞。讀書不識忠孝字。廿年辛苦何為耶。立身一

敗媿鄉里。至今齒冷千秋譁。清江六月燒晚霞。長橋終古緣城斜。薰天之勢竟安在。徒令弔古興咨嗟。文章

不掩孔雀毒。姦佞之人。雖有才華。莫能蓋也。讀書不識忠孝字。令閱者悚然。

白溝河弔二忠祠張公叔夜文公天祥

白溝河上夕陽時。下馬荒原弔古祠。北渡中宵悲扼吭。南冠孤憤漫題詩。鬼謀曹社家同破。龍去崖山事

不支。太息殘碑焚野火。六陵荒草共淒其。分咏二忠語皆典切。

黑峪

盤盤鳥道上青雲。峻坂危坡路不平。入險橫穿豺虎窟。凌虛俯瞰鸚鵡羣。三關形勝憑高盡。二水波濤出

塞聞。極目長城回望處。河邊飲馬漢家軍。

二十四礮

驚濤如雪濺長空。峭石峻嶒訝鬼工。二十四礮帆側過。不知身坐浪花中。

鷓鴣塘

客情鄉思總淒迷。睡起篷窗日欲西。忽聽一聲行不得。鷓鴣塘外鷓鴣啼。天籟

姚

湘字行表。江南桐城人。雍正癸卯舉人。官常熟教諭。

郭林宗墓

知人薦士緇遺蹤。此日經過馬鬣封。一木勢難支大廈。六屯禍不及潛龍。登仙祇合同元禮。表墓寧須藉蔡邕。更有申屠共標格。高風樹屋獨名傭。桓靈兩朝朝局。黨人之標榜喪身。林宗之不爲危言駁論。得以免禍。三四語盡之。未引申屠蟠。見因樹爲屋。同於傭人者。爲更高也。詩須如此作。方不浮泛。

梅

任爾冰條濕粉痕。何須紙帳護春溫。紅亭遠隔人千里。翠羽初飛月一村。留得寒香清到骨。莫聽羌笛暗銷魂。幾年孤負西園約。凍合孤山獨掩門。與愁在三更。挂月村同妙。

荊州道中

女嬃砧響杳冥冥。楚些吟成不忍聽。行過渚宮神黯澹。猿啼夜半在空舲。

邵錦潮

字賜芬。直隸宛平籍。吳縣人。雍正癸卯舉人。

蒹葭

秋色浮江上。煙波共渺然。蒼茫迷遠渚。寥落向遙天。折葉驚寒鴈。飛花點釣船。伊人不可卽。悵望水雲邊。

喜晚香辭幕府歸出示新詩留飲

千尺流泉百尺松。白雲丹嶂自從容。偶同麋鹿遊城市。終覺鷄鶩厭鼓鐘。句就煙霞頻出手。醉餘魂夢肆填胸。明朝便蠟尋山屐。到處隨君躡舊蹤。一筆揮灑絕去雕飾。此境正未易到。

閨人贈遠

日夕上高樓。雲山一望秋。悠悠渡頭水。空送往來舟。

曹庭樞字古謙。浙江嘉善人。雍正癸卯副榜。○古謙應博學鴻辭詔入都日課一賦。一詩。同人斂手推讓。試後放歸。復入都病歿。此就向所錄者存之。

春雨和錢嶼沙編修韻

兩兩溪邊水鳥呼。漸看檐際濕模糊。憑欄花重紅疑滴。隔座山橫翠欲無。吟苦縱愁春冷淡。病多偏穩睡工夫。卷簾自愛虛無景。未要瀟湘入圖畫。

陳祖范字亦韓。江南常熟人。雍正癸卯會試中式。乾隆壬申舉經學。官國子司業。著有見復詩草。○見復捷春官。未殿試歸。著書友教。垂三十年。大臣以經學薦授少司成。居家受官。生平以天道。

爵自重者也。詩無意求工。自餘道氣。不得以詞人之詩目之。

恆雨

春末夏之首。恆雨連數旬。吾土異高低。高者下種勻。溝車挂梁壁。婦子紡以紉。但俟水勢減。耘耔及良辰。低者淪江湖。波濤浩無垠。雞犬悉上屋。舉家寄河脣。相去數十里。彼此殊越秦。苦樂宜均被。譬如人一身。

半體雖獨活。偏枯爲不仁。所以君子心。溥遍無涯鄰。憂喜不以已。四海熙陽春。物我同體。見此詩。

感秋

人生弦上筈。流光迅於矢。春鳥暢歡情。秋蟲感衰耳。萬籟乘時鳴。一心異悲喜。中宵不成寐。輾轉攬衣起。今人未嘗生。古人未嘗死。欲求不死方。從師悔晚矣。讀末四語。令人內慚面赤。覺可愈頭風。可愈瘡疾。只是語句奇險耳。

夢述

自從別家來。十夕九夢親。父念子行役。不因存歿分。存爲倚門望。隔形不隔神。歿爲空中魂。魂依遊子身。危高山之巔。慄深水之澗。悲哉同行子。生獨爲鮮民。白雲處處多。天涯見無因。可補陟謁。蓼莪之缺。

與星旋釋

爾我各異趣。青山爲之媒。爾心與山靜。我心對山開。山意不將迎。能通彼我懷。書聲雜梵唄。瓶鉢偕尊壘。大道固無礙。何從起嫌疑。推窗月皎皎。梅花點蒼苔。結得淡然。

答任翼聖計偕留別

往還多面朋。孰是心所同。鄉薦忝伯仲。時論推雲龍。一友教四方。一匿影蒿蓬。相見苦不易。終歲欣相從。得窺所學富。飽聞議論雄。冥搜力沉著。集益心虛冲。烏能石攻玉。媿用莛撞鐘。聖籍久黯默。遲子發羣蒙。斯行匪干祿。要展經術功。析理戒穿鑿。守道無窮通。釣鼈不釣魚。君家有任公。析理十字。作者一生得力。

詠史

吾慕江州陳宗族七百人。每食設廣席。長幼列坐俱恂恂。和氣感畜犬。百犬共牢食。必均爲問此何時。豺虎磨牙噬生民。君如奕碁國傳舍。天下不復知尊親。世上自亂家自理。閉門別有無邊春。

送西京訓導宣城

老爲千里別。何以遣離情。道在官無小。風清宦易成。議參秦博士。詩繼謝宣城。遙識青衿子。趨風江畔迎。

寄沈歸愚

把酒論文記往年。隱侯格律敢隨肩。宮中久識元才子。明主終收孟浩然。鶴怨猿驚懷故地。馬遲枚疾鬪新篇。嗟予守兔清江曲。燕樹參差悵各天。簡寄詩篇亦寓規諷。良友贈言何時敢忘。

繆曰芑

字武子。江南吳縣人。雍正癸卯進士。官翰林院編修。

書杜少陵詩後

稷契成虛願。詩篇軼衆羣。吐辭皆信史。每飯不忘君。汗馬懷諸將。龍池望五雲。千秋惟白也。可與共論文。
平穩寫去已盡老杜生平。

秋柳

搖落西風裏。垂條浪不生。本非攀折候。猶有別離情。涼露成清滴。寒鴉噪晚聲。吾生饒短髮。愁對淡煙橫。

前牛正氣後牛虛
寫處處有遠神

潘果字師仲江南無錫人雍正
癸卯進士官辰州同知

觀星臺

太虛茫茫星吐精。仰觀何托觀羣星。三垣高居列宿拱。七曜以次升天庭。觀星之臺自此築。古器森立交
 嶢嶢。吐吞日月孕精氣。異采煥發發堅光。凝夏官歷歷親示我。法象粗得知其名。渾天最古位居右。西洋測
 景開皇清。白注銅象凡十三座皆古物日躔月次分秒忽。相風高尺晴空橫。憶從虞后在玉衡。子來繼咏
 靈臺成。狂秦亂紀失遺法。漢更七帝銅儀興。白注制自宣帝時遞相精核迄元代。人巧上與天工并。直收萬象入
 指掌。豈比露盤承六莖。緣何末造不能守。往來再徙歸燕京。昔聞王孫論九鼎。雖小亦重大。或輕鑄金象
 物尊尙爾。況爲於穆圖真形。何以守之德是憑。惟皇得一符清寧。用意全在末段必如此詩不徒作

蟻磯孫夫人廟

江神踏浪朝靈宮。靈宮夫人下幽穹。女官攢甲擁前後。寶刀爛若銀芙蓉。阿兄虎視霸南國。玉顏小妹饒
 家風。天教帝子作之偶。明珠斗帳藏真龍。赤壁戰後老瞞懼。不敢南下馳鱧鱗。如何昏姻失前好。忍教與
 國連兵戎。臣服魏廷亦豚犬。仲謀那足稱英雄。蜀帝復讐虢亭敗。永安遺詔蒼黃中。夫人有家歸不得。九
 嶷夢斷尋無蹤。蟻磯自沉靈魂在。于今遺廟留江東。廟中傳芭女巫舞。報賽神鼓聲瑟瑟。江流有盡恨無

盡疑有淚竹斑斑紅。仲謀降曹真不可解兩國連兵不獨蜀之遺恨失吞吳也借題發出見權有媿于其妹一起如見夫人英武一結想見夫人抱恨玩其音節得樂府迎神曲之遺

項王廟

威望居然壓沛公。指揮一誤霸圖空。縱留子弟八千在。早失關河百二雄。遺廟可堪隣泗上。英靈只合返江東。所嗟銳氣真無敵。不出淮陰數語中。項王失策在王漢王於巴蜀漢中使得還定三秦則大勢全在漢矣詩中指出具有卓見

桓宣武墓

笑爾何心蓄不臣。餒魂終此伴青燐。生初枉自呼英物。身後教誰歎可人。自注溫過王敦墓輒歎曰可人可人江北柳圍空長大。洛陽鐘簾竟沉淪。縱然未死膺殊錫。地下如何見太真。

尹會一字元孚直隸博陵人雍正癸卯進士官至吏部侍郎著有健餘詩草

居庸關

莽莽關山起暮愁。亂雲層疊隱危樓。雕弧控滿清宵月。畫角吹殘紫塞秋。旅夢無端空索莫。歸心何事更夷猶。燕南碧草還飛蝶。已見桑乾帶雪流。月與雕弧相關秋與角聲相關此詩律細處

陶正中字田見江南無錫人雍正癸卯進士官翰林院編修外轉至山西布政使

讀史

商君修耕戰立約於徙木。賞信罰隨彰卒以震巴蜀。梟雄負異能斷制貴專獨。民可與樂成創始每弗欲。

君子重違衆，持衡妙善俗。握機良所同，用意乃各屬。不見褚衣冠，終焉致巷哭。子產商君同是變革舊政，而用心各別。一是斲喪國脈，一是整齊風俗也。同中見異於公私義利判之。

徐以升字階五，浙江德清人。雍正癸卯進士，官翰林院編修。轉御史，外轉至廣東按察使。著有南陔堂集。

炙硯

文思忽飛揚，冰凝硯一方。炙餘資石炭，化處受玄霜。調燮交離坎，中和適燠涼。不須呵彩筆，抒藻有輝光。調燮中利，由於家人之反身。小中見大，咏物詩須如此作。

關山月

大旗霞捲夕陽殘，旋見邊城湧王盤。鼓角無聲霜氣肅，山河流影鏡光寒。白頭漢將占星立，紅淚胡姬倚馬看。淨掃煙塵天闕迥，清輝多處識長安。神似李北地，以長安月作結，頌揚天朝，前人未到。

金鳳綸江甯嘉定人。雍正甲辰舉人。

冰花自注：元人有題無詩，作此補之。

犁星沒後水藏漪，澤畔鱗鱗見異姿。凝艷不教青帝主，鬪華休遣夏蟲知。凌波神女搴還薄，作雪天工翦並奇。莫訝清英易消歇，楊家山已付流澌。律之細也，字之穩也，人巧盡天工，出應從偶，然得之。

王峻字次山，江南常熟人。雍正甲辰進士，官翰林院編修。轉御史，著有良齋詩集。○良齋素行儼，嶮，彈都御史某視趙用賢之彈張江陵奪情，則又過之。詩亦英爽，如其為人。惟於王新城詩。

時加詆諆趙秋谷諸公聞之應云將伯助予也然即此亦是不隨衆好處

禹州道中

茫茫四野寒蕭騷。朔風動地聲怒號。車帷卷破馬躑躅。夕陽慘澹橫平臯。行人瑟縮帽簷側。手脚凍冷面如墨。晚來投店滿衣塵。童僕相看不相識。

題戴巨川庶子畫馬

自題曰稱德圖

先生畫馬如畫牛。不著鞍韉不絡頭。超遙肯與駑駘伍。放曠還同麋鹿遊。先生相馬如相士。德合剛柔比君子。神閑氣靜在平時。電激颺馳日千里。拈毫十日又五日。慘澹經營能事畢。恍疑貌出古纖驪。直壓開元卅萬匹。君不見黃金之勒錦障泥。多少款段當風嘶。安得壯士馳駿足。層冰蹴裂交河西。少陵題畫馬萬匹馬張公歎其材盡下最稱傑句此云恍疑貌出古纖驪直壓開元卅萬匹英氣直欲追逐少陵

謁岳忠武廟

強弓手挽雅歌嫺。未許韓劉伯仲間。誰使朱仙回玉帳。轉愁雪窖有刀環。長城自壞天難問。半壁偏安王厚顏。遺廟近鄰嵇紹墓。靈旗風靜古碑間。此湯陰岳廟也當時三字獄成固由秦檜之姦而小朝廷之欲復仇其罪更大轉愁雪窖有刀環七字直誅高宗之心

李重華

字實君江南吳江人雍正甲辰進士官翰林院編修著有玉洲詩集○玉洲天賦俊才復得江山之助宜足繼匠門而興起也詩話二卷或引而不發或金針度人可希風昌穀談藝錄

山之助宜足繼匠門而興起也詩話二卷或引而不發或金針度人可希風昌穀談藝錄

道古

子長憤著書。論或憑胸臆。殷勤表素王。已足稱神識。時方貴黃老。經術尙薄蝕。卓然仰高山。先路導其惑。駢羅七十子。附聖爲羽翼。遂使絃誦堂。崇祀盛軌則。我嗟衛道人。曾未預配食。盲左旣酌功。腐遷何媿色。
漢代表章聖道。廣川以後。有太史遷世家列傳。羽翼之功。不可沒也。配食廟廷。前人未開此口。

劍閣

我行閱雄關。天劍殆無敵。迢遙來一髮。突兀遏重壁。望望嵯岬間。豁罅不盈尺。到關穿雪竇。窺戶睇月隙。峩峩二山中。萬丈一磐石。都無客土附。而總精鐵積。其間鬱叢箐。其底亂深射。烏兔失飛走。蛟螭避堂宅。入門循地隧。雙峽巨而窄。左作長鯨掀。右類巨鼇擲。雷轟泯斧鑿。雲蔚隨縷脈。迴風驟長驅。雲氣砭領脊。洪荒想胚胎。元氣更併迫。倘非仙掌排。亦屬應龍劃。五丁力不逮。渠能萬靈役。殘山通仄狹。留險藉控搃。誰知徒長奸。據竊逞荷戟。炎漢固殊類。偏安我惋惜。子陽先覆轍。王孟後接迹。稱帝旋洞胸。降王遞銜壁。何況獻賊流。蝮蝎恣毒螫。張牙縱狂嚙。擢髮終寸磔。伊昔凋敝初。人煙莽蕭瑟。生息今百年。墾闢連萬陌。文翁兼詰戎。武鄉兼教澤。遼絕若番藏。倏瞬達重譯。而此枕席安。號渙誰擁隔。地利分險夷。皇圖觀順逆。磨崖奮如椽。申命誠梁益。
前極形劍門之險。後屢述竊據之敗。見有德則可守。恃力則速亡也。末歸美本篇。皇圖觀順逆。五字。收下半篇。

望太白

太白羣山外。岵岵淡淡分。遙知千歲雪。正雜萬峯雲。鳥道蹤應絕。龍湫吼若聞。帝臺三百里。香氣接氤氲。

雞頭關

雞頭千仞峻。白道細如絲。怒水盤根迅。雄關立壁危。北來天去握。南望漢爲池。咫尺襄城驛。連錢蹀躞馳。
漢爲池對天去握是爲活對

五丁峽

絕壑靈奇盡鬼工。停眸便識五丁通。雙崖翠影侵天合。萬竅雲根入地空。杜宇魂生迷鳥道。蜀山蛇拔剩龍宮。金牛縱被秦人誤。開關何曾讓禹功。
萬竅雲根入地空他人贊作賦才雖千百言亦寫不到

劍閣

宋玉狂言亦快哉。果然長劍削天開。泉聲獨引雷車落。峯影雙扶日馭回。壯士枉窮排嶂力。大文終重勒銘才。中原龍虎無消歇。日見關門駟馬來。

過居庸

大行東驚正迴環。界截煙雲是此間。九土橫分雄地軸。三邊總會扼天關。羽書報捷風雷迅。戍卒承平虎豹閒。此去漢南皆枕席。馬蹄思踏賀蘭山。

登蓬萊閣

檻底滄溟浸太空。凌乘如到蕊珠宮。波間萬怪時噓氣。天外三山日御風。術士妄尋焉得遇。詩翁偶禱竟能通。良宵會約羣仙醉。待看重輪徹地紅。三語寫海市可見。四語寫神山難到也。下聯分承海市神山。卻用顛倒承之。化板爲活。術士指文成五利。詩翁指東坡。

書周遇吉傳

爲擾潼關突薊邱。大同搏戰鬼神愁。辭家戰士無旋踵。報國將軍有斷頭。致死已摧狂孽勢。迎降眞恨賊臣謀。十三陵末餘抔土。千古忠魂哭未休。寧武破時。賊兵傷幾過半。李自成謂自此至京。尚有險要四關。應降表相次至。賊遂直破京師。詩中三四表周將軍五六恨二賊臣也。如許發揮。不啻披閱史傳。

與張支百研江話詩隨筆

李杜橫馳翰墨場。如椽韓筆頗相當。數篇琴操尤高躅。束皙何因便補亡。束皙補亡。前人議其去雅音甚拘幽一操。眞能道止敬心事。補亡六章中殊未有也。此種論詩具有確見。

俞

荔字碩卿。福建莆田人。雍正甲辰進士。官長寧知縣。碩卿居官清正。以失上官意。落職到家後。杜門自守。築堂曰迂溪。猶柳子自愚而并愚其溪也。

迂溪草堂初成

何妨環堵卽爲宮。適趣依稀粟里同。不速到門惟夜月。無私惠我有春風。是非難染溪邊石。得失奚關塞上翁。閉戶領來清淨福。卻忘身在萬山中。三四有風浴。咏歸之趣。

張鵬

字天驥。江南嘉定人。雍正丁未進士。官至詹事府詹事。著有南華詩集。○南華天才敏捷。賦雁字詩。日未午。成七言律三十章。賽和御製。頃刻數篇。○上褒美賞。賽之。有經進詩。上時轉。

次其韻。比太白之君為調羹。東坡之金蓮燭。送歸院。遇尤榮也。後更喝韻成詩。捷于擊鉢。然風格亦少減矣。工畫。捷同于詩。生平事事洒落。人目為漆園散仙。竊自喜。中道殞謝。九重惋惜。歎才人之不易得也。卷帙甚富。茲錄進呈法戒詩十餘篇。近體略及。

經史法戒詩

夏造衰兮殷道興。得賢臣兮作股肱。股肱辛勤親五就。故主荒淫終莫救。歲苦旱兮殫憂心。躬為犧兮祀桑林。苞苴女謁備自責。禱辭未畢傾甘霖。至誠感神信如此。天道祇如人道邇。一夫失所真宰愁。莫令君門懸萬里。此法保民自責。至誠格天也。

成康既遠王道微。昭既南征兮穆又西馳。騁八駿於萬里。觴王母之瑤池。事雖荒而難信兮。徵祈招之風詩。神仙不可期。遠略難為續。至尊居九重。王度式金玉。此戒肆心荒遠也。

春秋見至隱。履霜防忽微。人主不早慮。因之致顛危。前有讒不見。後有賊不知。晉獻惑嬖妾。優施教驪姬。分明置堇毒。乃謂愛我為。卒至兩敗傷。智謀亦何施。覆轍示深鑑。足為後事師。此戒信讒人重內寵也。

天王柄下移。征伐強侯出。伯業亦寢衰。陪臣勢無匹。強私家。弱公室。三桓六卿互分析。豈無衣六與七。不

如子衣安且吉。壞法亂紀自王朝。史書特繼春秋筆。此戒政柄下移也。周盤王封武公為晉君。威烈王封魏斯。趙籍。韓虔為諸侯。此王朝壞法亂紀之甚者。故表之。

國有謀臣鄰寢覺。貪人敗類乘僥倖。秦穆悔過著聖經。皤皤黃髮實邦榮。入朝見嫉入宮妒。殃及黎民終弗寤。善善不用笑郭公。仁賢雖在國虛空。此法秦穆之悔過任賢戒郭公之善善不用也。兼法與戒言之。

漢高大度膺神器。弘遠規模傳世世。恭儉尤稱文帝賢。身衣浣濯爲民先。年年禱祀祈民福。鄭重農功珍五穀。但令閭閻常富足。國家何用儲金玉。此法恭儉重民食也。

神仙有無何恍惚。黃帝廣成但傳說。秦皇漢武慕長生。方士怪迂始百出。安期盧敖去不來。文成五利徒喧豗。神君未下鬼先集。世上烏有神仙哉。蓬萊可望不可卽。但願人人足衣食。昇平樂過華胥國。此戒求仙也。

六經燼後羅殘缺。博士儒生集羣說。欲施仁義法唐虞。及事神仙亟征伐。天馬徠時海內虛。窮兵黷武竟何如。當年幸下輪臺詔。後世猶傳封禪書。此戒黷武也。

近小人。遠君子。桓靈之衰只繇此。跋扈纔誅任宦官。一時鈞黨盡摧殘。俊蔚顧及空標榜。白馬清流釀禍端。士氣衰。國運否。人才與國相終始。千古興亡鑒青史。此戒視佞遠賢。鋤正人。珍邦國也。

治安共說梁天監。南北通和救塗炭。金甌無缺侈心生。白馬青絲輕納叛。薄心腸。激成變。果致紛紜滋反間。捨身同泰會無遮。血食牲怪改爲麪。貪嗔至竟未能除。荷荷空悲淨居殿。此戒佞佛無益。祇速禍也。

閱武堂前種楊柳。至尊屠肉潘妃酒。祇愛蓮花步步生。曾知國步艱難否。百年南北擅風流。誰信無愁果有愁。纔見荒宮餘辱井。又看芳苑起迷樓。阿麼詎惜好頭顱。瓊花只戀須臾景。解道真仙也自迷。不知狂

魄何年醒此戒色荒也齊陳隋一轍故合言之

臨淄英武摧羣凶。美政開元繼太宗。臺閣名臣刺州郡。人情和洽多年豐。歷年既多心漸侈。國事無端寄

楊李。長安一騎荔支紅。萬姓那知作瘡痍。漁陽鼙鼓太無情。入蜀青驛辛苦行。誰將夜雨淋鈴曲。更作朝

元奏樂聲。此戒荒以後任姦邪寵女謁也

宋家累葉垂遺澤。求治賢君方側席。天津橋上聽啼鶯。禍亂將興任安石。相公新法執持堅。祖制詎難胥

變易。忠良屏黜奸邪升。朝局如碁互廢興。千古知人誠不易。那論福建誤金陵。此戒變祖法。用言利臣也。○做西涯樂府而略變音

節自成一格共五十三章茲存其尤者

有所思行

落花紛紛如雪積。明月皎皎如霜鋪。攬衣步月躡花影。悄然孤館空庭隅。沉思欲寐不能寐。明月燭牀花

滿被。客遊花月故園心。廬山高。高湘水深。遠書欲寄空沉吟。虛寫所思。意言不盡。

長沙

碧湘門外渺寒波。欲采芙蓉奈晚何。今夜黃陵廟前月。茜裙誰唱竹枝歌。神似何信陽。

曹

鑾字玉如廣西全州人。雍正丁未進士。

苦水舖今名甜水舖

苦水舖神仙過。留筒布古斷頭掉尾。今無人。五尺之童穩行路。載重貨。輕身過。苦水舖爲甜水舖。斷頭掉尾四字

寫盡從前弊惡。竟可作古謠諺讀。

劉青芝

字華嶽。河南襄城人。雍正丁未進士官翰林院檢討。

寄李侍御

驄馬乘來四載餘。京華處處避旛旗。飽聞聖主求言詔。未見諸臣諫獵書。豈是陽城方簡默。不勞永叔代

躊躇。老生局外多私計。勿使吾曹望或虛。

古道照人。昌黎廬陵復見矣。李侍御能如元宗希文與否。

吳履泰

字茹原。福建晉江人。雍正庚戌進士官翰林院侍讀學士。○我師立言致行。一歸誠實。初謁見時。問以持己立朝之道。曰。端本原。無私心而已。卽此訓言。終身行之。不盡者也。讀韻語二

章。可以想見其爲人。

讀書一章示諸童子

讀書無源委。有如斷港流。濡潤涸蹄間。不能溉田疇。驕陽涸原澤。能有點滴不。苟能探其要。河漢當清秋。倒注屈千里。中有萬斛舟。六籍開其源。羣史決其溝。精華吸百氏。下逮騷人儔。元元復本本。千載窮冥搜。以此負文雄。氣盛言畢浮。奈何末學徒。顛倒不自尤。童卯髮未燥。猥以詞賦投。譌音復舛韻。殼殼聲啾啾。小年資弄舌。學語成伊嚶。問以經史事。茫然張兩眸。俗學吁可嗟。舉世多謬悠。古人誦亡書。三篋探諸喉。吾歌爲此詩。非敢相嘲咻。持告爾小子。庶以鑒前脩。詞賦惟獵浮華。元元本本。總歸經史也。近人只守干祿時文。并置詞賦不問。恐卽以騷選亦茫然。只張兩

眸矣。前輩為後生言語。語樸實。可以揭之座右。

蠶

八繭稱佳種。三眠貴早成。豈因能補袞。不自愛餘生。縈裹真何益。纏繇適見烹。繰絲悲老婦。索索紡車鳴。
事君致身於織小題。傳出得杜陵之遺矣。

曹一士字門所。江蘇上海人。雍正庚戌進士。官兵科給事中。○諤廷諸生時名滿大江南。北既為黃

隨俗時露奇警。

擬古

曠野張異樂。如在洞庭旁。元氣裹六極。太音彌八荒。不顧世上耳。安能主故常。聽者惑且駭。充耳神茫茫。焉得萬里風。吹送來帝鄉。一奏四時理。再奏百族康。
未遇時自命何等宜。立朝風節嶽嶽不凡。

鸚鵡

飄零綠羽向秋陰。風雨時能惠好音。老去詩篇多錯落。閒來佛語費沉吟。十年廡下高人跡。萬里秦山故國心。惆悵雲霄空有志。病軀擬共息長林。
頸聯傳出高人踪跡。高人心事從來詠鸚鵡者未見及此。

聽彈塞上鴻

龍沙漠漠草荒荒。嘹唳冰絃落雁王。作陣陰山呼伴侶。離羣葱嶺入微茫。欲彈閨閣刀鏃淚。可寄關山錦

字行聽到一聲邊月白。受降城上有新霜。

馬樸臣字相如江南桐城人雍正壬子舉人官中書舍人

漁

自把長竿後。生涯逐水涯。尺鱗堪易酒。一葉便爲家。曬網炊烟起。停舟月影斜。不爭魚得失。只愛傍桃花。

七夕

何關人事說年年。此夕銀河分外妍。閑對半灣無主月。癡看一片有情天。別離隔歲仙難免。飄泊經秋客可憐。忙煞隣家小兒女。喁喁乞巧不成眠。句句是客中七夕。別離感隱然言外。

秦淮水閣醉題

一杯清酌獨婆娑。笑倚朱欄對碧波。月影分明三李白。水光蕩漾百東坡。愁來天外鴈飛遠。秋到人間客占多。我自胸中有憂樂。阿誰吹笛夜深歌。三李白百東坡此種對偶何減元遺山秋風客春夢婆句。

張映斗字雲子浙江烏程人雍正癸丑進士官翰林院編修

咸陽

河山百二西南抱。終南山色開堂奧。西周豐鎬陷戎塵。秦得咸陽廓新造。當時一劍掃六雄。焚棄圖書絕蒐討。鞭笞四海震匈奴。皇功帝德彌穹昊。傳世從茲憶萬年。國祚何煩子孫保。沙邱一夕鮑魚腥。東海神

仙竟杳渺中原逐鹿莽狐虵孺子堪憐出軹道咸陽宮殿久榛蕪豈待今時跡如掃千秋龜鑑示興亡仁義從來爲國寶

張一鳴字鳳舉江南長洲人雍正乙卯舉人著有樂圃詩鈔○鳳舉受知張清恪公清恪被誣幾蹈不測鳳舉躡險尾行士林重之生平好義多類此所著條上張撫飭吏議十則箋注杜樊川

集若干卷詩其餘事云

過詩人家永夫墓

天意篤之子使之長賤貧賤貧滿世間若個稱詩人詩人葬空山抔土亦有神山鬼穿幽篁入夜常相親千秋此巖阿永永棲吟魂采菊爲君薦聊此同清芬惟長賤貧故得成詩人是天之厄之正所以篤之也然賤貧滿世間而一人獨稱詩人此又永夫之不負

天別於滿世間之賤貧者也立意既高筆復錫折不使人一覽易盡

登金山

萬頃驚濤孤岫懸登臨身世兩茫然飛樓倒瞰真無地危磴高盤別有天白下朱方頻戰伐吳頭楚尾總雲煙晚來擬放江心棹欲試中冷第一泉自注泉在江心石簾側月夜起沫始可沉銅瓶汲之○是登金山詩移不得大孤小孤等處

歸鴉

稻梁計拙海田荒薄暮哀鳴去路長欲覓一枝何處所滿天風雪漫回翔作者留滯長安欲歸無計比擬歸鴉直覺百端交集

王時翔字臯謨江南太倉人以諸生薦舉官至成都太守著有小山詩鈔○小山初爲晉江令前令尙擊斷人皆股栗小山曰此吾赤子敢以盜賊視乎自是歷任守此心外嚴內寬一歸仁厚

所謂經術飭吏治者也。詩能從情性中出。往往清絕。

于忠肅公墓

北狩倉皇日。孫申爲鄭謀。變疑鸚鵡識。冤起鷺鷥謳。社稷功千載。湖山土一抔。嗟哉徐石輩。青史祇遺羞。
鸚鵡識以昭定兄弟之變。比英宗。鄭王也。于公被禍後。時民謠云。鸚鵡冰上走。何處覓魚。噉魚噉音同于謙。蓋鳴其冤也。以此屬對。工而能切。

贈金東塘

五字隨州擅。君家許問津。自逢彈古調。不敢薄今人。楓影寒孤榻。鐘聲淨六塵。隱居兼德耀。酬唱共忘貧。
東塘詩長於五言。以清勝人。篇中正賞其清也。酬亦能詩。故有末二語。

過戴高士南枝舊寓

短簿祠前路。遺民寄旅魂。誰憐晞髮叟。未葬白雲村。
南枝嘗備書葬。徐侯齋先生而已。之遺棺未葬。宜小山感慨係之。

寄范聲佩進士都門

我占湖濱一釣竿。相思有夢到長安。美人何處碧雲合。欲贈芙蓉江水寒。
遠韻。遠韻。

賽音布。字九如。滿洲人。

贈吳四師牧

少小負奇氣。長爲邊塞遊。合圍秋射虎。聚讌夜椎牛。幾奪匈奴幟。曾分天漢憂。卽今年七十。不肯解吳鉤。

杜曉峯出塞

龍庭余舊到，送子淚沾衣。風定樹猶怒，日高霜正飛。嘯陰山鬼過，叫月野駝歸。常使心魂感，還家夢亦稀。

邊庭詩，每多擬作。九如身歷其境，故於贈送人出塞尤能傳出沙漠之苦。軍中之豪，幾欲與崔司助岑嘉州比埒。

劉廷璣

字玉衡，遼陽人。官至江南淮徐道，著有葛莊詩鈔。

折楊柳歌辭

含泪送君行，送君到南浦。楊柳最無情，不知離別苦。折取煙中枝，千絲與萬絲。人從此時去，卻向何時歸。有言未盡中心曲，長條難繫斑駁足。望中不見遠行人，河橋搖曳傷心綠。詩亦以搖曳取神。

晚投村莊

白草荒烟澹，蒼山古道斜。雁將天作路，雀以樹為家。日暮樵歌返，秋成社鼓撾。村民性淳朴，留客話桑麻。

頗能造句。

題韓王故里

釣魚城下餓王孫，一旦登壇九命尊。進飯不忘猶報德，解衣常念肯孤恩。仰天若挈陳豨臂，相背應聽蒯徹言。隆準也同烏喙忌，功臣千古共銜冤。明淮陰之反，即於本傳中辨之。比弇州牧齋二作較勝。

徹言隆準也同烏喙忌。功臣千古共銜冤。明淮陰之反，即於本傳中辨之。比弇州牧齋二作較勝。

蔣錫震

字契潛，江南宜興人。著有清溪偶存。契潛少參洞中呼崖和尚，後歸儒。師諸同人先生。學古文，制舉業非所好也。喜探奇嘗獨經董山下，聞上有孫皓國碑，日已沒，步山樵觀之夜半。

抵家其好奇可知矣。詩亦有奇氣惜不多見。

梅花

竹屋圍深雪。林間無路通。暗香留不住。多事是春風。

冬夜宿野人家。牀無幃幕。屋破而多風。取積草障之。乃戲曰：此汝家草屏風也。索句遂題。

不藉簾籥自作。避風應笑肉爲屏。似渠雅製誰宜稱。合號乾坤一草亭。使俗事能雅。便是能手。

徐

夔字龍友。江南長洲人。廩生。著有西堂集。○龍友負才高俊。讀書一二遍。終身不忘也。與予結詩。課時。專學昌黎。芒角四露。之廣南學。幕後醉心義山。謂以男女會合。喻君臣事。使得風騷。

宗旨。格律。又一變矣。年五十。歿於廣南。楓歸。廣南詩散失。茲所收者。皆向年朋舊論文時作。讀其詩。猶見其尊酒澆胸。氣概也。○注義山詩。與朱長孺注。互有異同。與惠定宇棟注。王漁洋精華錄。

已經行世。

移居贈永夫

吾友永夫古狷者。不義予之弗受也。十年臥病時掩關。戶外紛紛看野馬。當年側身五塢山。予亦結廬山之下。已畦先生盛生徒。擯斥僞體親風雅。時予年纔十六七。不克升堂聽誠夏。韓門磊落多奇才。鏐鐵銀鏤盡。鑪冶永夫之詩比昌谷。永夫之窮過東野。先生曰。吁。子來前。有粟可分館。可假朱門時。亦饋梁肉。掉頭不應如聾啞。龍蛇道厄先生殂。侯芭有淚時傾瀉。幾年漂泊東西游。到處逢人皆竊罵。爾我重訂雲龍交。歲惟作噩月當且。新知落落無幾人。略如陶謝結白社。鯀溪沈子筆最奇。手掣神光乞紺闥。葑田吳郎

多態度。婀娜欲弄河間姁。永夫出語必驚人。鏤脇穿心慎揮洒。自鄗以下皆無譏。兒子紛紛鄙紈袴。一日對我頻縐眉。鄰家老婦顏如赭。惟鵲有巢鳩居之。依舊淹留無片瓦。入門家徒四壁立。短衣往往不掩踝。孺子黑瘦弟凍皴。新詩盈帙欣可把。近來又復學古澹。刻玉作鈎改作鏹。囑我試作移居詩。萬壑冰壺雜土苴。永夫永夫。敝君生平有如此。嗚呼吾意其誰寫。生平誦法昌黎而此章尤神似寄玉川先生作蓋永夫之怪奇寒餓原與玉川類也此種筆墨吾黨中恐無第二手。

苦熱

衆星夜出如張羅。更深月黑天無河。梧桐無聲竹森立。毒霧著體心煩苛。吾吳自昔稱澤國。襟帶江海中盤渦。時當朱明司夏政。綠楊匝地清風過。晚涼理榜入浦激。鳧雁飛起穿菱荷。搗來炎官執柄令。赫赫火織高嵯峨。蝮蛇雄虺醢人骨。磨牙螫尾餘么麼。蝦蟇鼃黽固同類。洒灰不禁其如何。日輪當午照下土。操鞭弭節非義和。雷師無權阿香死。造化誰爲司天戈。舊時靈雨不復作。坐見舉國來奔波。吾聞堯時十日出。草木焦卷同蓬科。彎弓射鳥墮羽翼。此事荒遠疑傳譌。天心仁愛古所著。茅茨土簋知無佗。方今泰階四時序。陽侯何事收滂沱。中田無雲日杲杲。春可無麥秋無禾。珠簾冰簟正愁絕。何況賤子嬰沉疴。安得白雨洒秋令。擊壤一和陶唐歌。炎官執柄以下恣肆言之。軒然起大波不使人一覽易盡。

蔡將軍歌

序有

將軍諱人龍。吳縣人。明天啓壬戌進士。授潯州守備。平猺。力戰死。子至中。率死士入賊巢。獲父屍。執劇賊歸。猺人散走。潯州平。詔贈遊擊將軍。

潯江萬重山。門戶爭一峽。賊兵巢其中。出沒狡獪捷。將軍慷慨真人雄。南入百粵西擒戎。有子驍勇如奉叔。前身應是周盤龍。均房山斷無鈎梯。三軍前行路欲迷。大星昨夜隕如火。黃雲闔闔天爲低。豺狼轉多路轉惡。將軍勇氣十倍作。左右盤空擣寶刀。頭顱滿地馳風飄。深林密箐伐鼓急。戰馬悲鳴軍吏泣。仰天拔劍振臂呼。血濺蒼穹據鞍立。長君年少忠勇俱。義激諸軍馳百夫。背負髑髏血模糊。深入賊巢執其俘。咸陽一炬狐兔盡。大藤險惡今坦途。男兒要自獲死所。慘澹陰風足千古。卞壺握爪誰其儔。溫序銜鬚此可數。軍前將士手口瘡。隴上歌成血淚枯。矢窮兵盡無時無。如公父子真丈夫。嗚呼。如公父子真丈夫。平潯州者將軍子至中。入手先伏有子驍勇如奉叔二語。下深入賊巢不嫌突如此。文章家倒插法。中寫將軍義勇如子璋。髑髏血模糊可以愈瘡。

觀秦丞相李斯鄒嶧山碑

碑在鄒縣治之右。宋元祐間。縣令張重摹上石。無識其字者。予爲書一通付胥吏。

魚膏燈滅銀鴈飛。荒陵火入化寶衣。輻涼骨臭已千載。何況金石埋烟霏。嶧山之碑野火燎。棗木傳刻形摹肥。誰爲伐石矗立此。大書深刻高巍巍。細觀似同騎省本。相斯刀筆存依稀。我來下馬坐其側。以指畫肚窮是非。蛟鼉斫斷口難讀。無異石鼓驅駢駢。訟庭清寂了無事。二三老吏閒倚扉。見我口誦竊相語。授

以紙筆立周圍。爲書一通導之讀。得所未見驚且歎。當年祖龍踞周鼎。翦除六國如驅豨。井田封建蕩滅盡。剗削仁義爲不禮。相斯佐之更新法。鑿深督責唯刑威。東行郡縣上鄒嶧。鑄劔崖石昭日暉。丞相臣斯臣去疾。咸昧死請無從違。其辭直欲邁三五。讒諂面諛紫亂緋。嗚呼。夏殷周禮至此極。千古覆轍堪悲諷。方今廟堂慎旌別。登崇俊良絕脂韋。淫朋比德豈宜有。盍不去此玷翠微。請刻豳風之七月。使彼長吏朝夕知民依。暴君虐政。姦相手書。本不足貴。况又宋代翻刻耶。欲剗除之。而更立豳風七月之詩。光明正大。昭如日星。

登北極閣

傑閣高空近玉京。凭欄一望起秋聲。龍蟠虎踞輿王地。白石清江過客情。豈有占星周內史。更無繇繇魯諸生。由來陵谷隨時異。滿目寒雲下古城。閣係前朝觀星處。下爲國子監彝倫堂。故五六語及之。

聞笛有憶

江月光盈江水深。江干忽聽老龍吟。誰將清夜桓伊笛。吹入山陽向秀心。回樂峯頭胡地管。洞庭波上楚人砧。天涯一種秋聲急。雪滿江南孤客簪。格高音亮。頸聯乃推開旁襯。結意一并收拾黏滯者不解此法。

秦淮雜詩

半山堂屋草萋迷。介甫聲華認舊蹊。欲紀元豐天子聖。天津橋上杜鵑啼。哲宗元豐紀年。係宣仁太后秉政。其時君子滿朝。自宣仁崩。改元紹聖。羣小以紹述爲辭。而賊虐正士。挑釁金人。至於南渡矣。所紹述者。王安石之新政也。詩中意在顯微之間。此種用筆。最近唐人。

鄭

文章季雅江南長洲人○季雅少年詩以日籬桃花米五升秋聲只在豆花棚得名猶徐昌穀

之有吳人狂鄭生獨狷吳人詩靡鄭生獨剛之語蔣文肅亦奇其才然不欲因此求進其品亦有可觀

擾龍松歌

昔聞散花塢中片石峯。破石孕出千丈之奇松。今觀非松又非石。但見虬枝夭矯向空立。得非竇子明。汶陽放釣來相迎。又疑軒轅帝。拔髯飛騰在雲際。上有鐵幹五鬣長。絕似爪角森森張。下有溜雨霜皮在。鱗甲斑斑色五彩。我欲繫之雙赤緇。雲霧晦冥恐遁逃。凜冽千年遺積雪。慘澹六月聞寒濤。吁嗟乎。秦封大夫寧勝此。何爲偃蹇深山裏。一朝絕壑雷雨起。看爾東行入海水。松在黃山之始信峯。即所云帝松也。今爲鄰郡人盜伐。東行入海。其信然耶。

夜光木歌

我聞拘彌之國有變晝之草。豈知興州直北灤河東。更見夜光之木生蓬葆。野人剛得盤曲形。皮膜剝盡肌瓏玲。黃昏扃戶置牀側。煜爚幽燄騰寒廳。初疑唐居士。翦紙貼壁弄奇詭。又疑佛圖澄。敗絮塞孔照耀同明燈。髣髴鬢社湖中見。神蚌吐珠映水面。得非放螢苑裏遊。冷氣射骨涼颼颼。短檠牆角真可棄。攤卷還能辨細字。駮童刀削玉瑣碎。燐火熒熒忽滿地。吁嗟爾木上稟太陰精。燭龍之所不棲。羲和之所不及。乃是萬古積雪千年老冰凝結成。是以白日韜晦。宵暗晶明。若非周王八駿張騫槎。誰復遇之震且驚。爾胡不學天祿杖。劉向閣中伴書幌。爾胡不學牛渚犀。驅逐鬼怪清鯨鯢。徒然潛伏窮荒外。叢棘柔藤森翳

蒼鳴呼世間萬物得地方榮滋。豈獨爾木歎息不逢時。騰擲奇恣凡夜中有光者無弗臚列不嫌複不嫌盡也結意幾令抱材不遇者同然慨息

寒蟬

衰柳古池陰寒蟬咽復吟。近兼風裏葉遠帶月中砧。但覺露堪飲忽驚秋已深。白頭潘騎省爲爾不勝簪。

句旬有寒意不
同泛然咏蟬

劉震

字東郊江南長洲人○東郊一布衣傾動公侯匪獨才分之高由胸襟潔白不爲名利動也詩英氣逼人如芙蓉出匣晚歲惑於欺人者之說謂詩必不循繩尺衆人共駭乃佳自後隴然放筆迥如二手矣予所錄者俱中年作一存吾友之真

易水歌

田光一死今古難。荆軻入秦髮衝冠。倉黃當日繞柱走。踞坐笑語神猶完。殘忍慘刻賈人子。以信服物非齊桓。奈何輕欲學曹沫。可憐易水千秋寒。高漸離。矐其目。人擊劍。我擊筑。報仇更比漆身苦。兩人後先得死所。血隨易水流不止。荆高至今猶未死。君不見鮑魚之臭不可聞。戊卒一叫驪山焚。生劫之誤劍術之疎荆軻固不能辭

而能奪祖龍之魄與高漸離俱凜凜有生氣也讀至末幅真覺一字一快

畫鷹

李君知我善苦吟。圖畫示我開胸襟。芳春爛漫忽如掃。悄然動我三秋心。陰森一樹龍夭矯。尺寸行間千尺杳。千尺高柯立鷲鳥。筆洗秋空天色老。霜翎如劍自無敵。集者欲飛飛者擊。庭中花木雀倒窺。過眼一

飛如箭激。男兒意氣敵萬人。安能刺促老此身。一起無力。以下霜風滿紙。所謂寫此神駿姿。充君眼中物也。

固關道中

崎嶇天路仄。徑絕險摩空。直此盤迴上。何難霄漢通。陰晴山向背。苦樂轍西東。百二秦關接。重重控禹功。
起四語如生鐵鑄成。大歷後罕遇此等筆力。

祖龍

六國邱墟九宇恢。更張周典見雄才。駕臨東土崇臺構。宮壓南山複道開。祇見壁隨山鬼至。邨聞藥自海船來。阿房轉瞬繁華歇。卻與詩書共劫灰。
詩書雖焚。終不磨滅。阿房一炬。蕩爲冷灰矣。作者並論。猶爲恕辭。

望岱

玉檢金泥歷代傳。振衣千仞是何年。風吹一片青冥色。萬朶芙蓉落馬前。

峴山

當塗典午事紛紜。西蜀山川付暮雲。我到峴山無淚灑。秋風曾拜臥龍墳。
無人敢開此口。作者公正。可以想見。

吳承泰 字讓三。浙江烏程人。

山行柬周鍊師

蒼峯落日寒。萬壑秋聲起。白日逐雲歸。行人猶未已。
只二十字。可抵一篇山中晚行遊記。

張安紘字琴父浙江烏程人

送燕

節屆秋分社事忙。送君前路入蒼茫。年年不作無家別。半在他鄉半故鄉。言外感己之無家。

徐洪鈞字雙南江南宜興人。諸生。○雙南喜鈔書。經史子籍。詩賦駢語。會於心者。必手錄。出遊必載箱籠。以行。年六十。右體患拘攣。疾仍用左手書。勿輟也。詩意以沉著為主。品矣。本朝人詩。共

五十餘章。多平允者。

和昌黎秋懷詩

萬靈均有知。露零鶴自警。修士多感秋。日短志彌永。學道已苦遲。精進詎嫌猛。尋源有深淺。修短視我綆。耳目淨浮華。寧謐差可幸。會心正非遙。頓使煩慮屏。下一分功力。得一分道趣。百倍千倍。所得因之。所謂修短視我綆也。

書懷

讀書貴神解。無事守章句。混茫萬古心。每於故紙寓。憶昔就傅時。端受鹵莽誤。年來發深省。頗領此中趣。中夜每獨坐。睽睽燈火聚。到眼初茫然。思力未能赴。朗吟一再過。旨趣或流露。迴環三復餘。延緣得津路。此時萬籟寂。炯炯一心注。若距且若迎。迨爾忽來悟。頓令千載人。精魄宛相遇。掩書起推窗。皎月挂高樹。秦會之謂書快讀則無味。人能道著讀書趣也。篇中寫巽入工夫。語語心得。一結超然。妙在結出題外。

過梁溪

東風作意送歸艤。舟子吳歌盡短腔。一枕夢回天已曙。九龍峯影落篷窗。

卷二十八

朱奕恂

字恭季。江南長洲人。廩生。○恭季二十餘歲。詠懷詩落句云。男兒意氣原無恙。哭向窮途笑向天。抑塞磊落。乃爾。後學日進行日醇。遠近稱長者。四十後不復吟詩。謂於道未尊者也。茲所錄四章。皆壯歲時作。

擬古出塞

東裝赴青海。醉裏別鄉關。少婦識雄心。不復問刀環。笑彼馬伏波。猶戀裹屍還。埋身青塚側。陰雲黯天山。

極形義勇。翻盡白窠。

荷珠

小雨林塘淨碧羅。田田分得夜光多。江姝唾逐天風落。仙掌晴分曙月過。幸未贈來愁結佩。若爲采去誤凌波。蕩舟耶女休相妬。樂府虛裁一斛歌。刻劃已極。卻似未嘗刻畫者。然此詩品也。往時詩社中作。衆人傳寫。今稿中散失矣。予以舊所記憶存之。

秋日雜感

短蒨長歌二十年。不羈天地總翛然。監河賒許供江水。營室虛償貸聘錢。婦索短絙枯井畔。兒煨半芋敗罏邊。日高顏巷西風急。傲骨嶙峋萬仞巔。

五人墓

花市東頭俠骨香。斷碑和雨立寒塘。屠沽能碧千年血。松檜猶飛六月霜。翠石夜通金虎氣。荒邱晴貫斗牛芒。片帆落處塞清藻。幾伴歸鴉弔夕陽。不須徵實。自無浮響。

王景琦字韓起。江南江陰人。貢生。

詠淳化里

澆薄已成俗。淳風世所難。兒童知禮讓。父老重衣冠。耕稼惟同井。催科不用官。鄉邦能化此。便作上皇看。朴老得力於杜。

同錢青在夜飲賦此贈別

青鐙酒數巡。寒夜獨相親。以我無家客。逢君失路人。吟魂清遠道。堅骨鍊長貧。又逐征鴻去。輕車少住輪。唐人風度。

侯

銓字秉衡。江南嘉定人。廩生。○秉衡。太常諱震暘。曾孫國學諱岐。曾之孫。修髯長身。談及忠義。言箴規不失先世風。秉衡沒。同學中直諒者少矣。錄其詩。因追憶其風概如此。

南并晚鐘

聲喧百八起西冷。敲徹斜陽近翠屏。閒逐野雲停半壑。遠隨孤棹落前汀。六橋金粉人初散。十里鶯花夢

乍醒斷續聽來何處好。碧烟明月冷泉亭。妙在語語是晚鐘。粗心人不解辦此。

清明日作自注時鄉試報罷

連日陰寒乍放晴。愁邊不覺是清明。漫從榆柳分新火。枉向鶯花憶上京。得失已空蕉鹿夢。浮沉聊結鷺鷗盟。宵來盼斷松楸路。有淚無言對短檠。

蹉跎身世苦無惊。開遍來禽興轉慵。璞玉無言寧自炫。蛾眉已老爲誰容。餘光猶鑿鄰家壁。浪迹休嫌廡下春。安得故園營十畝。一犁烟雨傍吳淞。隔斷故園又傷漢落。懷鄉感舊情見乎詞。

送西京再至京師次西澗翁韻

才得言歸又欲行。黃梅雨過片帆輕。家庭兩月團圓話。客路三千去住情。梁穩香泥憐燕子。花飛柳陌怨鶯聲。匆匆便作臨河別。離緒無端觸處生。作客苦況。領聯道盡。

不寐

露滴寒蛩咽。風高枕簟涼。歸心憑短夢。一夜幾還鄉。

題桃花扇傳奇

青蓋黃旗事可羞。鍾山王氣水東流。滄桑眼底傷心淚。付與詞場麴部頭。賦此題者甚多。未免過於瑣屑。著筆滄桑。不黏兒女。故爲雅音。

胭脂井畔事如何。扇底桃花濺血多。長板橋頭尋舊跡。零香斷粉滿青莎。

葉舒璐字景鴻江南吳江人歲貢生著有分子詩鈔○已畦先生輩從皆能詩

孟夏同沈公倚昆季暨家弟姪輩泛舟登斗姥閣讌集劇談寓都門事帶月而還集杜三十六韻

我衰易傷感林甘憶昔少壯日垂老脫略小時輩壯遊人寰可超越畫行惆悵年半百立平生心已折地愁寂

意不愜李公賴有杯中物巴西但遇新少年水上老矣逢迎拙贈盧通家惟沈氏沈八早通交契密寄張同

姓古所敦孫濟嗣宗諸子姪示姪痛飲情相親寄薛入門高興發與李白招邀屢有期陪李交會未斷絕

喜今夏草木長懷述甘酸齊結實北四月熟黃梅雨薰風行應律暮春雲溪花澹澹次驪霽潭鱣發發題張

景從陪羣公在差池上舟楫白沙灘淺正相依陪王一邱藏曲折早隨喜給孤園望兜野寺江天豁游西

樓角凌風迥東仰穿龍蛇窟登慈恩築居仙縹緲贈陳得非玄圃裂奉先劉澤國繞回旋秋原野轉蕭

瑟留花恣意同遠步西枝力稀經樹歇九月進舟泛迴溪泛水深波浪闊夢李展席俯長流李公斑白居

上列後出勅廚倍常羞鄭典嘉蔬既不一日香芹碧潤羹陪鄭經齒冷於雪魏葉嗜酒益疎放故鄭劇談

憐野逸白斜暉轉樹腰絕涼風起天末懷李餘酣漱晚汀軍中飄蕭覺素髮義鶴時復問京華上軒冕

羅天闕贈奉常南宮吾故人別唐時來如宦達寄高文章實致身贈鮮于聲華當健筆故李嗟余竟軼軻

懷江湖漂短褐寄章雲泥相望懸送章不才甘朽質宴王歌長擊樽破扉回首肝肺熱鐵堂慷慨有餘悲

水歡樂會倏忽七此會共能幾送御舊遊易磨滅贈汝同人惜解攜水臨岐意頗切送李遲遲歸路賒入

水歡樂會倏忽七此會共能幾送御舊遊易磨滅贈汝同人惜解攜水臨岐意頗切送李遲遲歸路賒入

江城帶素月。聽楊氏歌。○集杜成古詩。前人未開此體。隨題段落。屈折迤邐。幾如無縫天衣。

讀杜白二集

子美千間廈。香山萬里裘。迥殊魏晉士。熟醉但身謀。拈出二公大節。知人論世。不當如是耶。

索得學山兄遺稿

忘年羣從絕追攀。入夢遺容想像間。秃筆纍纍猶作家。可堪埋骨欠青山。

南北馳驅客路長。依人空辦嫁衣忙。阿連自爲文章哭。豈特傷心舊雁行。首篇悲其未葬。次篇表其文章。而屬弟之誼。自在言下。

司馬相如

挑得琴心正倦遊。壚邊尙典鷓鴣裘。長門解爲他人賦。卻惹閨中怨白頭。

索人題照

鍼孔流光露電身。靈臺本合淨根塵。君能索我形骸外。翻覺廬山面目真。此不取形而取神也。七言斷句。都能翻空。回視死煞句內者。有

牀上下之分。

宋

樂字玉才。江南常熟人。廩生。○玉才少年多才。以嘔血卒。陳亦韓司成。囑予定其遺詩。七言絕尤工。向未鐫板。已散佚矣。祇存其能記憶者四章。

送別

別路風光早。江南芳草天。人心似春色。千里逐君船。

瀟湘曲

楓落早鴻過，洞庭無限波。相望終不見，只是白雲多。
意不必深，風神絕世。

答揚州喬子

病餘纏縛似春蠶，詩酒風情亦尙堪。日落離心滿揚子，知君江北望江南。
近劉賓客。

蘇臺柳枝詞

十里珠簾映碧流，絲絲金線拂船頭。閨門過去盤門路，一樹垂楊一畫樓。
又有句云：不如飛絮隨流水，化作浮萍箇箇圓。上言思婦之感。

別離也。失記全文。附錄於此。

鄭玉珩 字荆璞，江南江都人。著有止心樓詩。○荆璞大父，爲名侍御。晦中先生，文章諫草。著聲於時。荆璞述祖勵行詩，特餘事也。采取二章，矯矯拔俗。知留心此藝者久。

銅雀臺

露下金烏冷，風來玉座清。美人掩瑤瑟，獨對月華明。橫槩虛豪氣，分香感故情。西陵松柏響，猶似管絃聲。

微諷高於痛斥，是爲詩品。

渡江

鐵甕城高落日沉，秋濤滾滾起層陰。天教設險分南北，水識朝宗自古今。風急江狹吹白浪，月明烏鵲繞空林。千年銷盡英雄氣，留與吾儕擊楫吟。

葉永年字硯孫江甯上海人貢生官
贛榆訓導著有玉壺詩稿

虎邱山樓卽目

闔閩城南桑滿枝。闔閩城西柳絲絲。一百五日雨過候。二十四番春盡時。花妥眞孃曾入夢。月明山鬼亦題詩。何妨索取銀瓶酒。一醉前山短簿祠。不必奇警。風格自高。

燕

芹泥重葺舊巢新。記取年年及社辰。入幕不驚揮塵客。巡簷如喚卷簾人。鴛鴦樓外春如海。玳瑁梁間月似銀。閑向主家談故事。昭陽臺榭已凝塵。五六空寫一聯妙仍是不離李樊南時用此法。

方

還字冀朔廣東番禺人貢生著有靈洲詩集○冀朔爲九谷先生長子所學一本庭訓移家於吳倡詩教喜賓客四方詩人來吳者每登方氏廣歌堂賦詩讌飲稱一時之盛

舊邊詩九首

鐵嶺迢迢接錦川。關城三面繞烽烟。春深秣馬蒲河北。秋老連營木葉前。滄海舊聞通運舶。金州誰解議屯田。諸軍自失橫江險。白草黃沙暗朔天。

右遼東

北平雄鎮翼幽燕。千里潮河朔漠連。司馬高臺聞夜吹。盧龍古塞入秋烟。開疆競說分三衛。籌國何因棄外邊。歎息寧封南徙後。遂令烽火達甘泉。初以大寧爲外邊永樂中寧王內徙而薊始重內邊此失策之大者詩中暢言之

右薊州

萬全八驛接神京。上谷千年漢將營。地險旌旗藏殺氣。山盤鼓角壯軍聲。邊歌竟日來紅石。鐵騎中宵度赤城。誰識興寧殘廢後。漠南無計援開平。葉大寧後土木之變。又棄興和。則開平亦不能守。

右宣府

馬頭北去是雲中。極目川原處處通。繞鎮衛城分十五。沿邊都閫轄西東。自注。明初設山西行都司。管轄東西二路一十五衛。頽垣正接葫蘆海。月曠野長吹鷓鴣。風聞道頻年還調戍。諸臣何策建奇功。

右大同

三關平列勢逶迤。日落連城鼓角多。帳外深煙迷衆堡。營前孤月墜長河。赤山寒谷驚烽燧。青塚秋原入駱駝。誰使總戎移逸地。偏頭空曠牧人過。自注。嘉靖中。撫臣請移總兵於寧武。而偏頭一帶地皆空虛。

右山西

榆林四望黃沙際。千里迎墩絕塞天。夾道陳兵橫套口。長城環塹繞延川。徙邊御史籌無缺。自注。舊治綏德。成化間。都御史余子俊建議移鎮榆林內地。遂安折色司農計苟全。自注。弘治中。改延慶等府本鎮之稅為折色軍用。始嘗。此地從來多勇敢。莫教枵腹事鳴弦。

右榆林

鎮城西倚賀蘭開。滿目沙飛筆策哀。冰合黃河朝走馬。雲迷紅寺夜登臺。膏腴昔日稱蕃庶。蹂踐連年盡

草萊欲識金城舊方略。濬渠卽是靖邊才。自注：自陝西築爲邊牆，窪爲溝渠，修復秦漢故跡，邊城外固溝渠內深，以資灌溉，全陝之利也。

右寧夏

秋入平原動鼓鼙。弓鳴風勁塞雲低。漢家營壘沿山後。秦郡川原盡隴西。徵調頻年憂戍士。逃亡何計復蒸黎。徘徊險阻誰爲守。花馬池邊落日迷。固原爲八郡咽喉之地。虞詡守階州。招流亡。開漕道。羌人懼服。卽其地也。明代頗調臨鞏西鳳兵防守。芻糧在本軍額內支給。乖前人策矣。詩中見及之。

右固原

風急荒原落雁聲。西河霜氣逼嚴城。金笳幾處秋乘障。鐵馬連羣夜點兵。充國留屯沙際沒。嫖姚遺壘月中明。古來無限安邊策。哈密徒勞苦戰爭。丁酉秋。同人集廣歌堂賦舊邊詩。時家方舟。劉東郊。李客山。孫丕文。及予。諸人俱在。或成一二首。多者四五首。冀朔日纔亭午。已成全詩。又皆按切時勢。同人歎服。選中因全錄之。

右甘肅

鎮海樓

獨立危城城上樓。層層遙接大荒秋。三條江色來千里。四面山光盡十洲。東海雞鳴紅日擁。南溟鵬徙白雲流。試觀百粵聲名盛。離火文明貫斗牛。

少年行

不解陰符與六韜。似知名姓五陵豪。此身未識爲誰用。慷慨長歌看寶刀。傳出叢政荆軻心事。視不通名。姓粗豪甚。及繫馬高樓垂柳邊。

皆皮膚語耳。

方

朝字東華。廣東番禺人。國學生。著有勺湖集。

中宿峽

滄海雲際來。一瀉開地軸。嶽岑雙屏轉。塊軋森草木。仰窺流光短。益覺日晷速。乃知東南天。於此亦不足。鮫宮倚禪房。魚梁飲麋鹿。帝子去杳然。清光映江曲。維舟探遺蹤。雲旗想幽谷。起步突兀。東南天亦不足。此景此意。無人道過。

出峽

烟橫山根青。日落水面赤。孤村牛羊下。出峽景已夕。網罟歸澄潭。罨叢戀幽石。蒼然前林遠。江天月流碧。山水信足佳。其如在于役。

由臨川北道抵餘干山行五首

雞鳴發征夫。驅馬萬壑黑。仰觀參星橫。俯怯厓石昴。烽迴溪流轉。林密寒光逼。空山鳥吟悲。百里無人跡。安知叢莽中。不有猛獸匿。驚風吹客衣。佇立增太息。

寒泉瀉崇阿。絕壁開古道。暮投漁樵煙。朝拂谿澗藻。征雲遘微風。相隨越林表。出門聞雁聲。客舍非春草。江湖風波輕。夢寐問關杳。蒼茫問前途。下視見飛鳥。

炎暉焦林木。客子朝雨汗。側見垂蘿靜。四嶺雲氣斷。幽崖響淙潺。竹泉遠分灌。行行度谷口。黯淡驚雷電。馬頭風雲興。澗底蛟龍見。蒼黃顧僮僕。中道已失散。

出郭落月輝。涉澗山日晝。客行路紆迴。我影忽左右。懸猿嘯風枝。飛鳥來煙竇。回瞻寒潭口。瀟灑石泉溜。東臯苗尚青。溪南稻多秀。神明何施爲。物情自爲候。

山行宿常遲。白日忽已墜。美人在天末。明霞倩誰佩。總角事遠遊。夙昔臨東岱。中懷念舊丘。極目炎雲外。奈何來豫章。咫尺庾關在。明朝乃迴車。轉欲向吳會。

老莊告退。山水方滋。昔人以品謝公者。請移贈斯人。以品地風格。略近前賢也。未章已近庾嶺。未返南粵。

開先寺觀瀑布

客尋瀑布來。恰到雲歸處。層巒聳萬疊。懸雷空中注。白晝瀉銀潢。中天昭太素。逝者無終窮。千秋等朝暮。古寺枕寒澗。蒼崖噴長霧。蛟龍卜靈窟。形神洽幽趣。洗心視聽外。無言發清悟。

可參子在川上章。不止清言起悟。視東坡作境界又

三峽澗

宿昔夢龍門。茲晨越三峽。湍雷翻水花。林風墜霜葉。行人與飛鳥。邂逅忽相接。寺門蒼崖削。松臺紫雲疊。我欲窮源泉。於茲將遠涉。所恐觸潛虬。俯視爲氣懾。

碧落洞

日暮棹秋水。煙花滿江曲。翠壁何嵯峨。幽巖鑿山麓。我來縱遊觀。天風振樛木。其外不可攀。其內可以屋。洞底上迴磴。茲山乃空腹。石閣兩三層。蒼蓮根地軸。香烟老苔蘚。佛牀女蘿綠。老僧擊晚磬。寂寞共雲宿。

會稽吼山鑿山空腹人力既盡轉近天工洞底十字令我如遇舊遊

力田

躬耕習農時。豈敢稱高蹈。侯門不可干。聊以從吾好。方春理耒耜。隨時調水潦。布衣足掩形。茅檐頻洒掃。日暮耕者還。斗酒相歡勞。四運有常功。吾生復何校。

倉庚鳴桑林。喚我荷鋤子。雨澤一以降。耕作從茲始。黃犢分我勞。葛條繫我履。行行石梁畔。澗道多新水。草花紛芳菲。山光無表裏。乘閒偶流眄。木末春雲起。

胎原陶公起四語已到自然地位

春日自鄧尉移權支硎山中信宿

川原旣逶迤。我遊亦無定。甫別湖上峯。旋躡雲中磴。臨淵想修鱗。過寺聞清磬。漁樵相引接。水石交繚亘。野風吹春服。低徊發清興。林端斂斜陽。浦上輕雲暝。

月下自寒山還至蓮花峯下

西閣寒日沒。策杖尋松徑。歸鳥半在巢。山家煙火靜。清月流素輝。幽篁生虛聽。依然向來路。雲影飛無定。

欲逐樵人踪。盡識山中勝。行行見柴門。寒潭似清鏡。

大江吟

大江曲。山樹秋。天寒日暮。野鳥啁啾。中流激蕩。風瀏瀏。北兼漢沔。東下揚州。滄波浩瀚。誰能收。江上何所有。芙蓉北渚。葭菼中州。江中何所有。鯨魚鼓浪。天吳嬉遊。峨眉雪消。春水漲。瞿唐巴峽。猿啼幽。奔濤瞬息。千里瀉。雷霆憚。赫日月愁。思欲一濟無方舟。美人旌旆雲外浮。乍去乍來不我求。青鳥欲語意夷猶。天路險阻。懷靈脩。白日西馳不我留。長歌徙倚增離憂。末段緬雲路之阻長。歎蹇脩之未遇。正則遺音。耐人吟諷。

藐姑山

一角青天缺。孤峯補白雲。洞深泉自出。山險路難分。日月愁關鎖。風雷亂見聞。但令栖隱去。何必遇神君。

風雷亂見聞。深山中疑鬼神。真寫得出。予遊長常山。有風雷生絕壑。句然自視。覺平近矣。

落

偶爾逢時雨。延生過井欄。託根多在石。爲性不知寒。古洞封長滿。陰崖濕未乾。是誰留屐印。幽處久盤桓。
水流濕。水不知濕也。火就燥。火不知燥也。唯其性生也。性本寒。故不知寒。五字可以見道。

江夜有懷

風力捲雲霾。孤舟傍翠崖。江星動魚脊。山果落猿懷。旅夢灘聲斷。鄉心驛路乖。不知蓮社客。誰最念天涯。

江星二語字字生新。而山果落猿懷尤極自然。卻又無人寫到。或謂近賈長江。愚意轉覺過之。

清溪

清溪知幾曲。深處有樓臺。樹杪江帆去。門前潮水來。溫風丹荔熟。明月素馨開。童稚歌連袂。橋南浴始回。

峽口

峽口波濤壯。居人不滿村。衆山風落木。深洞月歸猿。水并星河瀉。雲兼石壁翻。千秋追帝子。如可夢精魂。

聽撫洞庭秋思曲

曾放扁舟泝楚天。清猿淚竹思凄然。廿年夢裏湘山月。今夜分明在七絃。只末句寫聽曲作法最工。

程

鳴字友聲。江南歙縣人。

論畫答王耕南

杜陵贈畫師。五日畫一水。意在落墨先。苦心究終始。前賢論惜墨。其意端在此。第云墨如金。祇取減省耳。王洽米襄陽。烟雲常滿紙。

學古希古心。不學古人面。荆關境在胸。揮灑付柔翰。規矩雖具陳。神明取能變。試看造化鑪。新機異昏旦。

而胡丹青家。刻舟以求劍。爲臨摹古人者更進一步。

顧我錡

字湘南。江南吳江人。廩生。○鄂文端任江蘇藩使時。古學試士。得五十三人。湘南爲冠。後舉博學鴻詞。文端奏請。若爲湘南設也。及詔下。而湘南歿矣。豐於才。尚於命。文端歎息彌襟。

趵突泉

泰山之水環山來。陰崖汨汨逝不迴。自注。源發於岱崖之陰。至渴馬崖始伏。陡然一落不復見。渴馬立壁空崔嵬。濟南城西

天下絕。珍珠金線交橫發。伏流到此倏復通。平地跳出三白龍。初疑風雨至。萬籟翻空波撼地。繼若驪宮

傾。珠璣瑟瑟騰光晶。雷奔箭激不可以逼視。天矯勢欲升天行。其旁有高樓縹緲如仙靈。流丹百仞映涯

涘。飛沫萬點噴蒼楹。揮手倚樓坐。對此可以傾醪醑。吾聞匡廬瀑。天紳倒挂雙峯麓。又聞太華頂。綠淨紅

酣池萬頃。未若茲水虛可驚。倒行逆出相喧爭。乘風我欲破空去。轉恐平地洪濤生。寫倒出數語。離奇天矯。有勢有聲。令讀者

如置身其間。

海山亭觀落日歌

羲和鞭日聲隆隆。朱輪丹轂雙碾空。塗窮猝入大瀛海。迴光倒燭深潭龍。海水忽湧沸。銀濤如屋相撞舂。

欲吞不吞吐不吐。但見萬里鎔紅銅。陽侯驚詫海若笑。幻出萬象真無窮。天矯一金蛇。獨臥洪波中。連蜷

鼻窕千萬丈。小虵蜿蜿來相從。熠然變火光。傾瀉玻璃宮。浮光照曜際窮髮。餘光溢出難爲容。飄飄海山

亭。結構當海衝。我來露頂坐其上。放眼頓覺開心胸。霞收景滅忽不見。皎皎玉鏡升天東。正寫落照旁寫餘光真能狀難

狀之象。

九日登縹緲峯

太湖湖水平如油。南臨吳興北常州。雲濤瀕洞千萬頃。天遣峭石支中流。奇峯羅列七十二。意象峯窅窮
雕鏤。青螺勢繇延。支聯脈綴相沉浮。就中一峯起。天半孤撐磔卓無朋仇。有如端拱坐清殿。奔走萬國朝
羣侯。置身峯巔斷塵土。縹緲雲煙裊孤柱。微波一曲辨荆溪。頑石數拳窺顧渚。未知大地竟安窮。但覺長
空浩無主。孤舟遠泛若停橈。斷雁低飛如鍛羽。是時秋空方泱寥。丹楓黃葉山之椒。彭澤把盞正采菊。中
山搖筆還題糕。我貧無物作重九。憑仗兩腳升青霄。指揮雲物作几案。呼叱鱗螭同兒曹。吳山簫鼓真一
笑。苦向平地誇登高。峯爲七十二峯最高。俯見荆溪道場山等處。然自下而上。無亭臺樹木。有登無頓。不
易造極也。作者浩氣孤行。豪慨直上。不負登高之目。未言吳山簫鼓。平地登高。真堪
笑。

周

遠字少逸。江
南吳縣人。

京師九日城南黑窰廠登高

愁思天涯九日晴。憑高閑望夕陽明。天清萬丈秋潭影。風急三關落木聲。雙闕參差連御苑。亂山合沓入
邊城。懸軍絕幕思飛將。聞道河西已厭兵。明後七子中。
最近滄溟。

朱厚章

字以載。江南崑山人。寓居嘉定。廩生。著有多師集。○以載長身鶴立。言論侃侃。嘗於座間見

人參錯書之。序長律俱工。已所錄無譌字。五官並用人也。徵博
學鴻詞。病卒。門下士金君昂午刻其集。行心喪禮。鄉邦並重之。

拜方正學祠

秋氣凜毛髮。祠門弔落暉。何人加白帽。大節在麻衣。草亂疑瓜蔓。庭空絕燕飛。景公遺廟近。化鶴並來歸。

寄答王千里

留滯通侯邸。真成客裏家。高門賀燕雀。華髮吐煙霞。逸士方三拜。才人溫八叉。知君懷故里。邱隴有梨花。

千里客微侯張氏廿年不歸作詩諷之猶古道交也

題清溪集

黃柳花飛撲醉巾。六朝滾滾馬頭塵。也知李嶠真才子。可但江淹是恨人。澹粉輕煙疑在眼。珠簾甲帳最傷神。倩誰譜入參差玉。訴與無情古月輪。

九日登東城寄南華

蒼煙影裏獨憑高。瑟瑟寒生薜荔袍。我願滿頭常插菊。天生左手爲持螯。雲隨暮鳥歸村樹。風捲秋鐘撼海濤。佳節一杯桑落酒。故人何處鬪詩豪。

歲暮雜詩

吳氓殫力辦租庸。霖潦深秋駭老農。信有檜巢師鳥雀。盡拋穉稔象魚龍。漫空水氣難爲雪。照野陽威未化淞。聞道中丞能入告。便令寒谷轉春容。

雍正丙午七月連雨至明春始晴禾稼不堪問矣。額聯寫景紀實中丞入告而曰聞道詩人婉諷之詞。

秦淮絕句

風花無力撲簾波。佳節偏從客裏過。聽說兒童挑薺菜。青青只有故宮多。

觀柳河東初訪半野堂小像

藤蕪脈脈柳疎疎。想見文君放誕初。誰識秋風搖落後。獨將一死報尙書。詞婉意微。當於言外領取。○隴蕪河東君小字。

謝芳連字皆人。江南宜興人。國學生。著有香祖詩。○皆人工短篇。品地在色。香臭味之外。新月在天。殘雪在地。可以想象其詩。

月夜汲中冷泉

新月泉上出。江華照衣冷。扁舟蕩秋槳。汲取波中影。昨與山僧期。煮月翻瓦鼎。

孟夏山中晚坐

孟夏變物候。景仄風光稀。石林湛雨氣。山月連陽暉。鳥語遍幽澗。人聲隔翠微。彈琴遲漁者。衣上落英飛。

溪邨早起卽事同邵八丈子湘

早起杏花白。飯牛人出門。野田多傍水。深柳自爲村。比屋盡耕稼。服疇皆弟昆。爨煙猶未散。林鳥亂朝暾。

妙在絕不用力。惟不用力。人不易到。

宿山園

小雨松逕寒。人歸夜深火。宿鳥栖未安。驚飛落山果。輞川外又開一境。

密雪望行人

人行犬寒吠。密雪迷村影。欲扣酒家扉。山橋一蓑冷。山橋五字入畫。

題李百藥三十六湖草堂

釣罷歸來解釣筒。題詩燈火夜深紅。湖村犬吠人眠盡。商女棹歌煙月中。

孫

字量如江南桐城人國學生。

過倪雲林祠

玉山池館已荒煙。清闕祠堂尙儼然。破產放情多難日。無家投老太平年。碧梧修竹騷人節。遠岫平林水墨仙。應與所南同俎豆。遺民心事畫中傳。自注。雲林山水不畫人。所南畫蘭不著土。兩公宜並祀一堂。○三語指元時。四語指易代時。下半人品畫品俱見。

黃侍中祠

金川萬騎蹴煙塵。叩馬難將大義陳。妻女一時同殉節。君臣千古有完人。魂歸羅刹江聲壯。碑照秦淮血影新。咫尺孝陵松柏路。夜深風雨走青燐。

吳學濂

字曦洲江南休寧人浙江仁和县籍諸生著有香雪堂詩。

送梅藕長令浙東

廿年臥對敬亭雲。名士如君始是真。太白樂章驚賀監。微之辭句誦宮人。素衣不受緇塵化。墨綬偏膺白髮新。山水永嘉堪眺覽。謝公遺跡未湮淪。

楊椒山公祠

祠宇重新古驛旁。姓名猶覺滿城香。五姦已褫權臣魄。一疏堪爭烈日光。謝卻蚶蚶真有膽。撐將鐵骨不隨楊。階前請鑄分宜像。斫地行人共激昂。滿城香不隨楊皆椒山朝審詩中字也。未用岳墓鑄秦檜像事。

劉正誼

字戒謀浙江山陰人。著有宛委山人詩集。

自笑

自笑情何僻。謀生竟未能。鬻田買古硯。貸米給詩僧。花月耽成癖。禽魚狎似朋。室人交譎我。婦語不須臾。

想見雅人風趣。僻士襟懷。

訪毛西河太史留贈

充棟書成自不刊。頻年握槩暑兼寒。魯魚舛後多釐正。秦火焚來盡補殘。畫舫兩湖明月共。籃輿十里好山看。感施餘論沾荒帙。白葦黃茅足改觀。三四是西河身分。末二句應是西河作序詩以報之。

曹煜曾

字麓高江南上海人。貢生。著有道腴堂詩。曹丈詩得董蒼舒指授。故其品特高。

水仙花

江湍漱雲牙。夜濯宓妃魄。一洗羅襪塵。踏霜曉無迹。冰肌歸藥房。清芬襲巾烏。脈脈契素心。疎梅影橫壁。
清氣逼人。

曹炳曾字爲章江南海人諸生著有放言居詩○曹氏昆弟人比之劉孝綽三昆齊名詩品亦復相當

九日送人北歸

折取茱萸當柳條。送君明日上蘭橈。望鄉惜別分南北。并作離魂一夕銷。望鄉指所送之客惜別指送客之人兩層都到

曹煥曾

字春補江南海人貢生著有長嘯軒詩

病中雨夜

鑪煙濃欲冢。夜色淡生陰。病骨秋花瘦。愁懷暮雨深。疎燈孤榻影。衰草亂蟲吟。無限關心事。朦朧夢裏尋。工於琢句外此如殘歲斜陽促輕寒落葉知酒力緣愁薄詩情到枕工語不必奇耐人吟咀

秦時昌

字枚諤江南震澤人

方竹

舉世尙圓通。爾形獨合矩。不同睢園種。亦殊嶰谷侶。直方坤之德。鍾秀天特與。雖驚世人眼。實爲君子許。稜稜霜氣凝。矯矯峻節舉。宿土移數竿。歲久森圃墅。堅竹豎爲杖。登臨藉撐拄。毋令柔媚人。一朝削圓女。見君子當終守矩矱勿慕圓通改節末路也前半自矢結意自規

周

瓚字黃在雲南大姚人官翰林院孔目

柳絮曲

點點覺春深。飛飛恨不禁。露沾疑妾淚。風散比郎心。曉月隋隄畔。殘陽灞水陰。年年飄蕩處。腸斷白頭吟。

劉宗霈字蔚園。江西南興化人。

看菜花

乍逢紅雨點迴塘。又見平畦千頃黃。色比散金無異種。香連繡壤不分疆。已娛老眼消春晝。旋引歸心立夕陽。自注。予家以園圍爲業。燕麥兔葵無感觸。不須佳句憶劉郎。通體俱著題。未免近板。得頸聯空寫。上下六語皆散金。指春日黃花也。唐代以黃花句試士。通場皆指菊花。無一合者。故太白云。張翰黃花句。風流五百年。詩中第三語本此。

沈源字蘊久。浙江歸安人。

聞柝

擊柝嚴城淒復清。聽來一一觸離情。天街夜靜霜初落。繡閣燈寒夢未成。宵恨短長隨曉箭。韻移高下逐風聲。座中有客支孤枕。歸思驚催白髮生。三四工於取神。

趙關曉字開夏。浙江歸安人。諸生。

踏雪

踏雪訪山樵。山樵踏雪去。一路草鞵痕。尋入松深處。神合唐人松下問童子一絕。

贈友

不向人間留姓名。草衣木食氣嶢嶢。山深虎出倂聲急。夜半長歌空手行。

周振采

字白民。江南山陽人。選拔貢生。○白民制義。比於天半朱霞。雲中白鶴。典江南試者。每以不得白民爲媿。然終於不遇天也。詩不多作。亦矯矯拔俗。

晚甘園芍藥盛開。蕁江招飲。

君留燕。吾適魯。去年花時各羈旅。鞭梢兩地恰歸來。一時花下同賓主。殿春朵朵翻瓊英。白頭相對千花明。有酒但作長鯨飲。有句肯學寒螿鳴。物情共艷三公爵。魏國聲名兆花萼。我與君家共息機。無須離別悵分飛。朱朱白白皆堪賞。不羨揚州金帶圍。

老將

百戰沙場功未酌。偏裨年少早封侯。敵人俯首驚無恙。法吏吹毛對若讎。老馬躡雲偏伏櫪。蒼鷹羈鑿欲騰鞫。請看猿臂終強健。射虎南山氣尙遒。此白民自寫照也。三語暗用郭令公見回鶻事。四語暗用大將軍急責李廣對簿事。

王應奎

字東澂。江南常熟人。諸生。著有柳南詩鈔。

箬包船紀事

有船銳其首。以箬包裹之。名爲箬包船。聚泊疑茅茨。浮家無定所。忽湖忽江湄。居貨挾土產。擅技兼卜醫。中有無良者。行乞同殘黎。詎料豺狼心。所志竊童兒。神咒與餅餌。給兒兒輒迷。牽引至船中。毒手恣所爲。或爲臙其目。或爲攞其肢。或屈曲其體。如籐籐戚施。形骸幾變盡。父母居然疑。清晨負之出。索錢號九達。

夕仍負以入。傾倒囊中資。數倘有不充。攢刺加鞭笞。苟延此殘喘。性命危如絲。有時更肆惡。視彼軀幹肥。入之人鮮甕。飽噉若舖糜。吸兒腦與髓。嚼兒肝與脾。從此筋骨強。便堪耐刀錐。更聞藏祕器。賣以療疴羸。一七爲神膏。索值恆不訾。淫人祈長生。食之甘如飴。又聞湖海濱。茫茫有神祠。神曰抽筋母。此輩所皈依。重午暨中秋。廟門塞靈旗。羣船競祭賽。以兒爲犧牲。祭罷飲福酒。狼籍幣與醜。年來迭敗露。官長胥周知。勿問所從來。立斃陳其屍。謂足抵兒命。此外無窮治。不究其本根。徒然翦旁枝。官長法深刻。胡獨偏仁慈。其毒仍滋蔓。其故難尋窺。誰爲采風者。聽我歌此詩。此皆一一紀實。曹惡敗露後。被殘肢體女子。詳述於窮根株。此意作者不解。吾亦不解。

湯懋統 字建三。江南巢縣人。官遷江知縣。○兄名懋綱。官刑部郎。詩品清高。今家居著述。弟兄均擅清名。此居巢所僅見者。

歲暮得家書

冉冉逢殘歲。迢迢隔故廬。一燈遊子夢。雙淚老親書。敢怨功名薄。深慙菽水疎。卻思諸弟妹。繞剝意何如。
情真語不雕。琢而自工。

除夕

殘臘辭人逐漏頻。寒氈堪笑獨吟身。僅支鶴俸能供歲。輕擲魚竿自取貧。柏酒竟疎婪尾醺。梅花虛擬故園春。遙思伯氏京華久。一樣燈前憶老親。

故衣

檢點衣衫敝篋存。十年相與歷寒溫。香塵慣惹春風陌。寒杵多敲落月村。贈友未堪酬縞帶。思親每爲染啼痕。貧居賴酒消岑寂。曾典青錢向市門。四語不離不即前人所謂取詩之魂也。六語著題中。傳出孝思。尤爲難事。

趙

虹字飲谷。江南嘉定人。布衣。

戊午七月自大梁東歸感喟成詩用以自贈

飄零淮楚踰河朔。轉徙幽州更大梁。迢遞關河雙去鴈。古今岐路幾亡羊。時無燕趙悲歌士。坐有邯鄲挾瑟倡。但得翠娥深勸酒。不辭酩酊罄清觴。

問訊滄浪舊釣磯。樵兄漁弟共相依。眼看西北高樓遠。心逐東南孔雀飛。園吏好尋濠上樂。丈人已息漢陰機。浚郊不用弓旌辟。自署中吳老布衣。此飲谷倦遊後作。年七十餘。未除芒角。宜壯盛時能以高談雄辯。屈服衆人。

王

泌字儕。鄴江南元和人。諸生。

越女祠

一曲菱歌韻碧瀾。耶溪歸櫂日將殘。情多自易含惆悵。不爲秋深怨路寒。哀怨起騷人。極低徊掩抑之致。

陳

倫字遜。其江南無錫人。諸生。

張循王墓

六丁不下驅天驕。宮車碾雪夜渡遼。白頭烏啄大家屋。衣錦王孫路旁哭。一馬化龍浮渡江。臨安王氣於斯卜。烽火江淮草木殘。中原血戰腥風寒。揮戈誰洗靖康恥。屈指英雄岳與韓。區區子英奚爲者。片紙贖書背人寫。風波萬里壞長城。二字翻稱廷尉平。北人歌舞南人泣。賀蘭鐵騎仍縱橫。兩宮魄冷冰天月。配饗反旌讒詔骨。麒麟墓道枕蒼煙。御墨淋漓灑碑碣。墓門高揭對晴湖。松栝深深叫訓狐。金陵城外蒼茫處。醜繆堂封千載汗。張俊承秦檜意。鍛鍊張憲。至自爲獄辭。以成岳忠武之獄。蓋姦惡之甚者也。高宗賜葬。自製碑文。遺命身後以俊配享。是誠何心。詩中合全局言之。後以檜之穢冢作結。天然相對。惜無有人平其墓者。

沈

炯字遜揚。江南吳江人。諸生。

過惶恐灘

疊疊青山勢鬱盤。片帆遙泝贛江瀾。危灘共指名惶恐。古縣空聞號萬安。自注。縣屬吉安府。在縣南三里許。風撼巔崖崩巨石。雷喧礮壑走驚湍。勞人略與孤臣似。不獨東坡泣路難。自注。東坡有地名惶恐。泣孤臣句。○惶恐萬安。天然反對。灘本名黃公。東坡有慨於中。故云。

書懷

七度長江向石頭。依然蹤跡半沉浮。草玄字字翻成白。刻棘年年未類猴。老我也曾磨鐵硯。古人先已敝貂裘。從茲萬里堪乘興。浩蕩難馴似野鷗。

程 簡字尊一 江
南長洲人

冬夜讀書

讀書有味聊忘老。自注：放翁句。此意誰云只放翁。今古英雄當末路。消磨歲月短檠中。有老驥伏櫪之意。

蔡書升字廷彥 江南長洲人 官成
縣知縣 改通政司經歷

橫塘道中時清明日

東鄰愁冷食。穉子叩柴門。舊俗分新火。三家共一村。草深眠鹿子。莊老出雞孫。細雨看荒塚。梨花開正繁。

橫塘西名三家村。天然屬對。

余 京字文圻 江南丹徒人。布衣。著有江干詩鈔。○予游焦山。見山間有文圻石刻詩。頗有警句。詢之。詩格意俱高。尤長近體。既老。從遊日衆。然得其一體。無能為替人者。

畢孝子寧古塔負祖父骨歸里

混同江畔沙草黃。陰雲晝翳天無光。羈囚廿載老為鬼。往往夜哭思家鄉。虬山孝子痛父戍。賣志窮荒願身赴。薰蘭憔悴悲春暉。蚤向秋風委霜露。鐵嶺遼河五十秋。旅魂漠漠傷淹留。雞竿明詔下。驚禁忽許枯骼還。山邱孝子遺孤年已壯。帝闕奔號請歸葬。西曹求檄頒故遲。躑躅京華家破喪。萬里窮多事遠征。饜風密雪踰長城。呵冰鬚髮曉每凍。聞角區脫宵常驚。幽泉負骨旋鄉里。馬鬣齊封堂斧似。兩世精誠事竟

成。不愧一門雙孝子。其人可傳。詩亦足以傳之。

七夕妙高臺坐月

今夕天風爽。吹余到十洲。瑤臺孤島夜。銀漢半輪秋。潮響龍移窟。江明鵲起樓。憑欄星斗近。指點說牽牛。

秋杪薄暮登北固木末樓卽事

鴈背遙翻落照來。樓登木末客徘徊。江山曠劫爭棋局。燈火光陰促酒杯。萬井人煙秋慘淡。百年戎馬地蒿萊。西風歸路吹殘醉。雲掩高城畫角哀。起句得勢以下便如剗竹。

八月十三夜焦山坐月同學菴釋巨濤

月出雙峯斂暮嵐。臨流久坐借僧菴。澄清銀漢露涓滴。浩蕩碧波帆兩三。龍戲夜珠藏海底。雁隨秋氣落江南。惠休有句通禪味。金粟香中好共參。

十四夜焦山水晶菴看月

薄暝疎鐘隔樹聞。海風收盡嶺頭雲。住山夢好經三宿。看月光圓到九分。天浹銀河涵水氣。江平冰縠織波紋。僧窗不用呼燈火。老眼能書白練裩。

暮春同吳門沈歸愚登蒜山憇清寧道院

老去攀躋興尙存。蹒跚陪客躡雲根。天晴煙樹分瓜步。春漲波濤拓海門。野馬網縕頻過眼。沙蟲變滅幾

招魂亂藤荒草山前路。鐵騎曾經十萬屯。虛循率十萬衆爭蒜山。劉裕以長刀斫敵破之。未旬用其事。

藉草峯巔片刻留。曠觀身世歎蜉蝣。殘年歲月雙筇杖。吾黨乾坤一釣舟。夜雨苔痕山徑滑。夕陽松影石

壇幽。勞生多病惟謀藥。丹鼎猶存五粒不。

雲房杯酒坐閒身。白首相知感慨新。廡下梁鴻誰共語。樓頭王粲尙依人。青山有夢常爲客。黃鳥無言自

送春。歸舫吳門櫻筍熟。柳花風起石湖濱。廡下梁鴻。文圻自謂樓頭王粲。謂予也。時予授經魏觀察署中。故有是語。

秋杪登清寧道院與漪亭學菴同賦

扶杖登高愴客魂。西風黃葉滿前村。林間佳菊能留客。江上名山總到門。飯罷楸枰消白晝。酒闌鐘鼓報

黃昏。蹙離城郭無多路。便覺漁樵地位尊。江上名山。總到門。金焦北固五洲皆在檻前也。結爲布衣增價。翁山詩往往有之。○五日泛舟丁卯橋。領聯云。小橋疎柳唐人

宅。落日寒湖。楚客魂。真名句也。因通體未稱。故附錄于此。

秦應陽字含真。江南長洲人。官六安州教諭。

飛蛾

飛蛾性趨炎。見火不見我。憤然自投擲。以我昇炎火。動靜自有常。躁急適賈禍。明發天宇空。飛躍無不可。

惟趨炎。故躁急。茫茫六字。見我者有。幾人哉。一結。天空海闊。無適不可。

徐翔鵬字雲客。雲南昆明人。

普安道中

暮色蕭條歲欲闌。長途猶自赴征鞍。橫穿峻嶺幾千丈。直下危峯數十盤。古樹夕陽鴉影瘦。亂山殘雪馬蹄寒。風塵滿眼愁無奈。始歎當年蜀道難。

葉肇梓 字季良。江南和州人。

橫江詞

人道橫江惡。儂道橫江好。不是浪如山。郎船去已早。
翻太白意。詞轉似太白。

集歸去來辭字為詩追次坡公韻

涉世知無策。還鄉路可尋。孤行聊自善。萬感復何心。雲岫遙扶杖。風泉遠入琴。東臯清絕徑。容易得登臨。富貴求焉得。耘耔樂有期。歸與無不可。行矣欲何之。獨酌向庭菊。孤懷寄賦詩。息交聊自遠。疇復是心知。不悟今時是。安知昨日非。泉飛還入壑。雲化復成衣。引酒寄情遠。撫琴得趣微。晨窗觀去鳥。日盡自歸飛。
無集字迹。與坡公相近。

汪紹焯 字織南。浙江秀水人。歲貢生。

項王

騅馬虞兮可奈何。漢軍四面楚人歌。烏江恥學鴻門遞。亭長無勞勸渡河。
鴻門之遞。為避禍也。推孝惠魯元。墮地乞分。太公一杯羹。無復。

人理矣。此詩抑倒沛公。能爲項王吐氣。

劉伯倫

生死窮通付醖醢。婦言雖好不須聽。利名役役真成醉。只有先生是獨醒。當塗典午間。誰非中酒者。以獨醒許伯倫。喚醒醉夢人不少。

邵錫榮

字景恒。浙江錢塘人。

舞劍篇與陸方義

我嘗高詠古人古劍篇。我欲起舞追飛仙。古來劍解七十二。惜哉後世無人傳。陸生陸生爾且前。我今試舞雙龍泉。長兵短接須精練。雌雄爛爍落銀霰。萬人力敵莫可當。頃刻風雲看百變。忽徐忽疾疑旋蛟。忽連忽斷驚飛雁。聳躍星流身不見。雨打梨花團雪片。陸生此時覩之驚絕神。且願執鞭追後塵。慎勿輕攜此劍渡江海。只恐雙飛出匣歸延津。

錢錦城

字鏡先。江南常熟人。牧齋宗伯孫。

席上詠物分得橘

丹實離離間碧林。千頭聲價重南金。踰淮若改平生質。孤負當年作頌心。言堅貞之質。不可變易也。乃祖能守此兩言。便爲東林完人矣。

安

字亦生。江南無錫人。

流螢詞

熠熠流光漾水烟。池亭雨歇晚涼天。西風吹墮紅蕖裏。照見鴛鴦自在眠。池塘中每有此景。卻無人寫到。

卷二十九

錢之青

字恭李。江南震澤人。乾隆丙辰舉人。官寧武知縣。陞保德州牧。旋歸里。著有數峯詩鈔。

歸里後親朋枉過有作

吾家聚族居。比鄰皆親友。念我遠道歸。胥來問安否。回首出門初。變遷幾八九。門庭半更新。舊存惟榆柳。尊長既凋零。輩行俱老醜。遠歸非不適。離別苦太久。追往更撫今。恐作窮獨叟。重感丈人情。爲我治斗酒。連下一章。脫胎杜老羌村之作。而情事各別。杜傷亂離。此感盛衰也。

斗酒不復卻。丈人前致辭。消長各有數。聚散亦有時。陳迹已往矣。良會喜在茲。爾不相見。誰爲把酒卮。況今逢令節。日永薰風吹。丹華耀榴火。圓葉滋荷池。子其愛景光。爛醉毋推辭。聞言散幽懷。醉鄉同赴之。去年當此日。觸熱方驅馳。

宿村家

入夜投村路。家家列炬迎。長官無善政。父老自多情。敢謝盤中黍。相期壟上耕。夜闌聞笑語。今歲喜豐盈。
歸途作

客久餘蓬鬢。歸途負薜蘿。兒童皆晉語。舟子自吳歌。茆屋秋風破。原田荒草多。所欣安夢寐。依舊碩人邁。
中秋夜述懷

去年醉月曲江頭。綠酒紅牙記勝遊。今夜中秋形對影。故人還復上南樓。

張若需字樹形。江南桐城人。乾隆丁巳進士。官左春坊左贊善。著有見吾軒詩。○宮贊爲葯齋公令嗣。孝友篤實。一承前人。詩筆各標面目。而性情溫厚。異而仍同。人比之蘇瓌有子。

生日太夫人自乍浦寄衣適至

侵晨遠人至。寒衣寄江城。珍重一開緘。光采生敝籬。老親念幼子。稱體新裁衣。書云禦爾寒。著以湖綿輕。寒燠隔異地。猶厪慈母情。憶茲初成時。長短勞經營。襟袖密密縫。十指鍼線縈。健婦把刀尺。指點熨貼平。感激母意厚。顧我非童嬰。二十要自立。儉素敦家聲。五陵自輕肥。溫飽無令名。今茲茹冰槩。用佐嚴君清。短褐取蔽體。寧羨羅綺榮。被服矢無斃。敢忘我初生。至性流出。不假雕琢。

陳思王墓

鄴水東流勢已分。空餘感激誦遺文。五官嬪代羞當璧。七子論才合冠軍。白馬詩篇悲逐客。驚鴻詞賦比湘君。魚山縹緲留清梵。何處春蕪沒故墳。洛神賦。猶屈子之詠湘君。後人以爲感甄。非也。作者故有特識。

五日潤州

第一江流盪畫橈。虛傳競渡踏風潮。五絲誰續庚寅命。雙槳人過丁卯槁。令節只今成寂寂。懷沙終古恨

迢迢何如滿泛菖蒲酒。快對金焦破沈寥。三語五日。四語潤州天然典切。金山競渡極盛。康熙某年沈沒幾舟後遂禁止。詩中云虛傳云寂寂蓋為此也。

包

彬字文在。江南江陰人。乾隆戊午舉人。

遊弘濟寺

秋江靜無煙。山影恍圖畫。晨登燕子磯。塵鞅一時卸。徑轉直復曲。奇峯若相迓。岡巒中斷餘。兩崖仍可跨。迸石樹無皮。疑是白龍化。花宮隱深雲。香風逗林罅。娑羅落高陰。傍戶枝柯亞。洞穴豁堂皇。禪房半相借。上有銜花鳥。下有投巖麝。綠壁陟高閣。山川拓眼界。江明匹練橫。天際波濤瀉。此境足勾留。儔侶催返駕。徘徊石磴旁。歸雲擁足下。只秋江靜無烟。五字近六朝人。

錢塘詠古

宋祚將移訝鬪星。君臣跡似浪中萍。黃龍出海朝廷小。白雁橫江戰血腥。南國無家歸燕子。西臺有淚哭冬青。諸陵麥飯今誰薦。風雨蘭亭夜火熒。此詠宋亡國事。

倪承茂

字稼咸。江南吳縣人。乾隆戊午舉人。著有頓塘詩稿。○頓塘得名最早。成名甚遲。藝苑方重望之。而俟焉辭世。予哭之以詩。末云。比似方干差足慰。生前鄉舉已題名。慰之實悲之也。素

長於詞。而詩亦工。穩妥貼。不落宋人以後。

九日道中

一年兩度涉淮黃。擾擾緇塵染素裳。衰柳共憐殘鬢短。閒雲應笑客程忙。南歸無分吟風月。北去先愁飽

雪霜孤負故園叢菊好。不知今日是重陽。

錢塘懷古

五代興亡一夢中。射潮江滸想英雄。錦衣木石沾恩幸。鐵券山河誓始終。鳳舞龍飛形勝在。虎符玉節霸圖空。花開陌上年年好。無復行人指故宮。此獨詠吳越王事。

鈕汝騏字稼仙浙江烏程人乾隆己未進士官翰林院編修著有南雅堂詩

題黃夫人寄升菴詩後

猜忌君臣際。自注升菴諫議禮譎成後世宗猶有餘憾每問楊慎云何侍臣以老病對乃稍解升菴聞之遂佯狂以免乖離夫婦間百年悲死別兩地夢生還

市上簪花髻。閨中損玉顏。至今傳錦字。流唱滿南蠻。此千秋恨事也四十字中委曲道盡○原本萬里夢生還句法劇佳但蜀中距滇初非萬里故易二字

辰龍關自注吳逆作亂時沅辰道梗王師由此入黔滇

飛將急前鋒。危關實要衝。虛聲經亥豕。間道出辰龍。自注王師聲言由五溪入黔故賊將不備此關亥豕溪名六詔驚天降。羣蠻掃地

從。皇威清萬里。徼外樂耕農。王師入黔滇意西崖少宰渾言之此暢言之

舒瞻字雲亭滿洲人乾隆己未進士歷任浙江知縣○雲亭親交衛霍在京師屏居委巷如寒素處迴不易及

然既出仕而浙東西頌其廉明傳其風雅古所云文學節吏治者也詩品在元白之間近情

別竹田

莫向風前折柳枝。桑條原不縮相思。人生難得惟知己。天下傷心是別離。半載篝燈同聽雨。何年把酒更論詩。西泠夜夜添新夢。多在烟江月上時。古之傷心人耶。讀竟輒喚奈何。

留別當湖諸人士

萍絮何須問舊因。離筵開處對殘春。誰言琴鶴非家具。自喜溪山似故人。北道應牽歸客夢。東風偏上苦吟身。歸舟莫笑輕如葉。千卷殘書已不貧。不忘知己。不忘溪山。近日仕途中能有幾人。

偶占

芳草青青送馬蹄。垂楊深處畫樓西。流鶯自惜春將去。銜住飛花不忍啼。於無情中寫出情來。

爲朱蘊千題杏花春雨圖

淺深春色幾枝含。翠影紅香半欲酣。簾外輕陰人未起。賣花聲裏夢江南。夢江南本屬韻事。夢於賣花聲中。又添韻事一重矣。入唐人絕句中。亦稱中駟。

爲董浦太史悼亡

工愁善病最憐君。夢裏啼鴉不忍聞。彷彿舊時蘇玉局。自將詩句哭朝雲。

張

進字翼庭。江南吳縣人。乾隆壬戌進士。官翰林院庶吉士。著有綠野園詩。○予與徐子龍友。諸

者皆結詩。課時作。

由空谷至中峯

出谷山路轉，松深餘落暉。隔林聞語響，始知人采薇。歸鳥引前路，礪花點客衣。倚筇憩梵宇，鐘鳴自掩扉。
華鴻山學章左司可云循牆而走作者似欲過之

雪中憶家園池上草堂

客居常苦寒，況復積深雪。夜明山鳥驚，清響寒柯折。遙知池上園，虛白人蹤絕。

五人墓

意氣偶然激，成名竟殺身。空山餘落日，古木出青燐。地近要離墓，雲連胥水濱。匹夫能就義，嗟爾附炎人。

恰是五人分量，結意指顧乘謙魏廣微一輩見纓冠中人，不知市井中人也。四十字字老成。

夢 麟字文子，蒙古人。乾隆乙丑進士，官至工部侍郎。○樂府宗漢人，五古宗三謝，七古宗杜韓，雖不能至，心嚮往之，不必議其不醇也。近日臺閣中無逾作者。倘天假以年，烏容量其所到。

雉朝飛

雉朝飛，其羽灼灼。雌前越，子後躍。于田于薄，是飲是啄。我弗如爾，行樂爾樂。我哀，朝行出遊，日暮獨歸。獨歸兮心悲，羣嗷嗷兮夜飢。我無術兮哺兒，先我死者知之。
借樂府題悼亡詞古情摯於安仁子荆外又闢一門戶

哀歌行

誼者勿誼，歌者勿歌。嗚呼我哀，我哀奈何。父知兒寒，母知兒飢。我無父母，飢寒誰知。親在憶親，親沒戀墳。

魂斷難復。草荒更新。夜坐秉燭。兄右弟左。同爲孤兒。哀哉生我。抱女置膝。忍涕中悲。兒亦無母。我懷痛之。燭短夜寒。予心之酸。男兒低頭。顧影自憐。蓼莪之詩。皆直白語。而千古哀痛。以此爲至。此作復相似。然前 榮懷。宜年命之不永也。

西澗赴山將往雲罩憇天香禪刹

天雞叫海日。晴翠濃諸峯。丹崖媚朝霧。了了青芙蓉。尋溪背初旭。入谷聞驚風。半嶺生飛烟。忽沒巖邊松。仰睇辨蓮宇。稍見僧樓紅。流雲布羣壑。清梵生虛空。石徑去不極。前路誰能窮。鉤索得懸解。妙寄饒歸宗。跣趺憇蓮社。歎息懷支公。西澗一路。予曾早發。讀此如置身其間。

由天香行藥西盤初入山口

巖秀澄孤懷。趣塗意先往。理策遵迴溪。空林得樵響。幽悰眷岑寂。矧茲秋日爽。霜徑稍曲盤。虛翠忽晃朗。漸歷紆巒深。未識迴塗廣。孤暉隨趣濃。懸磴披烟上。杳藹接諸天。振衣發遐想。王裴不可作。邱壑誰心賞。何時飯名僧。松檐稅塵鞅。

朝往香山

夢覺鐘魚清。褰裳月在棟。盥濯辭精廬。山僧出林送。苔衣潤芒屨。昨宵知露重。亂泉聽乍失。溪澗澀餘凍。石骨生清涼。逼人寒欲中。日出照幽谷。山鳥發新哢。微風蕩空翠。流雲散巖洞。永懷煨芋者。隔岫聞清誦。

曰清曰新曰生曰真四者兼之此
種詩可以滌人塵俗發端尤警

夜過青浦

理棹投暮烟。餘暉黯遙巘。輕舸尋歸流。空波肆怡衍。野風送香氣。浩露滴微泫。重疊林景昏。微茫峯色淺。遠火辨孤城。隔岸聞亂犬。稍別林墟移。漸覲雉堞轉。華月澹始照。流雲蔚初展。一與清景俱。乍喜塵踪遣。惻悵懷前蹤。餘風動深緬。

臨江樓

亦知非故土。扶杖且登樓。落日萬古色。長江千里秋。浮雲蔽楚望。朔氣老邊州。無限關心事。憑欄起暮愁。

孫貽武

字紹衣。浙江歸安人。乾隆乙丑進士。

吳越王

鳳舞龍飛地。脈優挺生人。傑說婆留。潮迴龜赭三千弩。地擁金湯十四州。承寵樹皆披錦繡。稱藩臣自息戈矛。櫛風沐雨辛勤甚。圓木驚眠老未休。第六語。譏其不討朱溫也。婉諷賢於直斥。

吳

槃字青然。江南全椒人。乾隆乙丑進士。官刑部主事。

詠懷

曲徑非不捷。由之轉窮途。欲速嗟無成。蹇步愧亨衢。徘徊望觚稜。我思鬱以紆。致身有本末。朱萑難苟圖。

突梯性不適。那敢輕賤軀。夢鹿忘覆蕉。伺兔笑守株。得失良偶然。豈必巧有餘。立身居官。可云不苟。

晚次彭城

薄暮荒城首重迴。雲煙芒碭客愁開。三齊驛路連天闊。萬里河流動地來。戲馬臺前寒日落。斬蛇溝外野

風哀。狗屠獄掾皆黃土。感歎當年楚漢才。

林明倫

字穆安。廣東始興人。乾隆戊辰進士。官翰林院編修。記名御史。出為衢州太守。○穆安留心正學。嚴義利之介。方保舉御史時。有勸其謁掌院者。答曰。御史以求而得。何以自立耶。後守衢。潔己卹民。因謁上臺。稍遲疑。其傲以才力不及。劾之。落職。衢人哭而送之。

弔五人墓

西市繁霜日。南躔貫索中。歌詩憂板蕩。占象歎屯蒙。國柄歸旁落。刑餘蔽主聰。衣冠嬰赤族。屠狗叫蒼穹。

竟觸貂璫怒。誰憐骨鯁忠。捐生片語易。仗義五人同。道直心寧悔。名存死不空。招魂隄水上。葬骨武邱東。

墓草侵堦綠。山鵲帶血紅。要離三尺土。千古共英風。

張

腕字蓀九。江南長洲人。布衣。○蓀九窮居郊外。世緣半絕。素交二三人外。車騎造訪之。弗接也。論詩必派原唐人以前。有與爭辨者。至面赤不顧。或曰為詩癖。為詩愚。乃大喜。身後詩篇零落。祇存社中。共賦一篇。

移木芙蓉植後園

吟罷楚客辭。逍遙向園圃。緬彼拒霜花。一枝移帶雨。我生同弱植。終當委草莽。況茲搖落辰。孤芳誰窵取。

淺土託根芟。松菊聊爲侶。借題自寓。品地如見。

張 鉞字少弋。江南華亭人。布衣。

月夜黃姑灘露坐簡山中一二知己

明河淨無波。憇息愛幽境。良遊值杪秋。佳趣心各領。頽陽匿餘暉。微月揚清景。草中僧獨歸。烟際鐘初靜。霜林颯有聲。風壑悄多警。悵與賞心違。長謠一延頸。僧歸二語。寫山寺晚景如畫。

閩中九日寄吳中諸兄弟

海天萬里獨登臺。佳節空嗟白髮催。愁絕雁聲從北至。蒼然秋色自西來。霜清烏石巒烟豁。潮落金崎越艇回。遙憶故園兄弟在。幾人同把菊花杯。

金義植字立斯。江南吳縣人。諸生。○太白於右軍書。目以清真。清則不雜。真則不僞也。惟詩亦然。立斯之詩清而真矣。與其配偶。酬於楓江之濱。晚歲耳聾。不聞世事。尤得安分自適之趣焉。

懷高武康侍御軍臺

身訝新擢甲。冠爲舊觸邪。一言陳白簡。萬里度黃沙。食祿應持論。投荒肯顧家。從戎堪報國。垂老莫長嗟。起二語。侍御及從軍皆見下表。其正直。勉以報國。得古人立言之體。

懷三弟

東粵攜家遠。南荒作尉難。五旬雙白鬢。萬里一微官。城郭新教築。衙齋未得安。遙憐蠻海畔。辛苦百憂攢。

自注陸豐係新分邑。○詩品之高。總不外一真字本乎性情則真。

江上

江上不來雙鯉魚。隄邊空過七香車。結交無力緣金盡。泛宅何之且陸居。紫塞月明千帳外。綠窗人靜卅年餘。此時聊得閒中趣。仲蔚蓬蒿亦自如。五句對第一句猶詩之彼采蕭兮也六句對第二句猶詩之出其東門也無力結交無地泛宅惟領閒居之趣可已

尤

怡字在京江南長洲人布衣○昔皮襲美寓臨頓里陸魯望自甫里至與之定交倡和其地爲皮市在京居其地周子迂村亦至自甫里相與賦詩怡符皮陸也在京就韓伯休術欲晦姓名詩亦不求人知而重其詩者謂得唐賢三昧遠近無異詞云

雜感

春至陽氣動。輕雷殷方鼓。晴川泛朝光。草樹沐新雨。農人負耒出。操作及童豎。有生寧不勞。俯仰各有取。曰余本拙懶。逝將事農圃。所急在治生。豈伊慕高古。貧賤惜筋力。憂傷亦何補。陶公心事正於不諱治生傳出

明月流素影。照我室中帷。清光缺復滿。佳人難再期。寶鏡不復開。玉琴生網絲。翩翩雙黃鳥。巢我庭樹枝。此首雄銜原上草雌啄澤間泥辛苦被流沴一旦傷其雌身死亦何言悲此巢中兒悼亡

鷺馬策蹇足。馳望崑崙丘。自非千里姿。焉得追驂騑。斥鷃翔數仞。黃鵠四海遊。豈不願高舉。羽翼非所儔。慎爾失故步。躡蹶乃貽羞。天分固有定。躁進非良謀。此警躁進

山居雜興

晨起草木溼。林霏散清曙。始知東峯雲。夜作澗上雨。光風葉上泛。新泉草下注。羣鳥林際鳴。遊魚水面聚。萬物各有分。勞生轉多慕。倖中成虛名。多爲來者誤。君看區中綠。擾擾曷有數。

劉東郊歸自關中述華山之遊爲作詩紀之

劉君新從華陰歸。爲我口述華山遊。華山截嶠五千仞。金精白氣西作秋。初向雲臺辨雲樹。已是希夷棲隱處。足捷如騎酒家龍。眼明未厭公超霧。徑迴路絕飛鳥還。清壁杳藹凌雲端。停策仰望坐歎息。安得羽翼臨風翻。垂垂鐵綆一千丈。烈日長風久摩盪。半足入壁出壁間。雙手緣雲上雲上。蒼龍當我來。兀竄露半背。我欲踏之勢恐墜。不知天際去之幾。俯視人間已無地。比時賈勇氣轉健。矯首三峯忽當面。峯頂玄鶴鳴向人。雲中玉女遙相見。仰天長嘯天宇空。浩浩萬里來罡風。幸不吹墮塵埃中。五陵北原青未已。黃河無聲流向東。平生浪跡長遊衍。太華峯頭足蕭散。以茲頓遣胸中憂。卻使雲泉今尙熾。吾聞此語心茫然。天池仙掌紛眼前。忽憶十年意不樂。魂夢卻墮東峯巔。何時拄杖凌紫烟。仙人金液非我意。試看峯頭玉井蓮。

詳華山之奇險。然語語是友生所述。別於記遊。結意撇開。求仙正見高曠。

寶劍

寶劍芙蓉鏢。韜光匣裏橫。星辰秋忽動。風雨夜還驚。邊郡今多事。故人方遠征。徘徊欲相贈。不獨爲平生。

一氣鼓鑄。精力尤在後半。神到候自然。遇之人工不與。

秋晚登樓

澹雲含雨過城頭。獨自凭闌豁遠眸。萬木秋聲來大壑。亂山寒色上危樓。登臨不爲依人感。搖落應添攬鏡愁。聞道菊花堪泛酒。共誰來此一消憂。

館娃宮

峯頂曾聞置別宮。艷歌嬌舞欲無窮。美人一去碧雲冷。行客獨來山殿空。香徑落花春度曲。古廊依樹夜鳴風。登臨漫爲勾吳感。舊館荒臺處處同。

白秋海棠

誰將清淚灑幽墀。散作瑤華別有姿。最是玉人腸斷後。淡粧無語背人時。只瑤華二字點白。餘皆以神韻傳寫悠然自遠。

江

字飛濤。江南常熟人。

病起卽事

日暖風恬春正酣。閒聽歸燕語喃喃。形同陌上三眠柳。心似筐中八繭蠶。洛下有書憑犬附。牀頭無易任雞談。拋荒殘卷塵凝榻。裘褐蕭然擁一龕。

柳絮次陶菴韻

茫茫如夢復如塵。時逐遊絲送暮春。連臂踏歌招不得。就中愁殺倚樓人。連臂踏歌。用楊白花事。落句傳出遠神。

周天藻字挾之江
南吳江人

題劍南詩後

歸老雲門著句多。往年豪氣未消磨。杜陵集裏收京詠。垂老懸懸望兩河。萬六千餘首中。標出北定。中原之志。才是放翁知己。

病中遣興

量減三蕉衆所知。興來時復一中之。此生頗似靈均醒。也和淵明止酒詩。淵明之醉。與靈均之醒。同一心事。詩中頗能見及。

陳燦霖字雨巖江
南長洲人諸生

詠橘

洞庭朱實飽經霜。信手拈來滿座香。有柚願教兄弟合。自注淮南子。槐榆與橘。柚合而為兄弟。成林休慮子孫忙。厥包錫貢

來天府。作誦留名重楚湘。但得貞心能不改。縱令移植亦何妨。兄弟合子孫忙。如玉合子底。遇著蓋也。結意翻得獨高。

古怨

獨臥繡牕靜。月明宿鳥啼。不嫌驚妾夢。羨汝是雙棲。妙在不怨之怨。

陸文銘字書巖江
南吳縣人。諸生。○書巖甘於食貧。舅氏為荆山吳文恪公。居六卿之貴。無一語干瀆。品可知矣。詩亦憂憂獨異。適如其品。

擬古

明月在濁流。不改月色清。孤松盤曲徑。不改松性貞。君子遇險巖。此心恆蕩平。此見德性既真。不隨物變也。詩中興體。

雜詩

天地不生成。古今有何事。茫茫萬劫中。生民多所嗜。黃金變爲土。盜跖亦柳季。造物起爭端。無怪人趨利。有酒且斟酌。萬事付一醉。莊生之旨。見造物亦爲多事。何獨聖人。

利器行

干將之刃。篠簳箭。斬騎貫革如飛電。不逢揮劍發機人。鋒銛未許傷縞練。鉛刀蓬矢各逞奇。光芒駭目莫敢攜。風胡去兮。養由逝。吾安歸兮。長相思。不逢真識利鈍。混淆感慨無盡。

日入行

崑崙山摧若木枯。虞淵泛濫沉金烏。羲和沉湎不肯醒。后羿奮臂闢雕弧。八龍骨朽呼不起。石馬嘶烟寒月裏。玉桃潰裂飽青鸞。方朔偷兒今日死。茫茫元氣千古浮。劫灰飛盡天地愁。回顧長叫廣成子。黃帝何爲土一抔。全學昌谷。

李

璧字雲和江南句容人。

烏棲曲

花影參差覆轆轤。空房淚滴一燈孤。無端金井梧桐月。偏照雙棲白項烏。

馬長海

字匯川。遼陽人。著有雷溪草堂詩。○匯川。遼東。縷帶。意氣自豪。嘗遇之琛亭。都統席間。時琛亭防秋。匯川脫魚腸劍贈之。悲歌感慨。卽生平之詩可知矣。

移居滄洲蔡玉躬閣學以詩送行次韻奉酬

仕宦亦人情。沉淪墮其志。徒深山水懷。喜無兒女累。期爲塵外遊。今鼓滄浪柁。峨峨黃閣老。瀟灑饒逸志。送我河之干。贈言有餘味。非不惜離別。孤懷喜能遂。滄洲海一隅。可訪安期輩。爲問天地根。果否生天地。長跪謝微言。我將從此逝。

再贈西山隱者

山路逶迤入本冥。十年重訪枕烟庭。問名措眼看蓬鬢。留客呼兒挈酒瓶。雲似客閒朝出袖。鶴如人立夜聽經。先生不與寰中事。長嘯一聲天地青。

讀陶詩

處士胸中別有春。田園寄託寫人真。義熙尙有關心事。豈便羲皇以上人。窺見陶公心事。予亦有句云。至今南村詩。可續西山歌。予詩明

言。匯川蘊蓄。覺蘊蓄者耐人尋思。

金

縱字絲五。江南吳縣人。官宣城訓導。著有蘊亭詩稿。○蘊亭詩。負奇氣。磊磊明明。不肯一語庸下。比之利劍。寧寸寸折。不爲繞指柔也。晚年研究易理。不復成詩。

自三山至牛渚連山盤屈舟出其下

晴日山照耀。林巒現金碧。何年浮屠宮。恃此奇險石。鐘磬不可聞。天風蕩虛壁。輕舟出其下。牽攬不得力。巉巖更陰森。使我毛髮磔。驚濤噴晴雪。盤屈增險阨。上視飛鳥絕。下瞰鼃鼃逼。寒江靜魚梁。細路隱樵迹。

我欲逐孤猿。濟勝理輕策。高妙躡雲關。力扶義御側。風水趁前途。回首空歎息。

熟老杜發秦州雜詩。有此筆力。有此神氣。

舟曉

寒潮月稍落。漁浦煙初起。蒼茫鐘出林。蕭瑟雁飛止。須臾沉霧迷。不辨天與水。使我神恍惚。置身雲海裏。日出影漸開。遙山樹如薺。翠微半出沒。滄波亦流綺。指顧遠帆生。一一勢千里。清景曠無垠。吾心淡如此。

起繪舟曉。令讀者如置身其間。霧不生於平旦。而生於平旦以後。日高則散矣。老於道塗者始知。

采石磯

揚帆泝江濤。江闊沿壘嶂。詰屈百里間。一一奇鬼狀。篙師太鹵莽。撥石輕奔放。崢嶸屢縈迴。采石屹相向。天風躑慘來。險絕不可仰。昔聞忠武王。揮戈實開創。於此奮神威。力騰千仞上。真宰有驅除。中原氣自壯。至今三百年。談者神猶旺。龍虎一失險。洪波空蕩漾。鬱鬱松柏枝。鍾山日相望。

村居答社中諸子

柴桑有處士。襄陽有遺老。盡室入蓬蒿。終年顏色好。人生苦不足。吾道無求飽。願得同心人。浩歌藉芳草。

入蓬蒿而顏色轉好。人情已難。況加以盡室終年乎。惟梁鴻王霸夫婦足以語此。

送劉東郊

木落嶺猿愁。江帆開素秋。寸心千里遠。孤劍一身留。閩海天垂盡。仙山雲半浮。安期方待子。且抱古琴遊。

律詩最爭起手。起手得力。下
迎刃而解。鑿飲盛唐者能之。

寄芝仙西征幕府

枚生長托乘。王粲始從軍。會有平戎策。能開西極雲。令嚴千雪帳。犒士萬羊羣。指日應降虜。鐃歌奏凱聞。

周

京字少穆。浙江錢塘人。○少穆足跡遠到。欲結契字內英傑。召試鴻博。不遇歸。時借一二友生遊燕西湖。賦詩寫懷。蓋自此無四方之志矣。詩體和平中正。不爲鐫刻艱深之語。

武功縣望太白山

百里武功縣。明常太白山。雪從何代積。春到幾時還。清霽迴晴昊。高寒指翠巒。軍行休鼓角。風色正愁顏。

褒斜谷

閣道橫空去。連峯疊嶂開。地隨秦塞盡。山自漢中來。行蟻緣旋磨。黏蝸上古臺。當年轉戰處。彌望滿蒿萊。
自注。黃牛鋪爲吳康卿戰金兵處。○十字包括秦漢力大於身。

代州

青巒萬壑鎖巖疆。舊繞樓煩古戰場。冷磧雨收秋草綠。大荒日落塞雲黃。滹沱河去包并冀。句注山橫下狄羌。惟有年年關外雁。不妨迢遞到衡陽。

燕來

烟兩疎疎覆綠苔。海棠時節燕重來。不辭故國三千里。還認雕梁十二回。荒草誰家深院落。繁花何處好

池臺卻憐舊館曾相識。爲把湘簾手自開。

楊花

南陌風光劇可憐。楊花撩亂撲鞦韆。一年春事拋流水。半醉心情付別筵。冉冉慣尋芳草岸。濛濛欲下夕陽天。殘紅同盡無消息。又化浮萍上釣舡。三四空寫一聯。離形取神。晚唐時有此格。○同友人湖上有句云：野鷗導我有閒意。新柳笑人成老夫。風趣可挹。

二十六日曉過德州河

卽次停驂客夢殘。又攜殘夢上征鞍。小人有母憶嘗食。遊子離家空復還。沙月渡頭斜欲落。野風林外曉生寒。廿年明發天涯淚。到此真成行路難。

方肇夔

字引諧。江南江都人。諸生。

客中送春

記得離家是首春。與春相伴走風塵。而今杜宇頻頻喚。半餞春歸半勸人。感春歸而已不能歸也。語近情遙。待司空表聖俯拾卽是。觸手

成春之方。

桃花塢弔唐六如墓

先生胸次海天寬。只愛桃花不愛官。荒土一抔魂魄在。滿溪紅雨落春寒。唐墓在橫塘。桃花塢讀書處也。誤認者多。此從桃花著筆。而六

如襟抱。如或見之。

繆宗儼字敬思江
南吳縣人

虎山橋玩月

山白月當空。平波乍摩瑩。入雲淡欲無。蕩水光難定。長松倚層崖。風吹韻笙磬。橋下漁舟歸。櫂歌入清聽。夜深羣動息。一嘯衆山應。清絕。

洪嘉植字去蕪江
南歙縣人

蘄州禹廟

羅州之臺蘄水東。江聲千古環卑宮。盤龍山高風落石。乾明巖斷雲迴空。地平天成豈蒼水。九州四載疑玄熊。朝宗於海自江漢。巍巍黻冕思神功。以古詩行律體胎原少陸東坡亦嘗爲之。

朱瑄字樞臣江
南吳縣人

祖龍引

徐市樓船竟不還。祖龍旋已葬驪山。瓊田倘致長生草。眼見諸侯盡入關。嘲笑求仙祖龍有知亦應齒冷。

漢宮詞

閨苑瑤池路邈然。廷靈高築迓羣仙。豈知待詔金門客。偷墮塵寰十八年。連上一章神似義山斷句。

周杭字祖望江南
吳江人諸生

題倚劍牧馬圖

百金買一劍。千金買一馬。十年磨劍不得試。驅馬歸來牧巖下。憶昔錦衣狐白裘。身挾兩龍萬里遊。爾時意氣輕王侯。吁嗟丈夫有命那可說。紫髯如虬悲白髮。雄心難待馬生角。袖手應憐劍虛拔。君不見古來窮達變化猶飄雲。南山尚有射虎手。無人知是李將軍。劍與馬或合或分。結出飛將軍射虎大有英氣。

俞玉局

字爰心。江南無錫人。諸生。

題劍南詩稿

年垂九十恨誰知。腸斷偏安恢復遲。高孝光寧身備歷。滎河溫洛見無期。夢中拜手遷都疏。死後關心家祭詩。個是詩壇老方叔。壯猶彈壓幾偏裨。寫放翁忠心豪氣俱見。若第揚其詩。便爲凡手。○滎河溫洛中原所失地也。對高孝光寧四朝流走不滯。

翁

格字去非。江南吳縣人。諸生。

暮春

莫怨春歸早。花餘幾點紅。留將根蒂在。歲歲有東風。安分俟時。意言俱妙。

陸蒼培

字學起。江南長洲人。廩生。

詠懷

燕市相逢處。吟壇與酒壚。雲山萬里別。天地一身孤。元叟聊稱漫。儀曹自號愚。從茲懶求友。耕釣是吾徒。

五六承一身孤言之言自此無意求友矣學起見賞於輩下諸公故有是云

聞雁

夢斷空堂家萬里。酒醒秋夜漏三更。他鄉風雨此時急。獨聽南飛雁數聲。

殷再巡

字二南。江南常熟人。○二南受知於趙秋谷。曾爲點定其詩。

漢武帝

雲旌不動射蛟回。宴坐承華月滿臺。花發碧桃方朔過。窗開青鳥阿環來。靈壇夜靜光三燭。仙掌風微露一杯。萬里貳師歸絕幕。只盤天馬賦龍媒。

華龍翔

字丕光。江南無錫人。諸生。○予未識丕光。杜雲川太史爲予言。同人賦詩。丕光詩成。衆俱斂手。邑中才人也。後華生漢畿。授予遺稿。尋味之。果如雲川之言。

感遇

憂憂高岡梧。孤榦修以直。疎陰不自庇。蟲蟻爭蠹蝕。鏗然遭斧斤。謂是中琴瑟。朱絃徽黃金。綺囊護丹漆。知音世所希。俗耳聽若窒。何似摧爲薪。猶足供鼎食。言知而不知。不知不知也。此作者有激云然。

翠聲閣

雲壑架書巢。庭戶滿空翠。空翠本非色。尋聲復何在。淵明無絃琴。音在絃指外。獨坐泯見聞。悠然自來會。古云空翠難強名。翠中有聲。只可意會。不可注解。

恭壽先生于黃山深谷得杖一枝雙莖盤曲節目輪囷首尾仍合併爲一極離奇瑰異之觀爲作

短歌

恭壽之杖一而兩夏后雙龍落吾掌恭壽之杖兩而一駉蛩相合幾忘匹驪珠百六節可數追琢丁丁缺

鬼斧八年刊木徧神州遺卻黃山笑神禹或言軒轅丹竈多遺薪自注黃山有黃帝同浮邱公鍊丹處燼餘裂石蟠靈根雙

極競苗不相讓欲劈未劈成輪囷或言扶桑相糾老東溟孫枝迸出仍駢穎九鳥長喙日夜啄節目蚘虬

墮殘梗我來欲把不敢觸恐是生蛟遭縛束先生興至時捉之不藉雲駟駕雙鶴世途夔峽從崎嶇扶攜

直過三山曲都從一枝雙莖著意離奇詰風排蕩縱橫極才人之能事

示仲孫應和時將北上

牖下嗟吾老天涯憶汝單因人知不易行路敢辭難有舌囊宜括無魚缺莫彈饑驅爲客早惜別恨千端

劉瞻榕字于根江南無錫人諸生

春日田家

草廬負高阜柴扉面清池村居本安閒況值春風時春風果何心如與邱園私一夕逢好雨千頃新綠滋

朝來荷鋤出對此情自怡時運無或愆力田復何疑倉庚先已覺飛鳴桑樹枝春風之私正言其公語妙從杜詩中出

送須覲予還晉陵

啄粟野田黃口雀。盡日揮之苦難卻。翛然老鶴迥出羣。連軒矯翼誰能馴。春風樓前梅花白。看花君作西洲客。細雨冥冥梅子肥。鷓鴣聲裏送將歸。何須咎君言別早。客舍雖佳歸更好。一帆明日向東去。正是鄙夫心憶處。起四語與觀予之歸得六義之一。

馮嗣京 字留士。浙江桐鄉人。貢生。官長興縣學訓導。

上韓慕廬學士

門分洛蜀路多岐。中立如公總不移。進退每關天下事。襟期獨有聖明知。後堂長蓄公田釀。外國爭求賀雨詩。莫漫抒辭頌功德。卽論風雅亦吾師。一起四語與匠門先生暗合。時文懿公中立不倚。故詩家以此爲贈言。

宋匡業 字鼎來。江南長洲人。貢生。以子宗元貴。謚贈中憲大夫。○生平謙退。謹約。無疾言。遠色。遠近稱善人。性愛梅。詠梅詩成帙。茲取其尤高潔者。

庭梅

屋角冷雲破。橫空挺一枝。瘦應同鶴立。清似畏人知。寫影惟憑月。傳神不在詩。空山流水外。脈脈寄相思。以清畏人知品梅極見成語。從前無人道及。

梅花

不染紛華別有神。亂山深處吐清新。曠如魏晉之間士。高比羲皇以上人。獨立風前惟索笑。能超世外自歸真。孤芳合與幽蘭配。補入離騷一種春。傳梅之品。宋人踐徑。一掃而空之。

陳葉筠

字廷望江南崑山人諸生○廷望論詩斷斷唐宋之分有近石湖劍南者必排斥時共目爲怪人陳子樹滋獨推重之惜中道殂謝遺稿散佚采錄三章比之一鱗半爪也

張睢陽廟

喪亂逢天寶江淮障一身死甘爲厲鬼生豈負人倫卞壺拳還握萇弘血尙新靈旗風捲處猶似掃黃塵

厲鬼人倫卽用張中丞語神完氣足居然唐音

滇陽峽

一徑入峽口盤盤往復回煙橫兩岸合水劃萬峯開命託長年手魂驚亂石堆前途望不極何處越王臺

寄許子遜

不見南來雙鯉魚風塵落拓感何如偶過燕市悲歌地會上長沙痛哭書芳草天涯分曉夢暮雲江樹惜離居春深何處堪憑弔爲我攜尊醉望諸

張

琯字紫維江南太倉人

弔鸚鵡

雕籠悲越鳥飲啄豈無情本爲多言誤翻憐一死輕聰明應再世文采畢今生猶記南窗下春風自喚名

語語是弔

張嵩齡

字東嶼江南太倉人諸生

流鶯詞

日暮聽流鶯。流鶯啼不住。上苑春來又幾時。深閨夢醒驚何處。初聞彷彿在東牆。又見隨風出綠楊。睨皖枝頭明似翦。錦蠻樹底巧如簧。豪門爭擁顏如玉。斗酒黃柑共相逐。宛轉疑吹秦女簫。悠揚勝度吳孃曲。獨有高樓粉黛人。年年夫婿怨飄零。鴛鴦獨宿銀屏冷。倚徧闌干不忍聽。綽態柔情。初唐風調。

南昌秋夜

秋氣頻侵袂。空宵獨掩扉。愁來心易醉。客久夢難歸。燈燄牀頭短。蟲聲戶外微。起看烏鵲影。三匝向南飛。
比夢裏還家不
當歸更深一層。

程之鵝字羽宸江南歙縣人著有練江詩鈔。○練江遊踪幾徧大江南北及楚越東魯而登眺不倦尤在黃山故發而為詩多登臨憑弔之作同郡曹進士震亭與之倡和震亭多才不輕許可獨折服練江則練江之詩可知矣。子
篁友管庭寄遺集乞序因采而錄之。

蘆花被

不並青綾一樣看。祇從江上借秋寒。覆時應共鷗羣夢。卷處渾疑雲影殘。中夜月侵如有失。半醒霜凜覺無完。可知雪滿江南路。借與袁安臥更安。
三四正寫五六虛寫結意舊穀中春出新粒也。

曉過平望

半夜帆開遇好風。平明平望一湖通。人家水氣涵虛白。野樹霜華染淺紅。舵尾魚蝦吳市早。船頭歌唱越

吟工前途煙雨樓邊過。身入空濛羃畫中。五六恰是過驚脰湖詩移易他處不得

黃山

黃山三十六芙蓉。浴罷湯泉曳短筇。仙樂鳥名疑聞緱嶺鶴。鉢盂名峯欲象鼎湖龍。迷漫雲氣皆成海。穿穴峯

頭半是松。始信到來仍不信。天工理外若爲容。始知此詩布置之穩始信猶云到此始知也。不信猶言天

地間無此幻境也。兩層作一層故妙。

抵金陵

曉風策策柳毵毵。帆影遙天破蔚藍。一片傷心金粉地。落花時節到江南。六朝舊地已足傷心。況落花時節乎。全在神韻動人。

席

鎬字渭南江南常熱人。著有西墅詩鈔。

除夕感懷亡弟湘北

去年當此夕。步履過子廬。候門肅以入。列坐情怡愉。是時羣從集。燈火熒前除。兒童繞我戲。捋髭牽衣裾。流光如轉燭。景物與時俱。痛子竟長往。浮雲變須臾。弟兄我七人。強半歸坵墟。存者與子三。何堪返黃墟。在原愛由性。撫時感如初。百年洵難料。一歲行看徂。強壯子已矣。我衰當何如。直白說去情事最真。

周孝學

字孺仍江南吳江人諸生。

登穹窿絕頂望震澤同蔣香山作

吳中富名山。穹窿獨稱長。鬱律聳晴空。憑眺快無兩。茲來值秋霽。疎翠攬盈掌。行行躋笠峯。屏顏俯羣象。天平遙措笏。卑猶成覆盎。雲從嶺下飛。飛鳥不能上。西南臨具區。風濤相震盪。煙消螺髻浮。日落新鏡晃。混合天水色。分坻吳越壤。呼吸凌青冥。嘯歌脫塵鞅。何當尋赤松。相與出世網。

李

果字客山。江南長洲人。布衣。著有石閣集。○滄洲陳公羈管京口時。客山投詩造謁。公遂與定交。後大理李公因其謹慎。欲任以鹽筴。力卻之。及李公被罪。諸任事者皆罹禍。客山超然。人服其識。詩格蒼老。一洗肥膩。有一二字未安。屢改不倦。

晚年文譽震鬱。過吳門者爭識其面。幾以魯靈光目之。

示兩兒

初冬可讀書。披帷對月影。困窮亦何常。天意默示警。所期在遠大。忘此清夜永。經義纂孟荀。如汲得修綆。摘辭芟繆悠。百家足馳騁。蘊輝珠處淵。含英金在礦。世人競目睫。欲語還如哽。但求寡悔尤。焉用名炳炳。馬援屢聞過。柳玘重行己。吾家舊遺經。先德盛積累。黽勉無異營。頗識剝復理。中歲偶行遊。致汝業漸弛。我無一頃田。經籍足耘耔。義理苟能通。出處有根柢。醫藥與貨殖。困窮亦可倚。吾生少失學。垂老方知悔。展轉力就衰。炳燭思曉起。努力愛景光。汝曹從此始。首勉以窮經。次期以述祖。少年子弟共宜佩服斯言。

王將軍劍歌

神物鑄成干將手。三尺蒼龍半夜吼。七星吐燄燭銀潢。魍魎潛藏白猿走。將軍匹馬來疏勒。手握寒光邊塞黑。贈將海內有心人。風吹一片無情色。半行籀文不可認。血花點點荆卿恨。平生慷慨思報恩。尊前睚

眈何須問。

懷陳處士陽山

老臥天池嶺。寒松骨共蒼。人如陳仲子。詩是孟襄陽。有女尸蘋藻。無兒受縵緗。風流今已矣。忍更過書堂。

三語狀其孤介。四語表其清疎。

泛艇木瀆

晨光初泛艇。流水枕清酣。風定晴湖渺。雲生遠岫含。梨花明月寺。芳草牧牛菴。多景靈巖近。乘春取次探。

明月寺。牧牛菴。木瀆之佛剎也。加以梨花芳草。遂成名句。

晚菊

迎冬方吐豔。籬下竟誰看。豈敢傷遲暮。何妨歷歲寒。孤懷原淡泊。獨立未凋殘。遲爾風前落。騷人佐夕餐。

可當作者寫懷。

關山月

重關峻嶺鬱嵯峨。月色偏臨絕塞多。萬里寒生玄菟郡。三秋光射白狼河。黃榆風急傳吹角。玉帳沙明照枕戈。最是空閨音信斷。中宵愁聽隴頭歌。

范文正公祠

石筍排空山骨清。范公祠廟儼崢嶸。獨從天下關憂樂。尙想胸中富甲兵。晚穗迎霜遺斷隴。寒烏啼日傍丹楹。先皇銀榜龍章在。紅樹階前交映明。自注：康熙四十四年。聖祖題濟時良相四字。榜其祠。祠前有楓樹三十株。○憂樂甲兵。人人意中語。此嘉其安放之工。

韓 駒字其武。江南吳縣人。貢生。著有補瓢集。

趙忠毅公鐵如意歌

妖墓障日天地閉。代州戍卒性蠶桂。手中剛鐵尺二長。得共朱雲劍爭利。額圖星斗背弓彎。羅紋細蹙銀花斑。銘詞奇倔篆文古。彷彿鑄鼎昭神姦。百餘年來親手澤。古今義憤通呼吸。想當邊城起舞時。魑魅潛形鬼神泣。千秋正氣座右存。物因人重珍瑤琨。指揮欲落崔魏膽。把玩許招楊左魂。嗚呼明社久已屋。一器森芒奪人目。風前還弔宋遺民。擊將如意西臺哭。後半寫趙忠毅寫鐵如意。合并不分。結出西臺痛哭。義士忠臣。天然作對。

五人墓

英風颯颯繞迴塘。舊冢纍纍俠骨香。一擊自同椎博浪。百身何異痛三良。頭顱敢爲忠臣惜。販負能增黨籍光。變例春秋墓前碣。先人特筆凜嚴霜。自注：崇禎初。逆案既定。吳人共毀逆祠。卽其地葬五人。遺骸。先必得異人題碣。乃稱。大父承命。大書五人。之墓。四字。勒石墓前。噫。閣部大臣。屈膝闍寺。稱子稱孫。人道滅矣。書曰。人予之也。所以愧天下之不爲人者也。

高日新字健明。江南長洲人。諸生。

詠阮步兵

長嘯哭途窮。風流懷阮公。胸真多塊壘。時定少英雄。白眼相看外。黃壚酣飲中。步兵堪吏隱。誰與測冥鴻。
時無英雄。非指高皇。時謂魏晉間無人也。玩上句胸多塊壘。其意自見。

馬

位字思山。陝西武功人。官刑部員外郎。○思山貴公子。喜與寒士接。老蒼遇之。謂如飛鳥。依人。人自憐之也。詩品追摹李奉禮。時與神合。年方壯卒。豈天上又成白玉樓。又須作記耶。

湘中絃

水宮仙子湘江妃。芙蓉裳兮芰荷衣。張翠蓋兮搖雲旗。月光蕩漾煙霏霏。采芳洲之蘅杜。弄明珠於澧浦。老鼉擊鼓羣蛟舞。洞庭波兮秋風若。有人兮蒼茫中。九疑山青雲夢綠。千年血淚啼斑竹。

鸚鵡

吳音好鳥來隴西。翠衿紅背架上栖。金屋花深隔嬌女。紗窗如煙傳笑語。銀縑繫脛不得飛。人前飲啄矜毛衣。園中歌舞曉攜出。高挂綠楊迷一色。富家買爾巧舌聲。那聞布穀催春畊。
人每傷其文采。被累此。另換意作結。更高一籌。

程

樊字是若。江南山陽人。安東諸生。○是若抗心希古。矻矻於學。詠懷次章。其自寫襟抱也。乃年命不永。托之空言。惜哉。

詠懷

蘭爲王者香。芬馥清風裏。從來巖穴姿。不競繁華美。龜以告猶亡。翟以炫采死。不善保厥初。受患每如此。莘野彼何人。三聘乃一起。如何志士軀。輕用徇知己。
此爲荀文若輩言。要離聶政之流。又不在數也。大易慎其隨語。當深思。塵囂多稠濁。雲物俱不靈。所以山水間。往往有餘清。緒風發爽籟。幽谷舒芳英。草木覺生色。泉石俱空明。

余懷本貞素。對之神益澄。寧靜自致遠。何爲營浮名。

蕭趙琰

字揆三。江南宜興人。諸生。○揆三抱才不遇。年復不永。遠近惋惜。所存詩無幾。皆近食齋腸亦苦強。歌聲無懽者。言爲心聲。信然。

桂之樹

桂之樹托根君之墀。大火當昏鬱鬱離離。桂之樹結葉葉交枝。枝中有丹心。君不知。君不知。含情直待秋風吹。秋風吹君知之。卽張曲江丹橘一章。意音節古。使人不覺。

溪橋候月

候月荆溪口。初涼橋上生。星辰秋在水。河漢夜無聲。農火歸殘巷。漁家話淺更。興來忘所待。人影欲同行。星辰十字在賈長江集中。亦爲傑句。

過淨梵寺弔周瑜城

松濤聽不盡。鐵馬去何之。只有僧歸寺。更無人守陴。亂鶯公瑾曲。遠岫小喬眉。多少徘徊意。春風解纜時。五六語偶然關合。不覺其纖。

汪天與

字蒼字。江南歙縣人。官刑部郎中。有沐青樓詩。

西海門

鳥道直穿雲。不暇盤旋上。有時膝代足。手捫那容杖。目眩怯回頭。坐穩時一放。精神猶惚恍。心胸爲滌蕩。

力竭到峯巔。平衍神忽王。亟趨西海門。路轉光明藏。千峯劃然開。紫翠呈萬狀。夕陽在東麓。倒射芙蓉幃。誰爲問巨靈。仙窟何年創。石牀置碧霄。玉屏列丹嶂。雲巒一萬重。三神山在望。何須躡仙蹤。且快茲遊壯。

予登蓮花峯。有句云。四體失所司。目眩心忡忡。卽篇中有時。膝代足。手捫那容杖。二句意也。未經歷者不知此語之真。

穿鰲魚洞度蓮花溝上文殊頂

巨鰲潛海中。何年此遷播。古洞恆陰森。屏息不敢唾。僂僂穿脅出。延緣捫脊過。眼明一松橫。根穿石壁破。風雲看飛騰。江海幾掀簸。逕度蓮花溝。心膽寒無那。懸崖如泛虛。股栗神已懦。每涉懼不測。佇足欲相賀。降若探龍淵。陟如轉蟻磨。九地升九霄。始達獅子座。蓮花入雲開。蓮蕊日以大。迎送松依然。澗底龍猶臥。至此筋力疲。藉草一少坐。歷歷憶生平。久慣經坎坷。此間覺平夷。無須咎摧挫。度蓮花溝。由百步雲梯而所云九地升九霄。始達獅子座也。結意翻開。有無窮身世之感。

題雪莊和尚小照

雪莊開士居雲舫。三十餘年不下山。何事塵緣消未盡。尙留面目在人間。雪莊入都。見重朝貴。幾爲塵緣所縛。故作詩以風之。

吳瞻泰

字東岩。江南歙縣人。諸生。○東岩爲大司成。麟潭先生。長子。少留心經術。思爲世用。入省闈。十五終不遇。乃遨遊齊魯燕冀。及江漢吳楚。閩越之交。詩品日高。然以詩人名。非其志也。所

著有彙注陶詩。陶詩提要。刪補選注等書。

過虎村上芙蓉嶺

山深異氣候。四月正流淅。冰有夏蟲識。花無春鳥知。村寒烟不起。徑險杖難支。一線開天竇。芙蓉更擅奇。
猶是卽今河畔冰開日。正是長安花落時。意一經錘鍊。更覺迥警。

宿松谷菴聽瀑

向晚投松谷。青蒼夾洞門。沙流侵客屐。笏迸出雲根。凍雀千林靜。飛濤萬壑奔。一宵疑驟雨。起坐見朝暾。
自題蓮花峯頂試泉圖

萬仞青蓮上。梯雲爲試泉。誰將一勺水。引上九層天。氣帶流霞色。香無下界烟。茶經會品未。興發自吾先。
起步與王右丞萬壑樹參天一章同一起法。

送洪去蕪入黃山度歲

怪爾衝寒入杳冥。一筇萬里破空青。雷奔石底晴看雨。人在空中夜摘星。喜就溫泉除宿垢。懶將仙筴問山靈。鼎湖龍去留丹竈。元日朝參紫玉屏。
空中摘星。登黃山時真有此景。度歲只未一點自高。

計元坊字維嚴。江南吳江人。○維嚴爲甫草先生之孫。希深同學之子。經自好。詩有源流。雍正甲辰訪予於葑溪老屋。不值而返。寄詩三章。已臻古淡。今雖散佚。每一追憶。如塵如夢。不勝憫也。

勵志詩

青青園中林。並望成嘉樹。或者干雲霄。或者苦顛仆。豈真托根殊。亦異灌漑故。人力不滋培。棟梁安得具。

而何蚩蚩氓。榮落委天數。見大有爲者貴以經術。培其本根也。通首比體。

士人乏奇才。動輒咎貧賤。豈處貧賤中。抱負遂難見。曲逆方宰肉。一鄉已稱善。諸葛當躬耕。三分定佐漢。

內反無足憑。氣餒徒炫亂。不見玉韞山。與石自有辨。貧賤中正可樹立根。基激有志氣人不淺。

鳩毒惟晏安。古人戒自適。所以陶士行。運甓日累百。破賊石頭下。精勤由素積。奈何卑棲士。嗜懶如有僻。

志爲氣之帥。志銳氣自役。願師聞雞人。無蹈嵇阮迹。南朝八達流弊。足壞士品。足壞國家。標出陶侃劉琨最有定識。

述興

人方危苦時。薄施輒感德。自昔奸雄輩。持此羅上客。蔡邕依董卓。有才而無識。受恩旋殺身。士貴能挺特。

所以孟夫子。備醜戒樂克。見因不失親。不輕受人惠。

徐志巖。字象求。浙江德清人。歷任開封。北河。郡丞。著有抑齋詩稿。

謁張文獻祠

曲江風度遠流徽。姚宋同心日並暉。金鑑果能陳黼座。玉環何事繫羅衣。貶官荆楚緣持正。遣祭邱墳爲

見機。自注。早識安祿山有反相。請誅之上不聽。古廟肅瞻松柏下。藹然遺象見依稀。唐五行志。術士徐遐。周詩曰。若逢山下鬼。環上繫羅衣。卽馬鬼之讖也。三四見信用。

曲江必無六軍不發之禍。

卷三十

高述明字東瞻滿洲人東軒相國兄官至涼州總兵

塞外

雲暗難分騎。沙深欲陷車。炎風初解凍。夏草漸萌芽。義勇心能一。尊嚴令不譁。樓蘭猶未斬。那敢顧身家。
人日塞外馬上口占

馬蹄猶得蹋黃塵。馬上猶吟塞外春。只謂此身常近鬼。豈知今日又逢人。綵花翦細風光舊。沙海雲開氣象新。便擬題詩寄良友。草堂何處轉傷神。寫人日切定塞外。便能作驚人語。

高 斌字東軒滿洲人官至大學士。○東軒相公研窮易理居己廉靜待人以誠與之交者必使之得其意而去所謂休休有容者也。詩多說理而不腐別於白沙定山一派。

次韻奉和西林先生

忠信良非易。好學古所難。緬維顏夫子。得善斯拳拳。固守幾於化。深造居乃安。哲人亦已遠。勉矣士希賢。讀書必自期。責己何敢寬。西林有美人。悵望青雲端。

鮑 鈔字冠亭奉天人官海塘通判。

范忠貞公祠自注公贈太子少保兵部尚書嗣君亦由浙閩制府歷陞大司馬。

當年閩海見傳烽。犀兕空多棄甲重。大節並推顏魯國。孤忠直繼段司農。碑題峴首留殘碣。世握兵符踵

舊封應與睢陽同廟食。堂堂授命盡從容。歷無一字無來。便是好詩。

李 鏘字鐵君奉天人著有多青山人集○多青係助臣後當得大官乃借其配隱於盤山既老歲一至京師然一二日即歸人罕見其面詩古典峭削自闢門徑高者胎源杜陵次亦近孟東野。

江南

江水是弱水。久已沉羽毛。江水是江水。我豈無輕舸。中流雙鴛鴦。唼波影凌亂。鴛鴦且莫飛。我有好鍼線。繡在合歡被。與汝日相見。古意古音。

當來日大難

駕青驪。驂駁牛。西上臯蘭山。直入崑崙邱。求西王母不可得。歸來還作人間遊。人間逼仄來日幾何。但見北邙之山。如楊如麻。纍纍坡塚皆誰何。昨日。對酒當歌。只末二語見歡樂之境不可常也。若從歡樂說到喪亡便直而少味。

項王祠

白蛇斷。烏騅窮。海內莫敵隆準公。百二小兒歌沛中。霸氣汨沒三戶空。眼中成敗勢即判。大王叱咤終英雄。楚雲沉沉壓祠宮。千秋伏臘猶鼓鐘。鼉龍叫嘯寶劍血。草木慘澹雲旗風。乾坤失意丈夫淚。大江日落寒濤東。落句妙於寫景。含卻無限蒼茫。即駱賓王易水結法。

聞歸雁感賦

畢竟家何處。而云北是歸。高城殘照下。萬里一行飛。風急毋相亂。沙寒定有依。畸人方失序。緣汝淚沾衣。
竟似出杜陵人手。所云四十字。字字皆君子也。能事全在起結。

新秋雨中塞曉亭侍郎招飲署齋卽席分賦

飛鳥無心惜羽翰。遊魚隨處狎波瀾。於人豈敢行藏異。好我何妨禮數寬。頭白親知稀握手。酒深風雨一憑闌。年光向晚貪高會。已醉遼東管幼安。

陳景元

字石閭。奉天人。布衣。○石閭甘老布衣。恥言名利。交與惟李彥青幾輩。不妄交也。雷副憲貫一視學浙中。成懷五布衣詩。石閭居一卽石閭可知矣。詩亦清矯不凡。

詠懷

高閣臨清池。明月當天心。萬有坐消歇。可以鳴幽琴。上絃來別鶴。下絃起龍吟。夜靜天地清。指中出正音。不惜操縵苦。持此感人深。
夜靜十字。寫琴理最高。

嚴陵釣臺

釣臺臨絕壁。巒壑抱幽深。一片桐江月。千秋出世心。獨尋高士蹟。忘卻客星沉。予亦懷微尚。徘徊聽瀨音。
不著議論。嚴陵之品自見。王貞文作後。應推此篇。

古北雜詩

昔者楊無敵。英名代朔聞。我來北平右。人指令公墳。尙勇兒童拜。酬神酒肉分。邊庭重死節。不祀李將軍。

可以
教忠

山夜

登眺忘疲茶歸來約四更。人依山鬼宿。星代月華明。入寂無昏旦。觀心一死生。野溪流不斷。風定夜聲清。

高

岑字峴亭河南商邱人官豐城知縣○峴亭爲宋商邱冢宰外孫故詩有淵源歸田後學力尤進

秋日書懷

江城木葉已翻飛。深巷蕭蕭獨掩扉。北鴈應知書有淚。西風不管客無衣。他鄉歲月秋難遣。故國親朋日漸稀。坐盡殘陽燈火上。滿天雲影望依依。

暮春送別

飛花萬點撲征衣。南浦依依怨落暉。腸斷離亭煙柳色。留君不住共春歸。送別送春於一語中兼到

姚世鈺字玉裁浙江歸安人諸生

將至揚州與家人病中別

暮齒千行淚。新年百病身。自然憔悴盡。何待別離頻。藥裹關心勸。衣裝倩手紉。平安早相報。江上有春鱗。

哭女

十歲言詩有性靈。木蘭愛說替耶征。黃泉不是黃河水。聞否耶孃喚女聲。卽從木蘭詩中生情觸手生哀高於微之哭子諸作

貧家生小儉梳妝。竹筒練裙少盛裝。繡得羅襦幾回著。送終猶是嫁衣裳。

傳業方今羨蔡邕。慰情那更比陶公。明知此恨古人少。哭女偏當無子翁。

哭女可哀。無子哭女。倍難爲懷矣。句中兼寫兩層。

姚世鈞字炳衡浙江歸安人諸生

饒州舟次獨酌醉後放歌

東風吹我來饒州。因循又作兩日留。乍晴乍雨天氣換。一杯聊復消牢愁。寓形宇內一瞬耳。雙丸穀轉如浮漚。春來秋去陋鷓鴣。朝生暮死嗤蜉蝣。我今頭顱歛老大。蹉跎壯志無一酬。尋章摘句守矩矱。庾辭謎語工雕搜。有時隨俗恣諧謔。浩歌一發商聲謳。賈生淚忍但暗下。班超筆在仍空投。芸牕俛首歷幾稔。幽憂之疾無從瘳。鶯花三月辭故國。飄然來作南楚遊。衝風踏浪無不可。三千里路望阻修。蒲帆十幅釣臺轉。輕舸一葉錢塘浮。饒州自古稱上郡。土地則廣人民稠。鄱陽瀕洞恰繞郭。瑞芝峭削纔當樓。茲遊信宿敢易視。湖山暫向筆底收。遠涉思入女兒港。近眺擬泛琵琶洲。左挈偏提右不落。狂呼驚動東西舟。遙汀魚跳刀潑刺。垂楊風捲絲颼颼。水天下上黑如漆。嚴城俄報三更籌。醒無人勸醉莫管。兩行銀燭開雙眸。丈夫意氣貴卓犖。安用狹隘趨時流。周身會須羅千騎。當車只合擁八騶。七尺之軀三寸舌。不取相印終封侯。吟成自笑還自泣。金尊重舉澆詩喉。身行萬里從此始。浩蕩莫讓波間鷗。如潮之洶湧。如風之飄忽。抱才如此。而年命不永。何哉。

邵

岷字百峯江南元和人諸生○百峯少歲作詩汨於異說總以險怪為主後為劉君東郊女夫

而遺稿散軼歎息彌襟

趙忠愍公得諡詩

滇南侍御人中傑。氣如虹霓耿不滅。壯猷早著翦萑苻。正色俄看冠朝列。維時明祚丁未造。劫火燒天百川竭。弄兵劇賊覆神州。食肉謀夫營蟻穴。可憐國事無可為。但見乾坤日流血。閹人夜半開九門。百萬黃巾擁丹闕。君王披髮殉山河。宰執全軀效臣妾。大臣命重小臣輕。勁草何知疾風烈。一呼巷戰千人靡。身首分餘立如鐵。但教心與赤日懸。肯惜身隨天柱折。腐肉馨香何處歸。愍忠寺畔埋冰雪。風雨猶聞嘯國殤。滄桑未許磨殘碣。易名鉅典隆聖代。特采嘉言表奇節。百年幽泐一朝顯。六詔山川增皦潔。丈夫七尺即泰山。取義成仁在勇決。不爾芳名何卓絕。君不見同時多少偷生人。一念蹉跎成瓦裂。趙侍御名諱雲京師時巷戰而死藁葬愍忠寺側章皇帝旌表范景文以下諸忠臣因無人奏請偶然遺之乾隆中補諡忠愍此詩凜凜有生氣令讀者如見其銜鬚受刀時

過鹿角岔

橫空斷壁疑削成。上有一罅通人行。左旋右折盤空曲。鋒稜峩峩欲來觸。蒼藤古木相結纏。白日不到陰崖前。征馬哀鳴僕夫瘁。果然蜀道如登天。憶昔搖鞭過劍閣。逸氣飛騰小川嶽。那知垂老瘴江遊。萬里羈魂銷鹿角。

送友出塞

離笛作邊聲。憐君萬里行。雪埋光祿塞。雲起赫連城。地入龍沙闊。身將馬革輕。封侯原素志。去矣莫沾纓。

秋戍

寒信回窮漠。懸軍尙朔方。殘旗孤壘月。哀角五更霜。榆葉飄金甲。邊風裂箭瘡。黃花猶未解。七尺委沙場。

語語捶鍊而出。捶則聲響。鍊則字新。

將之成都

萬里魚鳧國。青春別恨長。行行穿鳥道。寸寸斷猿腸。人以風塵賤。詩兼鬢髮蒼。謀生宜道路。從此問蠻荒。

謝淞洲字滄湄。江南長洲人。布衣。○滄湄畫師。元人。得四家意趣。精於鑒古。世宗皇上出內府所藏命其鑒別。一一不爽。世宗善之。詩學以天趣爲貴。不加鑊琢。猶畫中之元人也。

田家雜興

深村犬迎吠。曙色行者稀。歸人自城市。負荷返柴扉。耒耜頗整理。蓑笠亦庶幾。朝來撥春隴。泉脈流微微。

菖蒲亦已生。屋角梨花飛。物候有如此。東作慎無違。

曉色起隴畝。荷耜還西林。悠悠清溪水。自識沮溺心。林際半新月。村靜聞遠音。何人柴門下。慷慨隆中吟。

未知千載事。好風開我襟。忽持一尊酒。蒼然白雲深。五言古二章。俱歸自然。無時下儉氣。

寒夜

含淚別鄉人。翻然作遊子。枕上聽猿啼。家鄉五千里。

吳定璋字友篁江南吳縣人太學生○友篁成七十二峯足徵錄表章具區文獻吾黨有心之士也詩不分唐宋以新穎為歸時有名論與翁君琢山稱東山二家

見雁

北雁亦無情。叫月自南去。欲將一行書。托汝遙空寄。遠影沒橫雲。悵望銀河曙。言短韻長

讀文信國題顏魯公祠詩碑

丞相徵兵汗馬馳。魯公祠下特題詩。不圖一旅勤王地。同此空笄冒刃時。慷慨悲歌存正氣。淋漓碧血滿

桓碑。兩賢心事真千古。落日西風戈欲麾。生枯俱下之筆信國魯公一齊並見

補袞圖

杏花紅鎖玉樓人。拭拂山龍日正春。願得聖朝無闕事。不煩纖手號鉞神。

黃子雲字士龍江南崑山人布衣著有野鴻詩稿○野鴻天賦俊才少歲詩無一語平庸無一字輕浮真堪壓倒元白中年後成詩的上下卷龍標太白昌黎東坡概為麾斥以下更不足言而

已詩頹放前後如出二手矣茲所錄者皆舊稿中作予珍重之又復惋惜之

舟行望南韶諸山

出關青不斷。天地日偪窄。連峯塞東南。顯晦錯朝夕。峭摩層穹心。窟壓厚坤脈。壁面劈洪荒。瘴色向人射。羲陽迴六轡。照見靈斧迹。輪囷長鯨鬣。嵌空老龍脊。血埋霓影紅。蘚蝕銅花碧。女皇補天後。狼藉五色石。

哀壑慘光晶。沆漭玄雲積。乳竇濺瀑絲。一泓耿幽白。中峯石扇開。直下雷聲割。枯杉皮復甦。臥柏腹全坼。落日風泠泠。山鬼攝人魄。下土徑絕蹤。邈與人境隔。我行踰千里。丘壑興轉劇。逝將凌紫崖。逍遙鍊金液。此意恐未然。一身有驅迫。扁舟轉瞬過。回首已夙昔。

臥鐘

臺城越西隅。蕭颯秋巖清。金鏞臥不起。巖菴如長鯨。歲久厚地裂。半與泥沙平。下壓黃泉脈。上騰白虎精。虛中廣百圍。出入縱橫行。不知何代物。漫滅無其名。碧埋鬼血鮮。紅蝕土花縈。日月光摩盪。風雷力支撐。對之不敢叩。肅肅棲神明。正始久歛絕。甘同秋草并。大寶關天意。顯晦非人爭。廟廷奏簫韶。世自求其聲。借臥鐘以寫奇才不遇也。沈鬱整肅。得力少陵。○鐘係永樂二年姚廣孝監鑄。一鑄京師。一鑄金陵。詩中云。不知何代物。未之審視耳。

畫鷹自注元阿爾裨繪

軒軒摩空翻。忽入堂楹內。四壁黯光晶。蕭瑟若野外。委形是何年。畫師阿爾裨。苟非大匠手。筆力何超邁。至今天風入。如聞解鍔帶。金眸左右動。輝耀練光碎。亦知邊秋至。毛骨癢生疥。燕雀聲啾啾。懼其轉睛快。聳身欲著人。座客悄懷退。猛氣莽崢嶸。颯與雲霄會。恭惟丹山鳥。大聖自仁愛。緜邈煙霧際。不乏梟獍輩。何由厲霜飈。搏擊清草昧。顧盼粉墨姿。陡覺雄心在。斂翮難飛騰。中懷空抑噫。此章如竟出少陵手矣。至今天風入以下數言。鋒稜

神氣俱到。

蔣子空水刀歌

金甌颯颯霜天高。高堂白月明秋毫。錦袖掣開寶刀露。蔣侯直立欄前操。此物來自海西國。影落洪波斷。鼇極不知何代降。元精使我白帝生。顏色迴看天地莽。崢嶸晶光所向無。留行五陵俠客久。錯莫牀頭夜。吼聲鏗鎗。銅花拂拭蒼鱗碎。將軍戰血餘腥在。鋒鏑摧崩鼓角前。精靈蹶踣風雷外。此時起舞月光寒。雪龍掉尾凌空翻。泰山欲倒海水立。二十八宿皆離垣。玉關殺氣連穹昊。安得西走咸陽道。天生神物豈沉淪。歎息風前我將老。

梁樂亭日本刀歌中云抽出天上星搖搖歎爲奇杰篇中此時起舞以下四語怪偉生動正復不讓前人

山中守歲歌

山屏淒淒煙日暮。瞥眼新年年復故。還欣齒髮未盡凋。頗覺村園亦成趣。黏戶重書鬱壘符。插簷高折冬青樹。茆堂灑掃豁心顏。博山一縷沉香煙。廚門之東出新婦。手捧炰膾盈盤餐。大兒隨行主家祭。稚女移燈封井泉。中天空光若電掃。知是鄰家共迎竈。僮呼如願未移時。山妻亦媚西南奧。繞室鑪添松火溫。一枝梅破冰瓶笑。黃昏促席飲屠蘇。上座居然屬老夫。我家瓦盆盡陳列。興酣小大相歌呼。遭逢苟非堯舜世。腐儒安得歡妻孥。來朝天子朝元初。誰補函風守歲圖。

度仙霞嶺

鳥道紆迴上。猿聲縹緲聞。峯盤三百級。身入萬重雲。天地閩中險。陰晴嶺半分。出關盡蠻語。端合作參軍。

大洋

不覺舟如葉。隨風入窅冥。潮來天宇白。日照海門青。孤嶼遙相認。危檣覺有靈。中流撫身世。萬里一浮萍。
時徐激齋太史奉命冊封琉球野鴻隨行故有大洋望海諸篇境奇詩安得不奇

那壩望海

大塊更無外。鴻濛混兩間。龍行何處雨。蜃現別洲山。一氣涵諸夏。層波走百蠻。茫茫萬餘里。仍向此中還。
一氣涵諸夏。五字中包括九有。

孟廟

歇馬餘殘照。循牆謁闕宮。冠裳王者並。俎豆聖人同。戰國風趨下。斯文日再中。低徊撫松柏。惆悵仰龜蒙。
不黏著孟子七篇及孟荀世家卻一字不可移易自是作家手段

毛氏園觀牡丹

十畝芳菲宅。名花最後看。乍疑春欲醉。可愛露難乾。倚日自矜寵。迴風不受寒。藥闌頻徙倚。吟望夕陽殘。
脫去習語。方許作牡丹詩。

題太白樓

文章睥睨世無敵。湖海飄零氣轉遒。六代詩壇餘此席。一江春色獨登樓。爲君天特開青嶂。題壁人今亦

白頭猶有浣花祠。屋在懷鉛直欲錦城遊。全在對偶。欲側處見長。題太白樓。卻有自己在也。一結即乃所願。則學孔子意。

翁

照字朗夫。江南江陰人。太學生。著有賜書堂詩文集。○朗夫小心敬慎。雖僕隸下人。不衣冠不見也。事上接下。以誠以禮。稽高二相國。先後以鴻博經學薦。皆不遇。與予相約。為耦耕伴侶。

結廬有日矣。乃倏焉殂謝。友生為位以哭。多失聲者。少年詩專工佳句。後漸臻老境。識力俱高。有虞伯生老吏斷獄之目。

詠史

周衰政不綱。征伐強侯擅。霸業復陵夷。私門勢強悍。三桓七穆興。魯衛勢衰悞。六卿專晉權。揚水為之先。爭強互相吞。三晉六國半。俱酒為家人。倒置履與弁。如何周威烈。封侯遂其願。壞法自天朝。史筆昭獨斷。司馬續春秋。豈獨重辭翰。分封三晉。壞法亂紀。自王朝始。以司馬溫公資治通鑑。記始於威烈王二十三年也。○俱酒晉侯子。趙襄子廢為家人。

秦趙會澠池。相如稱勇智。秦人詐不行。趙亦嚴兵備。瑟缶互相擊。計實同兒戲。何不講戰守。乃以人國試。沛公赴鴻門。累卵危不啻。項莊劍已拔。亞父玦屢示。如廁間道歸。偶值猛虎睡。輕兵躡其後。釜魚那能避。不見楚懷王。留秦死秦地。見詭謀。雖倖成。不如議戰守之正也。以楚懷王入武關。客死於秦。作證義尤顯然。

嬴秦失其鹿。羣雄互吞齧。沛公能任人。左右有三傑。炎威既絕張。西楚遂灰滅。一朝飛鳥盡。良弓自摧折。功人既囚繫。功狗焉望活。而胡豐沛遊。歌風起激越。韓彭並菹醢。猛士懼流血。誰願守四方。保身自明哲。

韓彭菹醢。後而思猛士守四方。誰願為韓彭續耶。漢祖歌風。乃無聊之詞。非有悔心也。命斬樊噲。更在歌風之後。

武皇重經術。發策策賢良。廣川抱碩學。天人語周詳。賈茂董更醇。治道通陰陽。而胡命世材。出俾相驕王。

守正端軌則。推誠化披猖。留滯終外藩。稍異投沅湘。曲學阿世人。升之在廟廊。漢業不復興。格心誰周防。

葉公空好龍。見龍乃張皇。

策賢良欲得正人輔翼也。而柄用者偏在曲學阿世之公孫。欲望漢業之醇。豈可得乎。

文成五利封。尙主亦不惜。謂世無神仙。佞喬在咫尺。文成五利誅。駢首如羊豕。謂世有神仙。所言皆妄耳。

金銀宮闕間。可望不可到。清心守環中。無爲領衆妙。而況至人徒。修短非可校。不朽超形骸。千秋光遠耀。

清心守環中。老氏要旨。神仙之說不足惑之也。未見顏子早夭。千秋不死。議論更高一層。

孔光譖王嘉。浸潤致之死。馬融排李固。承順權臣指。兩人擅聲華。素推經術士。忽焉好惡乖。交口肆詆毀。

失已違本心。媚人求貴仕。平生讀何書。適佐貪且鄙。一念入奇邪。百世人不齒。願爾顧修名。慎勿汙青史。

心術不正。多讀書無益也。孔光馬融。懸爲鑑戒。後王半山亦以經學誤國。豈經學果誤國耶。

送歸愚沈少宗伯予告歸里

片帆潞河來。相值在泚水。知公予告歸。南雲指故里。敬讀御賜詩。千丈榮光起。載賡洵一德。眷注情無已。

遭逢媿虞唐。進退善終始。公歸有程期。我老失準軌。離筵布南池。

自注杜老詠詩處。

鳴蟬綠陰裏。無計更挽留。去

去波如駛。但願南風狂。維解舟仍艤。憶昔初識公。其歲當壬午。兩地合雲龍。僑札通縞紵。吳門與暨陽。來

往互賓主。矻矻商古今。硜硜訂出處。龍躍終升天。雲散難作雨。遙遙兩地分。間隔寒與暑。雲龍今復合。情

深逾昔者。叶齒增易驚惕。道進無違拒。相期同惜陰。晚節師侃禹。

送公歸去來。悠悠返荷屋。作社赴雞豚。約伴同樵牧。弭權香水溪。采芝硯山麓。誰識衰冕儔。依然抱黃犢。道充輕祿位。天定歸淳朴。我將還故林。老去愛雲木。三十三山間。結廬臥空谷。公能復來過。江臯路應熟。念舊話前程。草堂夜同宿。無世俗酬應氣。以道相與礪。堅晚節。今人中古道交也。

蓑衣

記得寒江外。曾披上釣舟。煙波雙鬢老。風雨一身秋。戴笠偏相稱。垂竿亦自幽。嚴陵如愛此。應不著羊裘。
佳句。○帆影云。殘月半痕。巫峽曉。夕陽一片洞庭秋。與友人尋山云。友如作畫。須求淡山似。論文不喜平。皆鮮新可采。

將之北河留別

織就文禽作對飛。一篝燈火久相依。耦耕當日言猶在。佐讀終年計轉非。但使我能拋犢袴。肯教君更泣牛衣。料應不學蘇家婦。金盡歸來也下機。比孺。仲夫婦同其清節。兼之風韻。一結表所配之賢。

贈沈侍御椒園

展卷光騰五朶霞。摠由忠愛發精華。詩宗杜老能憂國。文泝昌黎屬大家。午夜疎燈焚諫草。春風小驛見常花。自注。白傳有常花驛。見楊八題夢。兄弟詩時難。兄樛莊。晤鄒平驛中。懸知兄弟聯吟處。添得新詩護碧紗。

梅花塢坐月

靜坐月明中。孤吟破清冷。隔溪老鶴來。踏碎梅花影。選中五言。斷句。俱近唐人。

錢源來字清許浙江嘉善人諸生

少陵草堂

飄泊干戈後。爲堂傍水涯。三巴五畝宅。千古一詩家。無復臨江樹。猶存覆地花。危樓當北斗。想像望京華。

卽於草堂上表其忠愛何等自然

楊

濬字瞻衡江南崑山人諸生。○瞻衡處困窮。有客欲招之北往。已卜期矣。緣其配病癩。不能往。一二年。夫婦並寒。餓死。文人之厄。此爲尤甚。

落葉

秋聲一夜撼林柯。極目江潭悽愴多。北雁已辭邊塞月。西風初起洞庭波。飄零愁結蘭成賦。搖落深悲宋

玉歌。忽憶故交征棹遠。翻飛如葉度關河。通體旁觀比擬搖之曳之。視肥賦者有生死之別。

韓忠武王墓

古碑崒崒倚荒丘。宋室存亡仗運籌。十萬敵兵來假道。八千驍騎截中流。爲慙南國輸金辱。聊向西湖縱

酒遊。埋骨青山遺恨在。寒風落日戰松楸。是韓忠武京口之戰。不可移入朱仙鎮。順昌和尚原等處。洵推能手。

李

進字亦吾江南華亭人。諸生。著有西枝詩稿。

暮秋訪何雪芳城東讀書樓醉後題壁

城上高樓俯碧波。樓頭小住病維摩。蕭疎紅樹半溪冷。偃蹇青山兩岸多。抱鄰目中無管樂。苦心句裏有

陰何與君且酌匏樽酒。明月鈎簾一放歌。五語高其抱負。六語表其詩格對仗工整。

追悼友萍次立甫韻

門巷蕭條冷若冰。城南一過恨填膺。誅文作自先生婦。遺稿歸於後死朋。白注余近輯其詩文。絕壑窮巖開面目。唐

風宋格辨淄澠。那堪池水都成墨。博得生平硯癖稱。

過春山字湘雲江南長洲人諸生。

過吳竹嶼園居

雨後遙山色如洗。蘿逕無人暝煙起。露滴荷衣生暮寒。抱琴獨宿秋聲裏。爲君一鼓滄浪吟。萬壑千巖流水深。何處夜猿啼不斷。西風蕭颯引離心。

題石湖煙雨圖

林風吹雨川光暝。遠岸鷗鷺點秋影。小樓人宿水聲中。一枕溪雲孤夢冷。我本滄洲舊散仙。蘋花零落五湖船。如何對此不歸去。七十二峯空暮煙。兩詩脫盡塵氣。比之白沙寒流。清澈見底。

周永銓字昇逸浙江錢塘人蘇州籍諸生著有東岡詩鈔○昇逸修己自好如處子然及發言爲詩逸情雲上直欲希風開寶以仰窺漢京友生中不易才也五十餘不肯見人惟家方舟與余過之談諧不倦予通籍歸里後并不能一見矣時或議其爲僻疑其爲矯余益重其爲人。

西崦舟夜

疎星綴林端。殘月懸峯缺。環嶺抱迴谿。巖燈遠明滅。身落五湖濱。孤舟夢松雪。

義卒行

有客爲余述杭州某姓卒代兄戍滇事。余高其義。作義卒行以紀之。時康熙五十八年春二月。

慘慘堂前紫荊飛。飛原上脊令。桓山之鳥欲去而哀鳴。苦哉遠征人。陟山望親還望兄。嗟嗟行役萬古情。

一彼少年者。色何黯然。娶婦未三月。昨來黃紙到官行。將出戍南滇。歸告阿母。阿母叫天新婦口噤目眵。

俛俛不能前。二解小弟前致辭。母兄且勿悲。阿母生我二人。兄今有嫂未有兒。何得遠去存沒未可知。弟當

代兄役。門戶兄自主之。三解阿母兄嫂聞言淚下如綆縻。大兄前致謝。此事甚非宜。感君區區懷。我心已再

思。熟知此別異苦樂。何乃反累吾弟爲。切切相勸止。但言兄嫂勿復疑。四解翻然出門去。意氣何慨慷。別我

先人墓。辦我行子裝。佩刀三尺餘。挽弓三石強。弓刀及戎服。羅列東西廂。親戚走相送。酌酒歌同裳。五解晨

興拜堂上。骨肉相悲切。臨行囑兄嫂。欲語復嗚咽。但得兄嫂一心善事阿母常喜悅。萬里羈人慰愁絕。六解

收淚就長道。關山別思重。白日結愁雲。至情感蒼穹。之子識大義。行當早立功。歸報皇帝陛下。無煩遠顧

蠻中揚名史册垂無窮。七解○義卒爲兄嫂言。兄答義卒言。義卒復答兄嫂言。敘述如面語。而卒之義勇孝友一齊俱見。與木蘭替耶事可以並傳。

鯀溪吟贈歸愚子

鯀溪溪水清且漣。鯀溪水與吳淞連。吳淞片帆挂雲樹。直到鯀溪屋邊住。君家在溪側。我家在江邊。溪光

江色兩瀟灑。往往相思乘釣船。自從我卜城東宅。送君翻作朱方客。君去幾開溪畔花。君歸還臥溪邊石。我來訪君溪上行。溪水迎人如有情。門前問字多俊英。堂上論文皆老成。高齋學士定誰屬。被褐先生方自名。只今五十頭未白。閉戶著書聲籍籍。生徒自重沈雲禎。時俗那知王彥伯。愧我與子稱莫逆。濩落相看感今昔。空憐早歲誤儒冠。徒爾窮年抱遺冊。君不見鱖魚門外水繞村。田居蠶室好稱尊。與君一詠滄浪曲。世事悠悠何足論。此余五十時贈言也。徘徊曲折。一往情深。佳處全在音節。

關山月

一片關山接塞天。愁看白月迥臨邊。寒侵古戍秦城遠。暈逐連營漢陣圓。少婦樓頭鸞鏡合。將軍帳外玉弓懸。金波盡入征人淚。回照鄉園路十千。

京口聞雁

楚雨迷紅樹。吳霜老白蘋。一聲京口雁。愁殺渡江人。二十字抵人千百言。唐人後稀見此種。

擬唐人邊庭四時怨

望斷陽和到雪山。故園花月夢刀鐮。漢家雨露提封外。春色遙應度玉關。翻王之渙黃河遠上篇意。何等溫厚。
草生邊地夏初回。暑雨乃耕白漠開。愁殺赤亭飛鳥斷。行人何事火山來。
昨夜西風入戍樓。前軍移帳急防秋。陰山獵火龍沙月。同照征夫出塞愁。

萬堡雲迷朔氣凝。雪深馬足失超騰。渾脫駝終歲防飛渡。況復黃河十月冰。見邊防之宜急也。視盧弼原辭四章。幾欲突過。

擣衣曲

一夕涼風秦女機。砧聲不待雁南飛。誰知萬里黃雲戍。已有新霜上鐵衣。總能自出新意。

周

準

字欽萊。浙江錢塘人。長洲籍。諸生。著有迂村漫稿。○迂村以迂自信。亦以迂自安。生二十餘。襄糧攜筇屐。游武昌。沔漢等處。與盡而返。不謁一人。後聞佳山水。必往遊。既老。之京師。一如

遊南漢時。昔有人問高僧曰。京師許多人。僧曰。只兩個人。一為名。一為利。迂村超然名利外。是京師有三個人也。與余同輯本朝詩。皆蓋棺論定者。臨終含笑。謂所親曰。我幸甚。我詩可入別裁集。

中矣。詩宗法唐代以前。五言古七言絕尤善。

宿靈隱寺梵香閣曉起眺望

晚從冷泉遊。遂止招提境。入門聞清鐘。孤閣夜方永。傾耳聽泉聲。聲喧意彌靜。朝來小雨過。宿霧散高嶺。

憑窗見層峯。澗壑殊清迥。不知曉雲過。但覺衣裳冷。清飈動林薄。初日照山影。行當訪韜光。直上松雲頂。

聲喧意彌靜。深於山水者得之。比蟬噪林逾靜。較有味。

賦得古別離送鄭子

勁羽乏羣棲。轉蓬靡暫息。伊人貧困士。能無去鄉國。辭鄉阻長川。旅迹殊可憐。昨別俄六載。斯遊定幾年。

遊蹤渺無畔。淮水連河岸。迴瞻雲樹深。忽忽興長歎。雲外指京畿。秋風冷客衣。可堪聞塞雁。正值向南飛。

結語淡淡離情。於言外遇之。

發朱砂菴逕觀音巖登石人峯

言探黝山奇。早別朱砂石。升厓得險境。指示深悚惕。熟遊尙色變。何況遠來客。凌空四無倚。投趾不容隙。壁削緣藤行。崖傾藉人掖。所憑勇往志。不隨艱苦易。幽巖既已經。危峯自不隔。振衣造其巔。奇勝在咫尺。俯身入煙蘿。欲詣仙人宅。即遊山可悟求道。康樂引其緒。此更顯言。

緣天都峯趾度巢雲洞上升仙梯遂憩文殊院

天都信岩嶢。特立若翠屏。取逕過其趾。俯仰皆奧境。松石俱象形。巖巒類盤綆。將陟目屢眩。恐墜心更警。行經陰洞中。恍惚陷深井。須臾從井出。冉冉首露頂。矚盼多創遭。不類人世景。境斷緣梯升。氣逼毛骨冷。意堅斯有獲。出險真自幸。向晚憩禪扉。一燈照孤影。寫巢雲洞四語。深入險出。殊足駭人。

壯士行

請爲壯士行。用識壯士情。壯士重恩輕死生。主人臨岐。陳設飲宴。悲歌聲徹。客容盡變。酒闌日落。雲天高遠。聞淒風起於曠野。猛虎嘯於林臯。風鳴虎嘯。揚鞭走去。去報讎不回首。如見白衣冠祖送時情事。

明妃曲

中原消息斷。胡地風沙寒。經年不逢春。悽惻摧心肝。君王遣妾和戎虜。萬里辭家心獨苦。早知塞外不勝愁。那怪將軍怕邊土。君不見百戰生降李少卿。羈留絕域一身輕。丈夫失路尙如此。賤妾含悲空復情。備

李少卿而措詞微婉。得風人之旨。

懷舊

自失鴛湖叟。詩盟三載寒。已知生死斷。猶作別離看。老去悲丘井。情來望逝湍。還聞淮水畔。禪宇託空棺。
此懷家方舟作。

行經拂水山莊

扁舟汎汎越南沙。倚杖愁臨澗路斜。孝穆荒齊猶竹石。摠持故宅尙鶯花。名高那許遺纓紱。情重難教棄室家。太息百年同逝水。淒涼還爲惜才華。
詠此題者不免過於發露。作者婉約出之。不知微言諷諭過於顯斥也。此詩品高下之分。

晨自松陵歸渡太湖卽事

迴望垂虹隔杳冥。湖波浩渺快揚舲。半篙日氣霧中白。萬點浪花煙外青。隱隱榜歌來雁汶。淒淒漁笛出雲汀。還憐心切鄉閭近。未暇攜筇訪洞庭。

戍婦吟

淒淒賤妾閉蘭堂。渺渺征人戍朔方。漫擬龍城罷行役。空憐燕閣閱年芳。分弓營畔沙如雪。挂鏡臺前月似霜。絕域荷戈音信杳。幾回清淚濕流黃。
似鶯啼燕語。報新年之作。

題秦餘女史所畫楚辭圖

繞堂煙浪洞庭深。芳杜幽蘭遍水潯。北渚已傳湘女恨。南征更識楚臣心。雲中桂擢聲疑咽。天際瑤臺影乍沉。寫盡離騷無限意。竹枝歌罷又猿吟。

江上曲

空江潮落水茫茫。南楚征途萬里長。為是曾經分手地。不聽離曲亦神傷。

塞下曲

持籌絕域感蹉跎。沙塞年年漫枕戈。翻羨蘇卿歸國早。白頭終向茂陵過。子卿歸於昭帝時。時孝武殂落五年。詩意見子卿猶得生還也。

用筆甚曲。

蝴蝶詞

萬花谷裏逐芳塵。自愛翩躚粉澤新。多少繁華任留戀。不知祇是夢中身。邯鄲一夢。以二語該之。世人在夢中而稍不覺寤。何也。

漢川

漢川城郭枕江隄。黯黯煙波日乍低。我欲停橈訪神女。暮山無際楚雲西。

盛

錦字庭堅。江南吳縣人。諸生。著有青樓詩鈔。○青樓詩從大歷下入手。後層累而上。風格漸高。至入蜀詩得江山之助。沈雄頓挫。直欲上摩王漁洋之壘。以仰窺少陵。蓋漁洋詩以蜀道集

為最勝也。遊京師。王公以下。多折節下之。不耐冗雜。歸丙子歲。歿。是歲。周子迂村。朱子木。為汪子山樵。相次歿。吳下詩壇。黯然無色矣。予嘗歸後。時與青樓商確。尤深人琴之感云。

履霜操自註。瀘有撫琴渡相傳。尹伯奇彈履霜操處。遂擬是作。

霜皚皚兮瀟之澌。兒弗履兮畏我父母。叶兒身載寒兮。兒心載苦。兒心兮父心。兒身兮母身。寒兮苦兮。實傷我親。兒罪兮莫道。親心兮可轉。俟日出而回光兮。履霜亦暖。與臣罪當誅。天王聖明。同一憐惻。可以教孝。

十二碛

羣峯束奔流。虎牙怒相向。對峙十二碛。羅列鐘鼓狀。顛崖轟層霄。旁竇穿激浪。峽泉落九天。洶洶翻海藏。撐舟出井底。篙師氣先喪。衆工捷如獠。百丈緣壁上。木末縱飛騰。山凹迭升降。一鼓更作氣。千篙力誰讓。造化何神奇。設此待霸王。頗聞白帝子。於此拒漢將。鐵鎖貫浮梁。金戈森衛仗。蕭銑後何人。屯兵倚疊嶂。羣雄電掃空。故壘猶在望。平生歷險難。未若茲遊壯。萬里投蠻荒。一身墮煙瘴。風餐案傾欵。水宿魂震盪。搜奇命轉輕。得句神益王。詎畏前途修。瞿塘險如象。峽高絳逾百丈。上下不能相顧。故以鼓爲節。杜詩所謂百丈牽江上。灩船打鼓發。船何處耶也。經其地者能親切言之。

空舸峽

出峽復入峽。兩崖插青冥。中流逐狂飆。奔騰萬馬聲。下灘梭一擲。觸石危檣傾。逆挽勞百夫。十步九倒行。力盡聽所止。刺篙就迴汀。愛此民居壯。凌空駕軒楹。宿雲出洞戶。古木撐巖屏。驚猿或挂樹。怪鳥時一鳴。捫蘿上絕壁。山風動冠纓。呼童拾錦石。信手攀雜英。興幽忘涉險。觸目多怡情。前途苦逼仄。絕境難久停。過午巖日晦。磊落見數星。厓黑畏突虎。蠻語頻丁寧。移舟近湍激。拍枕聲鏗錙。骨肉緣久斷。中宵夢亦清。

狂吟出險句。那顧鄰舟驚。前後極形其險。中間忽入拾錦石攀雜英一段。猶杜老北征雜入或紅如丹砂。或黑如點漆也。骨肉緣斷而夢亦不接。是遠遊人嘔心語。

過灘

重峽間百灘。一灘度一厄。江渦衆壑趨。厓口亂石積。大石疊竄巖。小石攢劍戟。中流若沸川。翻倒蛟龍窟。牽舟逼下流。凜若阻兵革。長篙拄峯腰。遠纜走山脊。鳴金策衆工。銳進不盈尺。一絲中迸斷。百里供一擲。觸石無完艘。沈淵有驚魄。是時雨初霽。沙石多滑澤。亡命爭上厓。匍匐落冠舄。婦孺互扶攜。雞犬任狼藉。暫脫魚腹災。波濤亦衽席。轉思斷鼇初。四極奠磐石。豈其禹力衰。此境終未闢。吾尤罪巨靈。何惜隻手擘。天宰眞夢夢。人事日偪窄。波靜有潛鱗。林深多斂翮。寄語營利徒。勿作遠行客。一絲迸斷。百里一擲。前人衽席。倒觀出魚腹之險。眞十成用力語。

峽夜

噉噉猿啼夜。淒淒鶴唳空。斷厓開四壁。深井落孤篷。樹漏慳明月。湍驚無定風。萬重雲水隔。歸夢亦途窮。深井五字警絕。

虎牙灘

楚蜀分爭地。雄關扼怒濤。灘聲牛峽轉。山勢虎牙高。巖樹丹青雜。舟橋上下勞。新詩橫槩賦。旅興一時豪。

曉發

曉發東安道。輕霜淨馬蹄。亂鴉僧閣外。殘月女牆西。春冷花猶斂。沙平路欲迷。東臯待時雨。取次把鋤犁。
曉行如繪。與雞聲茅店月。人迹板橋霜。可以並傳。

老將

白髮枕戈眠。黃沙帶甲穿。風雲經百戰。筋力盡三邊。舊識飛狐路。高談射虎年。聞笳心未死。尙想勒燕然。
詩家老境。可入極玄集中。

登白帝城

萬仞牆臨灩澦堆。子陽伯業劃江開。白鹽峯對城頭出。巫峽帆從地底來。雲起化龍迷故井。風生躍馬有高臺。漢家陵闕同灰滅。淚盡寒猿日夕哀。
深井落孤蓬。從高處入峽也。巫峽帆從地底來。從峽升高處也。

白帝城謁昭烈武侯廟

永安宮殿峽江頭。一體君臣祀武侯。天祖式臨傳詔夜。風雲色變出師秋。鳴鑾久絕空山道。籌筆猶懸古驛樓。瞻尙死忠。謚死孝。千秋配食重詒謀。
領聯頸聯。分寫君臣。結以君臣之後人言。英氣凜凜。瞻尙死忠。媿死。後主。此種詩那得不傳。

蜀道寫懷

辭家動作經年別。去國真成萬里遊。淚眼已枯猿嘯夜。鄉書空望雁來秋。蠶叢路險連雲棧。鹿角灘驚上峽舟。心折江陵灌園叟。黃柑千樹比封侯。
一起四語。直書胸臆。人力不與。

舟抵瀘州

錦江直下古城壕。地入炎荒近不毛。萬里親朋勞夢寐。十旬餐宿托風濤。征蠻羅甸軍聲遠。諭蜀文園典策高。掃盡瘴煙開郡閣。岷峨天半落揮毫。

任城使院晤翁霽堂有贈

並馬長安憶舊遊。逢君意氣振高秋。酒徒半散荆卿市。詞壘孤懸李白樓。握手星辰搖短劍。離心風雨送扁舟。明年醉我南池上。須典千金紫綺裘。

題杜文貞公南池新祠

自注沈菜園侍御題。曾公像配以許主簿。

浣花遊跡寄南池。洗馬鳴蟬感昔時。遇主名高三禮賦。懷人心折八哀詩。鑄同賈島應呼佛。繡比平原合買絲。玉貌仰瞻如舊識。憶曾親拜草堂祠。自注丁巳余入蜀至。讓西曾拜公祠下。

白蓮

玉井分栽到野塘。冰綃翠袖迥生涼。半江殘月欲無影。一岸冷雲何處香。真相尙留開士社。紅衣盡洗美人粧。水仙操罷扁舟去。誰與凌波解珮璫。青樓中年作也。頤聯遠神遠韻耐人吟咀。所謂不著一字盡得風流者耶。

別兄弟

未斟別酒已傷神。四海終輸同氣親。此去白雲天萬里。望歸無復倚閭人。

別家人

伏雌烹罷勸加餐。秉燭喃喃語夜闌。點檢篋中裘葛具。預知別後寄衣難。作六千里別。不得不預料寄衣之難。詩之動人。全在一真字。

入蜀懷沈湘島

雙溪對掩古溪邊。婦汲兒舂各可憐。浩浩乾坤兩萍葉。計程我更遠三千。時湘島客江漢。故云更遠三千。

汪

俊字顯三。江南長洲人。官醴泉知縣。著有山樵詩。○聖祖第三次南巡。山樵獻詩。命入書局纂修。議敘得官。然敲扑喧囂。非所長也。醴泉罷歸。久之。幾無立錫地。獨能以詩消遣。苦中得甘。

而其詩亦不自愛惜。隨手散去。身後得其草稿九束。大半溫柔鄉語。刪存五章。皆近元和長慶詩人者。

蘆花

爾本無情者。緣何亦白頭。丹楓同瑟瑟。野水並悠悠。霜冷下宵雁。月明來釣舟。相逢秋雪裏。老我不勝愁。

哭少宗伯春暉姊丈

老去身家不兩存。俄看霜後萎芳蓀。燕巢華屋垂新淚。馬鬣空山感舊恩。豈意十年重一面。卻來千里與

招魂。薦蘿雖附潘楊末。未敢同聲哭寢門。春暉宗伯為其先人營葬。故有第四語。山樵入京。春暉旋沒。故有第六語。

誰知小別竟千年。夢幻韶華逐逝川。我尚拖泥兼帶水。君非成佛定生天。從前似歷華嚴劫。向後休參文

字禪。昨自黃公壚下過。一聲鄰笛欲潸然。

袁墓

香雲漠漠雪飄飄。積翠層嵐近可招。猶記玉堂春夜夢。短篷斜繫虎山橋。因遊袁墓而追憶往昔之夢遊也。修書在武英殿。故不礙云玉堂。

元宵憶家

大地冰輪原普照。故園想亦共清光。別離人度團圓夜。白髮紅顏各斷腸。與獨眠人起合歡牀同意。眷念家人。不比尋常浮艷。

朱受新字念祖。江南吳縣人。諸生。著有木薦詩稿。○詩體以七言絕句為最難。四句中開闔動盪。語近情遙。不鏤琢。不點染。而言中言外。神遠韻流。方為盡善。宋元人有心奇巧。往往失之。木薦

諸作。頗近唐人。惜無旗亭畫壁。能賞黃河遠上者。

詠蟬

抱葉隱深林。乘時嘒嘒吟。如何忘遠舉。飲露已清心。木薦為諸生。不應鄉試。抒寫懷抱。已見此詩。

獨處怨

月中自顧娉婷影。鏡裏誰憐憔悴容。永夜製衣金翦冷。秋風萬里度盧龍。

流螢詞

暗飛幾點隔簾櫳。影亂繁星度遠空。莫入瑤姬金閣裏。恐隨團扇落秋風。與猶帶朝陽日影。來對看。便知其工。

吳宮詞

夜擁笙歌百尺臺。太湖月落宴還開。君王自愛傾城色。卻忘人從敵國來。眼前語。卻無人道破。

春鶯曲

千門春靜落紅香。宛轉鶯聲隱綠楊。任爾樓頭啼曉雨。美人夢已到漁陽。亦與啼時驚妾夢。不得到。遠西對看。善於翻用古人。

明河曲

清秋瀉影畫樓前。一水盈盈耿碧天。若果此中風浪靜。女牛何事別經年。

白秋海棠

清秋湛露浥瓊芳。素影風搖玉砌旁。夜靜看花人獨立。水晶簾外月如霜。寫花并寫出看花美人。與尤子在京作。可云笙磬同音矣。

王大椿字八千。江南常熟人。諸生。○八千爲畫師。石谷曾孫。勵志向學。日夕不倦。將有成矣。中道以瘵疾亡。存詩一章。詩意欲從學見復。望其大叩大鳴也。中正端嚴。體如平原書法。

上陳見復先生

讀書不求名位高。飲酒不盡千鍾醪。得心每在澹與泊。此中至樂誠陶陶。先生閉戶穴墳典。卅年門徑叢蓬蒿。三公令僕斷夢寐。淡如雲影輕鴻毛。忽傳下詔賁郡邑。水南水北紛喧囂。公卿合辭拜手薦。漢廷經術千秋遭。申轅年已憊筋力。蒲輪難涉風塵勞。上陳著述達黼座。至尊下遣官胥鈔。周情孔思審中正。辨別白黑窮釐毫。少司成職重太學。帝命取式風之澆。先生受官不受祿。几席講學仍衡茅。走也仰鑽希萬一。有似蟻垤窺嶠嶠。韓門近在許偃入。欲挾精髓棄粕糟。寸莛鉅杵叩俱應。試聽鑛鑛天半鳴蒲牢。

李 菟字嘯村。江南懷寧人。諸生。

憶秦淮

清明恰是握蘭辰。遙卜秦淮景物新。楊柳晚風深巷酒。桃花春水隔簾人。橋邊車過香生路。樓外船歸月滿津。憔悴不堪來舊館。相逢誰爲浣沙塵。秦淮風景宛然畫出。令人追憶舊遊。

過廢園

誰家亭院自成春。窗有莓苔案有塵。偏是關心鄰舍犬。隔牆猶吠折花人。以鄰犬之吠人。傳出芳園之廢。如畫家之用烘襯也。

卷三十一

紀映淮字阿男。江南江寧人。詩人。映鍾妹。杜某室。以苦節旌門。

秦淮竹枝詞

棲鴉流水點秋光。愛此蕭疏樹幾行。不與行人綰離別。賦成謝女雪飛香。王漁洋秦淮竹枝有栖鴉流水其風神也。紀詠桃葉渡中云。波搖秦代月。枝帶晉時春。亦稱佳句。

錢鳳綸字雲儀。浙江錢塘人。

哭伯兄

在昔皇天傾覆卵。無完理。兄不卽殉身。感奮良有以。摩挲雙匕首。一夕再三起。千鈞重一發。恐復憂天只。荏苒歲月間。隱痛入骨髓。未堪讐人胸。抱疾忽焉死。尸牀目不瞑。不繼非人子。尙有娥親在。李壽汝莫喜。

因兄報讎之志未遂而死。已以一身任之。字裏行間。讀去。錚錚有聲。使人增孝思。增義氣也。第未知異日報讎與否。

畢

著字謂請兵。則曠日賊且知備。即於是夜。率精銳入賊營。賊正飲酒驚駭。著手刃其渠。衆潰。以

兵追之。多自相踐踏死者。與父屍還葬於金陵。時二十歲。女子也。後來吳中。為崑山王聖開室。裙布荆釵。無往時義勇氣矣。自首相莊。以沒。閱毛太史大可集。載沈列女雲英。為父報讎。賊事與相類。豈世亂時。天故生奇女子。不一人耶。抑所傳聞異辭耶。○韜文詩稿。向見於家。來遠兄處。序中有云。梨花槍萬人無敵。鐵胎弓五石能開。又云。入軍營而殺賊。虎穴深探。奪父尸以還。山龍潭妥葬。又云。室中椎髻。何殊孺仲之妻。隴上攜鉏。可並龐公之偶。時異其人。鈔錄五言古七言絕二章。來遠兄沒。畢詩徧索不得矣。存此舊錄。聊以見其生平。

紀事

吾父矢報國。戰死於薊邱。父馬為賊乘。父屍為賊收。父讐不能報。有愧秦女休。乘賊不及防。夜進千貔貅。殺賊血漉漉。手握讐人頭。賊衆自相殺。屍橫滿阡溝。父體輿榱歸。薄葬荒山陬。相期智勇士。慨焉賦同讐。蛾賊一掃清。國家固金甌。機智義勇忠孝。於一詩中見之。

村居

席門閒傍水之涯。夫婿安貧不作家。明日斷炊何暇問。且攜鴉髻種梅花。視前詩如出二人。

章有湘。字玉篋。江南華亭人。進士孫中麟室。

曉思

窗外雞初唱。花間露未乾。欲臨明鏡照。猶怯翠眉寒。宿鳥翻林樹。歸鴻振羽翰。不知鄉國信。何日報平安。

錢敬淑字師令江南江寧人談允謙室

泊浦子口

殘年泊歸櫂。問酒郭西亭。雪圃芹芽白。江膠竹葉青。夕陽新別路。衰草古離情。隔岸寒山色。含悽望舊京。

吳

琪字蕊仙江南長洲人管助室後寡居皈依空門

送別

雪意滿芳洲。蒼山引去舟。霜風醒客夢。笳月起邊愁。萬里從軍急。孤身倚劍遊。家園落日裏。莫上最高樓。

春晴晚眺

積雨經旬鶴未過。小樓閒眺費吟哦。簾開燕子歸來晚。門掩梨花落處多。新水小橋通蕙畹。亂山古寺入煙蘿。雲開樹杪看浮棹。畫出春帆送綠波。娟秀

吳

綃字素公江南長洲人常熟進士許瑤室○馮定遠文集中有與高陽夫人論古詩樂府源流即謂素公也定遠斷斷持論少可多否而推許夫人則夫人之詩格可知矣

嘯臺

魏晉已如夢。荒臺今獨存。龍蛇正交鬪。鸞鳳自高騫。避俗惟長嘯。逢人常不言。始知真隱意。何必入桃源。

入手高朗沉鬱盛唐風槩

七夕

星光歷歷漢悠悠。悵望雙星獨倚樓。莫謂人間多別恨。便疑天上有離愁。梁清謫去誰相伴。子晉歸來合共遊。惟有月娥應最妬。一輪風露不勝秋。

楊柳枝詞

宮柳初開一抹眉。武昌城下乍逢時。春來樹樹煙條綠。欲認何枝是舊枝。寒食東風已滿城。小枝纖弱拂啼鶯。東君不惜離人苦。又向前年折處生。

詠古

公子翩翩信絕倫。擬將豪舉卻狂秦。不知賓客成何事。枉向樓頭斬美人。信陵之得毛薛。可云得士。若三千中十九人。皆碌碌也。而斬美

人以謝之耶。平原之徒豪舉。即於此見之。

侯懷風字若英。江甯嘉定人。通政諱峒曾女。

感昔

黃河流水響潺潺。當日腥風戰血殷。大地盡拋金鎖甲。長星亂落玉門關。居延蔓草縈枯骨。太液芙蓉失舊顏。成敗百年流電疾。蒼梧遺恨不堪攀。此感恩陵失國時事。降將倒戈。虎臣戰沒。而君王因之。殉社稷矣。忠臣之女。宜有是詩。

吳氏江南桐城人。○未詳名字出處。然以女子能組織史事。殊爲難得。於詩觀中錄之。

詠史

六貴同朝激虎彪。橫江勒馬下秦州。銀鎗酒市春雙鬢。玉屣蓮臺月半鈎。趙鬼西京諳漢賦。阿兄東閣壓通侯。誰知講武旄頭入。芳樂笳聲碧麝秋。蕭衍謂張弘策曰。六貴同朝。亂將作矣。東昏鑿倖之徒。有趙鬼者。能讀西京賦。曰。柏梁既災。建章是營。乃大起芳樂等苑。梅蟲兒。齊主呼為阿兄。

右南齊

同泰一人歸佛地。壽陽千騎渡江波。盟成自取金甌缺。蔬絕空陳雞子多。五月誰勤君父難。七官先反弟兄戈。江淮廢後襄陽促。秋草臺城放橐駝。臨賀王正德引侯景以千兵渡江。金甌無缺。武帝自矜語。圍臺城時。蔬茹皆絕。邵臨王綸上雞子百枚。太清三年五月。武帝租武陵王自稱帝。曰。七官文士。豈能匡濟。湘東王釋行。七故云。

右南梁

倪仁吉。浙江義烏人。○仁吉工寫山水。嘗種方竹於庭。以自況也。有同志者。斫一竿與之。

題宮意圖

調入蒼梧斑竹枝。瀟湘渺渺水雲思。聽來記得華清夜。疎雨梧桐獨坐時。

范

姝。字洛仙。江南如臯人。諸生李延公室。

聞蟋蟀有感

秋聲聽不得。況爾發哀吟。遊子他鄉淚。空閨此夜心。已憐裝閣靜。還慮塞垣深。蕭瑟西風緊。行看霜雪侵。

此聞蟋蟀而憐遠行也。起十字便已高絕。

熊

湄字碧滄江南長洲人。許爛石室。

寄遠

幾回聞雁憶連然。天末遙將錦字傳。萬里飄流羈遠客。十年迢遞阻迴船。浮雲目斷蒼山外。落月魂消洱海邊。何日刀鐙遂初約。免教暗卜擲金錢。

柴靜儀

字季嫻。浙江錢塘人。沈漢嘉室。有凝香室詩鈔。○本乎性情之真。發乎學術之正。韻語時帶箴銘。不可於風雲月露中求也。令子方舟。能承母教。已詳二十五卷中。

與冢婦朱柔則

深閨白日靜。薰香垂羅幃。病起罷膏沐。淡若明河秋。自汝入家門。操作苦不休。蘋藻既鮮潔。牖戶還綢繆。丈夫志四方。錢刀非所求。惜哉時未遇。林下聊優游。相對理琴瑟。逸響隨風流。潛龍慎勿用。牝雞乃貽羞。寄言閨中子。柔順其無憂。以禮躬勗子。以淑慎勉婦。閨閣中居然儒者。

子用濟有遠行詩以貽之

吾子廉吏孫。讀書昧生理。三十未成名。徒然還鄉里。外侮旋復來。內憂方未已。忽然遠行役。披衣中夜起。明星光在天。河流正瀾瀾。行雲有返期。遊子靡所止。攬涕下高堂。長途從此始。野雀從南來。翩翩思擇木。感此主人賢。飛鳴集其屋。才地非獨優。處卑願亦足。矧有嘉樹林。朝昏託棲宿。

鷹鷂過莫窺，爵羅無由觸。哀彼黃鳥詩，長謠念邦族。詩中比體，勉其因不失親，隨遇自安也。

勛用濟

君不見侯家夜夜朱筵開，殘杯冷炙誰憐才。長安三上不得意，蓬頭鰲面仍歸來。嗚呼世情日千變，駕車食肉人爭羨。讀書彈琴聊自娛，古來哲士能貧賤。立身一敗，萬事瓦裂，皆由不能貧賤之故。貧賤中正可磨鍊人品也。能貧賤他日即能富貴矣。學者宜三復斯言。

長信宮

玉臺妝罷無人見，傷心空自悲團扇。秋草偏生長信宮，春風只在昭陽殿。殿裏君王酒半醺，嬌歌雅舞爭紛紛。三千錦帳飄香麝，十二長裙散綵雲。衆中別有人如玉，新妝豔豔嬌紅燭。不許寒烏帶月啼，恐驚春燕銜花宿。誰憐長夜夢難成，忽度流鶯似有情。片月高高挂天漢，千秋應照妾心明。

秋分日憶子用濟

遇節思吾子，吟詩對夕曛。燕將明日去，秋向此時分。逆旅空彈鋏，生涯只賣文。歸帆宜早挂，莫待雪紛紛。

送顧啓姬北上

一片桃花水，盈盈送客舟。春來萬楊柳，葉葉是離愁。顧我窮途者，逢君意氣投。烟虹時染翰，風月幾登樓。只合薰香坐，誰堪鼓柁遊。燕臺一回首，雲白古杭州。

王

慧字蘭韞，江南太倉人。學使王長源女。冰菴太守妹。常熟諸生朱方來室。○蘭韞一門風雅，得所承受，故其詩清疏朗潔，其品最上。王漁洋祇賞其一縷柳花飛不定，和風搭在繡牀前。論

以尋常閨閣待之也。

山陰道中三首

出郭忘遠近。十里清陰中。川陸互回沒。延緣遂無窮。岡巒去殊勢。竹樹交成叢。安知蒙蒙處。下有溪流通。石橋路可尋。一轉迷西東。烟空人不見。寂寂山花紅。

行行轉深迥。所得益幽奇。萬壑與千岳。今來始見之。紛紛紅復碧。相引呈異姿。心目所應接。人各領其私。

烟縷出叢薄。山家住茅茨。人世杳然隔。何殊太古時。人各領其私。正以私見公。從少陵欣欣物自私化出。

溪流繞巉巖。一葦去不息。沙瀨清且淺。水底見竹色。文石無歲年。山根浸歷歷。谷鳥鳴轉幽。溯洄安所極。水花愛明淨。絕境杳難卽。可有浣紗人。一笑似相識。

冷泉亭

泉聲檐檻外。林壑杳然深。人世熱何處。我來清到心。松林藏日色。潭底臥峯陰。一自樂天記。山光寒至今。

移居茜里舊宅

新塘一水繞街東。舊是柴桑五畝宮。松菊尙存思祖德。蓬蒿不翦見家風。花深雞犬疎籬外。潮落魚蝦小市中。卻愛堂前雙燕子。還尋故壘入簾櫳。

秋夜夢同先慈賦詩得天上桃花之句覺後因足之

太華峯頭見上真。霞衣綽約是前身。海中若木何嘗夜。天上桃花不計春。瞬息去來原是幻。片時歡笑亦相親。鐘聲已碎昆明劫。好向毘伽問後因。語有仙氣。不因鏤刻而成。

鄰女幼歸儒家因壻無藉淪於塞下聞而有感

曾向鄰居共絳紗。裁雲詠絮鬥芳華。香沾繡帙同分線。春暖妝臺互送花。漫說羅敷原有壻。可憐蔡琰竟無家。於今辮髮垂雙耳。紫塞斜陽泣暮笳。極不堪事。寫來蘊藉。服其筆墨之功。

芝塘候潮因憶亡女

水淺舟膠日半斜。扣舷閒望似天涯。烟深竹塢鳩呼雨。潮落蘆根蟹聚沙。愁緒縈纏同蔓草。年華衰謝感殘花。劇憐弱女常同泊。相對蓬窗數晚鴉。

禹陵

明德彌蒼昊。神功邁大庭。懷襄方盡力。胼胝極勞形。草木開蒙昧。龍蛇滌穢腥。鑄金九土貢。誌怪八方經。蒼水先呈簡。防風後至刑。相傳弓劍棄。此地隧泉扃。三古遺祠廟。千秋共薦馨。璧牲前代典。碑版列朝銘。深殿從羣后。空山走百靈。舊聞雲罕駐。今見翠華停。心法傳何洛。天章煥日星。殊恩沾後裔。異數出明廷。肅穆瞻新像。登臨泊小舲。城垣辭鏤琢。戶牖炯丹青。莫覓藏書穴。徒看窆石亭。蘿長鼯竄跡。松老鶴修翎。衆水環襟帶。諸峯列幃屏。橋山同故事。寂寞對秋坰。一起五韻。包括神禹生平。通體整肅。有少陵謁先主廟風格。不意於閨閣中見之。

徐氏山東新城人。耿侍御鳴世室。都御史庭柏母。

寄子詩

家內平安報爾知。田園歲入有餘資。絲毫不用南中物。好作去聲清官答聖時。見王漁洋詩話中。

張氏山東德州人。麗水知縣田緒宗室。刑部侍郎雯母。封太恭人。著有茹茶集。

示兒

一部楞嚴戶晝扃。木魚竹杖倚圍屏。老人自覺修齋好。不為兒曹講佛經。不講佛經。講孝經可也。宜田氏後有令人。

龐腕字小宛。江南吳江人。詩人吳鏞室。○鏞字聞璋。嘗以詩扇贈先大夫。係其夫。人瑣窗斷句。余兒時即喜誦之。今錄於此。每一吟咀。猶憶角巾見賓時也。

瑣窗雜事

夫壻長貧老歲華。生憎名字滿天涯。席門卻有閒車馬。自拔金釵付酒家。夫壻身分。即從留賓傳出。而已之賢淑。亦從此可見。

吳永和字文璧。江南武進人。董玉蒼室。

虞姬

大王真英雄。姬亦奇女子。惜哉太史公。不紀美人死。虞兮之死。史筆無暇及此。然一經拈出。真見心思。

贈外子玉蒼北上

挾策長安去。誰憐行路難。恐傷遊子意。別淚不輕彈。

丁

瑜字靜嫻浙江長興人進士
臧眉錫室著有皆綠軒詩

家居

木石風花結四鄰。寂寥門巷久無人。昔年燕子今重到。始信交情爾獨真。

張令儀

字柔嘉江南桐城人姚湘門室著有蠹窗詩集○此文端公長女也工古文不專韻語端本殖學比於韋逞母之授經

西顛

大火既流涼風薦爽。四時代謝成功者往。是刈是穫東作乃登。馨香玉粒神享其烝。率我婦子中夜鳴機。涼霜戒晨勿使無衣。

玄冥

北戶乃瑾凝陰沍寒。兩儀混一雨雪漫漫。何以禦窮修其旨蓄。草木既胎蟄蟲咸伏。無視無聽以還純朴。百爾君子宜謹嗜慾。於天時為閉藏於人心為守中。得漢人氣息而又別存理趣。

不寐

天將降陰雨病骨必先痛。轉輾不能寐常至霜鐘動。老覺近年增愁自三生種。萬慮積此時疾苦非所重。逝者日以久憂來誰與共。一歲又將除五窮復難送。翻羨長眠人不醒鈞天夢。此稱未亡後詩得白太傅神理

五畝園舊蓄二鶴忽殞其一孤侶哀鳴都忘飲啄詩以弔之

西風一夜返芝田。仙蛻儀形尙宛然。舊過蒼苔猶有迹。重來華表是何年。獨臨池畔悲孤影。唳入秋空泣暮烟。何處惹人情最切。嚴霜落葉五更天。甲鶴實以自弔五六語分寫孤侶哀鳴字字悽惻

病中口占

珍重餘生劫後身。卻憐孤負一分春。殷勤好與東風約。留取餘花待病人。

徐昭華

字昭華浙江會稽人。諸暨駱加采室。

送虞英嫂歸諸暨

落盡紅衣蓮子多。相看綠水木蘭過。曉風不解吹愁去。偏送佳人到苧蘿。

孫

淑字靜谷江南常熟人。諸生許灝室。孝廉進益母。著有詩集四卷。○集中有達哉行。作於九十歲時。述孫許兩家門戶之盛衰。一己終身之閱歷。皆樂天安命語也。共五百餘言。一時遠近

誦傳

五日弔古

田文五日生。屈原五日亡。吉凶同此日。理固難推詳。原與國休戚。一死分所當。漁父櫂自鼓。詹尹龜宜藏。抱石投湘流。心與日月光。文從狡兔計。高枕樂未央。後合魏秦趙。伐齊何披猖。身死薛隨滅。高戶仍不祥。文生雞狗雄。原死荃蘅芳。世人何夢夢。悲屈羨孟嘗。我心獨不然。臨風慨以慷。撫時懷往事。聊進菖蒲觴。

正則之死。賢於孟嘗之生。合兩傳校之。其論自定。定論出闔閩中。大難大難。

金氏字法筵。江南吳縣人。吳江沈六書室。

偶然作

灼灼庭前花。春風鬥紅紫。隨榮復隨謝。盛衰偶然爾。草木豈無情。誰能一生死。我思更如何。欲種菩提子。

彭

氏河南鄧州人。廣西布政諱而述女。李鴻室。

華山

三峰翠嶽插青冥。高處平捫井鬼星。池上蓮花開日月。礪邊石鼓動雷霆。藥籃何日逢毛女。仙掌於今憶巨靈。願駕鹿駟過霧市。丹爐石榻檢遺經。

王

煒字功史。江南太倉人。陳緯度室。

鄉思

不禁鄉思倚危樓。山色空濛海氣浮。風雨別來花半老。音書隔絕雁驚秋。林間野鶴呼幽夢。天際浮雲帶遠愁。好寄相思與婁水。門前日日有潮頭。

王瑤湘

字瑤湘。廣東南海人。詩人王隼女。李孝先室。

獨坐

殘燈明滅裏。遙夜夢醒時。起立庭前樹。孤懷明月知。

擬送別

孤舟暮歸去。別路江南樹。煙外有鐘聲。故人在何處。

朱柔則

字道珠。浙江錢塘人。詩人沈用濟室。○方舟爲紅闌主人客。道珠遙寄故鄉山水圖。主人作詩有應憐夫壻無歸信。翻畫家山遠寄來之句。方舟旋歸。當時傳爲佳話。

寄遠曲

恨少垂楊柳。殷勤繫玉鞍。夕陽鴉背暖。春雪馬蹄寒。入世逢迎拙。依人去住難。癡兒啼向我。昨夜夢長安。
獵獵風初勁。沉沉雨未闌。因憐兒被薄。轉憶客衣單。栖燕將雛苦。征鴻失侶寒。居家與行路。同是一艱難。
聞說燕臺路。生涯亦可憐。恥彈門下缺。誰乞廣文錢。久客非長策。歸耕有薄田。一棺痛慈母。急爲卜牛眠。
諷遊子以行路之難。彈缺之恥。猶姑氏季嫻以能貧賤親正人。易子也。末章望其葬親急歸。遊子不容不歸矣。性情既摯。詩安得不工。

送外之大梁

前時失意悔遊燕。此去中州枉自憐。飄泊君同蘇季苦。操持吾媿孟光賢。計程已隔三千里。念別誰堪四五年。
自注。方舟云。此以五年爲期。莫向離亭歌折柳。恐催客淚落離筵。

河渚觀梅約顧女春山
春山。方舟妾。

相期河渚玩春華。一棹迎風路未賒。樓外有梅三百樹。美人不到不開花。
約看花。而云不到不開。望其早到也。不妬可知。詎止工於措語。

方舟廬先姑墓感賦

寢苦枕塊空山裏。卻望松楸淚泫然。縱使慈烏能反哺。可能飛得到重泉。

張學典字古政山
西太原人

感亡姊舊居

繡網蛛絲鏡滿塵。閒花狼藉不知春。添愁怕見梁間燕。猶是呢喃覓主人。

張凌仙字學烏江南吳縣人
沈某室以苦節聞

雜詠

家住青山側。青山斷塵迹。浮世幾興亡。依舊青山色。
明鏡如滿月。朝朝弄妝靚。一自棄塵埃。不照孤鸞影。
夙昔愛鳴琴。流泉指下生。子期今已沒。誰聽斷腸聲。

歲暮感懷

燈前課子誦芸編。百事縈心逼歲闌。泉路十年音信斷。空山風雪一家寒。四斷句中俱有冰霜之色

顧英字若憲江南長洲人印江知縣張之碩室○孺人蕭然
四壁藥房蘿屋間時聞誦詩讀書聲遠近稱女學士

初夏送夫子北上

杜鵑喚春歸。和風吹芳芷。何堪對斯景。把酒送吾子。分手卽天涯。惜此須臾晷。別緒如繭絲。柔情似潭水。離懷寄孤鴻。相思託雙鯉。征途勉加餐。努力拾青紫。上慰高堂親。下酬賢伯氏。君行旣雅醇。君才復俊美。但保金石心。豪門勿投趾。桃李易凋殘。松柏豈朝萎。行矣勿悲嗟。風雲自此始。不恃不求。何用不臧。勉夫石心。斷豪門迹。守此兩言。可云有所不爲矣。此種詩猶存雄雉遺意。

周淑媛字又洲。江南泰州人。

元日哭先大人

一夜思親淚。天明又復收。恐傷慈母意。暗向枕邊流。仁孝之言。自在流出。

張

蘩字采于。江南長洲人。吳士安室。

戲爲外子撥悶

失意休教苦自煎。爲君把卷論前賢。兒頑應笑同王霸。婢鈍何須學鄭玄。滌器當壚情更洽。操春舉案志猶堅。久藏賴有牀頭醞。莫負梧桐月正圓。奴愛才如蕭穎士。婢知書似鄭康成。向推劍南佳句。得其意而翻用之。以高隱重。不以才藻鳴也。家風敦朴。於茲可見。

沈樹榮

字素嘉。江南吳江人。葉舒穎室。

送別

落葉楓林兩岸秋。曾於南浦動離愁。祇今一片江頭月。不照歸舟照去舟。

瑯琊女子浙江桐鄉人

和汪鈍翁姑蘇楊柳枝詞

柳條風靜雨初收。更罷羅衣嬾上樓。花下欲將新月拜。一鉤卻到綠梢頭。

葉

楞江南崑山人。許心辰室。

孤鴈

一聲淒切度河梁。不訴離羣也斷腸。寂歷寒沙眠鍛羽。空明霜月照分行。無心避患銜蘆荻。肯戀餘生逐稻粱。聞道邊庭尙征戍。孤鳴幸勿到遼陽。

侯承恩

江南嘉定人。

丁酉三月葬親吳郡貞山之麓。淚餘賦此。

買得吳山土一堆。思親日夕寸腸摧。粗安窰窰封新鬢。可卜神明穩夜臺。滿目松杉滋涕淚。無情猿鳥亦悲哀。祖先邱隴遙相望。累葉忠魂摠不灰。

薛

瓊字素儀。江南長洲人。山人李崧繼室。

寒食

一樣鶯花二月天。錫簫聲裏興蕭然。三旬九食吾家事。不獨今朝是禁烟。想見清土家風。

張氏湖北潛

絕句

病廢機絲老廢蠶。牙籤緗帙興猶耽。唐詩漢賦都收捲。日向明窗誦二南。棄辭藻而重修齊。閨中端本之學。

倪瑞璿

江南宿遷人。徐起泰繼室。○柔順供職。婦德也。獨能發潛。幽誅姦斥。俟巾幗中易有其人耶。每一披讀。悚然起敬。

過凌城廟謁古戴二公忠義塚

古諱達可。戴諱國柱。同以忠勇見知於可法史公。自注。時史公總督漕運。巡撫淮揚。懷宗十四年。流寇袁時中

寇睢。古時駐宿。邀戴往擊。戰於凌城廟。衆寡不敵。俱死焉。史公隨遣使致祭。命於所瘞地。刻石立忠義塚。嗚呼。二公真烈丈夫哉。丁酉秋。予同母氏往過。拜其墓。深惜其事之未傳於史也。因

爲詩以俟輜軒之採。

秋風鳴高空。亂峯下斜照。老樹枝交天。蒼黃覆古廟。入門捫殘碑。太息拜遺貌。憶昔明運衰。羣盜起聚嘯。勦撫兩失策。蠱蜚變虎豹。所過無堅城。蒼生任凌暴。二公真人豪。忠貞出天造。金鐵冶成心。冰霜厲寒操。賊鋒一朝來。矢石躬親冒。官小誓捐軀。力薄那自料。慷慨互爭先。從容共談笑。燃炮擊賊人。天地爲震悼。賊用魘魅法。自注。命裸婦拜炮反震。蟻聚蜂屯到。衆寡勢不當。頭斷臂猶掉。成仁併取義。日月爭光耀。碧血灑平蕪。賊馬不敢蹈。至今曠野中。白日常見燒。如何八十年。薦紳少憑弔。姓氏已稀傳。父老猶相告。蘭臺事纂修。

幽微須闡耀。誰為秉筆人。搜求不遺奧。勸撫兩失策二語。斷盡熊文燦楊嗣昌諸人之罪。古戴二公。明史失載。此詩可補闕略。

四弟懇予易其名字。予取文王世子語為更名曰克昕。字徵子。因詩以勗。

人生重賢豪。不在名字美。難以易相方。自注。唐進士黃居難。為詩墓。白樂天故名。居難字樂地。赤將白自比。自注。李赤。自比李白。豈遂足追配。

效顰空復爾。四弟性明慧。翩翩致可喜。世業下相城。生來故家子。先人早棄世。淪落來居此。家毀不謀歸。

僑寓貧如洗。晝荻復和丸。提攜賴母氏。就傅勤誦讀。弱冠終軍齒。挺然才氣雄。籍甚聲華起。爾字與爾名。

呼之有年矣。忽然厭舊稱。十呼嬾一唯。向我索更之。我特不敢諉。文取世子篇。義載大戴禮。宋郊變宋庠。

飲香從此始。名氏新改初。譬若居新徙。努力事葺修。棟梁庶不圯。莫若江南橘。踰淮化為枳。酌雅稟經。顧名思義。詩不

徒作。

戲贈山人李老。自注。山人有足疾。為余舅氏灌園。

李山人年已翁。可憐白髮顏。猶紅矮茆屋。是爾宮青藜杖。是爾童烟霞滿懷。邱壑臥。夜呼骨痛朝呼餓。戚

施舉步行逡巡。天意厚汝汝莫噴。汝不見孫臏成名無一足。苻堅快意得半人。

樊大舅客金陵。有詩弔方正學先生墓。予次其韻。

金川門入北平軍。叔父周公逐嗣君。碧血一區埋十族。青山千古護孤墳。祠依忠烈緣同志。自注。聞先生祠與景公祠

相接。薛蝕碑銘認舊文。樵牧那知青史事。經過也復弔斜曛。弔。正學詩。所見夥矣。詞嚴義正。氣足神完。無出斯篇之右。

閱明史馬士英傳自注阮大鍼附

王師問罪近江潰。宰相中書醉未聞。復社怨深謀汲汲。揚州表到血紛紛。金塘舊險崇朝棄。郿塢多藏一炬焚。賣國仍將身自賣。姦雄兩字惜稱君。貴陽懷寧二賊臣。祗修復社之怨。報魏闖之讎。王師南下。閣部殺身亡家。遺臭終古。末路安可問哉。姦雄二字。曹孟德輩足以當之。予以姦而不予以雄。具有卓識。

金陵懷古

石頭天險壯層城。虎踞龍蟠舊有名。峙鼎三分吳大帝。渡江五馬晉東京。高臺鳳去荒烟滿。廢苑螢飛茂草生。往事不堪頻想像。夕陽西下看潮平。

憶母

河廣難杭莫我過。未知安否近如何。暗中時滴思親淚。只恐思兒淚更多。因憶母而轉出母之憶。女其情倍深。

林以寧

字亞清。浙江錢塘人。錢石臣室。

憶父禹都

曉登百尺樓。遙望中條山。天際有白雲。日夕自往還。去來何寥邈。引領難追攀。誰云生女好。少長違親顏。豈不眷庭闈。安能事間關。問寢久疎闕。視膳良以艱。回步循南陔。躑躅涕洟瀾。

陳

珮字懷玉。江南天長人。江賓谷室。

瘦菊爲小婢作

菊瘦依階砌。簷深承露難。莫言根蒂弱。翻足奈秋寒。

哭程夫人

忽駕青鸞返碧虛。瓊花吹折痛何如。修文應是才人盡。徵到姮娥舊侍書。天上修文。幾成套語。一用點化。頓覺鮮妍。

蔡

琬字季玉。遼陽人。綏遠將軍毓榮女。高文良公其倬。繼室。誥封一品夫人。著有蘊真軒小草。○選本中錄取四章。皆擲地有聲者。

辰龍關

一徑登危獨惘然。重關寂寂鎖寒烟。遺民老剩頭間雪。戰地秋閒郭外田。聞道萬人隨匹馬。曾經六月墮飛鳶。殘碑灑盡諸軍淚。苔蝕塵封四十年。

關鎖嶺

山從絕域勢遙分。天限西南自昔聞。烽靜戍樓狐上屋。風喧古木鶴驚羣。橫盤石磴危通馬。深鎖雄關冷護雲。叱馭昇平猶覺險。揮戈誰憶舊將軍。

江西坡

西嶺千里簇劍鉞。曾麾萬騎募羊腸。鬼燈明滅團青血。野塚荒涼嘯白楊。夢斷層霄空漠漠。事隨流水去。

茫茫只今剩有殘兵卒。指點空山說戰場。

九峯寺

蘿壁松門一徑深。題名猶記舊鋪金。苔生塵鼎無香火。經蝕僧廚有蠹蟬。赤手屠鯨千載事。白頭歸佛一

生心。

征南部曲。今誰是。剩有枯禪守故林。綬遠將軍平吳逆後。隨獲譴告。歸空門以終。四章皆懷演南征戰地悲歌感慨其原出於少陵諸將咏懷古蹟等篇。

方

京字彩林。廣東番禺人。進士諱殿元。女廣文。金終室。子祖靜。貴。誥封恭人。○恭人承家教。古詩宗漢魏近體宗盛唐。故所著無宋元氣味。

薤上露

薤上露。日出晞。朝槿花。日暮萎。微物轉瞬間。人生諒如斯。彭祖帝堯民。亦復同所歸。服食求神仙。仙成竟何時。守道以待終。令名庶可垂。薤露原詞。只言人命奄忽。以挽王公貴人。此陳求仙之謬。而以守道令名爲不朽。粹然儒者之言。

送孟調大姪南還

相對疑夢寐。言別百愁生。孤飛易爲感。使我心魂驚。聚散人生常。此別難爲情。爾我本一樹。相期共枯榮。爾今折枝條。芽肄何時萌。沾潤我本懷。老髻願難行。爾今返吳中。閉門守硜硜。勉哉崇令德。努力以揚名。取法不在遠。祖父有遺型。周親我老矣。垂涕重丁寧。古意古音。勗之以正。

示長媳楊珊瑚

十年爲婦蓼莪餘。疏水家風樂自如。宛似舉場勤苦士。粧成惟對古人書。姑近儒者。婦近書生。閨中樂事備於一家矣。

吳雯華字雲素江南吳江人貢生葉舒齋室

秋日邨居

自愛投閒縱所之。江村林壑漫棲遲。本無喜慍抽身早。須信英雄種菜宜。逸興耽於黃菊候。幽情訴與白鷗知。綠楊影裏三間屋。羨殺漁人理釣絲。

沈蕙玉字晚亭江南吳江人貢生倪弁江室著有聊一軒詩存○讀四箴可補班氏女誠惜年命不永而弁江績學旋亦淪亡評閱時為歎歎者久之

自箴

天生蒸民有覺其性。陰陽肇判。含元達順。琴瑟載咏。蘋蘩攸司。夙夜用敬。猶懼或虧。無曰深閨。莫余云觀。淑慝在躬。指視暗室。維椒與蘭。植於中田。我想君子。淑慎塞淵。此以慎獨自箴

先民有言。言不出閫。牝雞之晨。厥家用損。節以應佩。琴以和神。詞苟或費。寧默而存。勿尙爾舌。寸心是弛。既悔而追。不脛千里。嗟嗟愚盲。慎其德音。鸚鵡多言。祗名文禽。此以謹言自箴

紆纒在筇。煥乎有爛。淒其以風。滋我永歎。維織與紉。為坊厥心。舍業而嬉。淫慝相尋。野有絡緯。振迅其翼。爾安用媮。微羽所疾。雖有孔翠。不如春蠶。之子纂組。不如布縑。此以勤勞自箴

冀妻如賓。孟光舉案。夫豈矯情。媮惰斯遠。啼眉折腰。邦國之妖。彼昏罔知。反以用驕。幽閒貞靜。曰配君子。載色載笑。若佐之史。敬而能和。穆如清風。修身準此。維以令終。此以和敬自箴

同聲歌

少小屬閨闈。感君意纏繇。聘以明月珠。迎以黃金韉。結褵自今夕。誓好永百年。采蘭涉秋水。薦藻奉華筵。合歡裁作被。朱絲操作絃。雖無蘭蕙姿。向日呈芳妍。一身皆君有。寸心私自憐。何用答嘉惠。持以充豆籩。在天莫爲雲。雨落難上天。在地莫爲影。日暮愁棄捐。婉孌保素志。跬步稱比肩。於同聲中寫同心有和順無狎昵所謂有道妻子皆得快樂於弁江夫婦見之。

楊珊瑚 字珮聲浙江山陰人布衣
楊寶女 觀察金祖靜室。

鄉思樓

旅寓金閨五十秋。親年多半老依劉。嗟予未識鄉關路。廿載空登鄉思樓。淺語自有遠神。

姚世鑑 字金心浙江歸安人王豫室。

臥病

臥病逾時歲又新。衡門兩版絕囂塵。垂簾怕放東風入。春到貧家不當春。

姚益敬 字元吉浙江歸安人董暨室。

力疾作書寄外因題紙尾

尺素題初罷。輕羅淚未乾。離愁不堪寄。聊復報平安。

周淑履

山東萊陽人。高蔭榘室。婦為相國曾孫女。幼工詩。子歸後。夫婦如師友。然蔭榘早歿。家盡落。母家亦落。貧無依藉。織紵以生。教三子讀書。成名。下士遠近。以女師尊之。

述懷

軋軋機杼聲。漠漠空天雪。操作入中宵。十指皆皴裂。積絲匹難成。不忍中道絕。著此縞素裳。怡然矢同穴。
積絲十字為學如是。立節亦如是。

冬日送別表妹

孤兒髻鬢年。欲令就外傳。大者陶性情。次亦理章句。寧云致通顯。不敢隕故步。爾父有殘書。慰母在寒素。蕭蕭風雪逼人寒。欲整行裝忍淚看。珍重送君無別語。高堂代我問平安。

吳

巽字道嫻。浙江嘉興人。鄭聯室。

冬日村居讀靖節先生日月依辰至句遂演成一律

日月依辰至。村居歲欲殘。補衣朝旭暖。織素夜燈寒。節分於陵苦。貧偕孺仲安。囊空忘羞澀。不用一錢看。

奉懷兩大人

自注。幼弟已亡。

復抱西河痛。遙知淚不乾。可憐雙白髮。誰與勸加餐。

癸丑秋陳妾得舉一子時塔年四旬矣誌喜

窮薄還憑世澤存。朝來弧矢喜懸門。翻嗟姑舅先朝露。未得生前一弄孫。
誌喜中轉復增悲。微特不妬。嗣見孝思。此婦德之純者。

聞鴈

一字橫排箏柱來。聲聲似撥楚絃哀。願爲羽翼偕飛去。縱遇高峯誓不回。

綠牡丹和韻

平臺冉冉黛初勻。不逐鄰園鬪麗春。金谷荒涼成往事。風前猶想墜樓人。
商邱宋公任江左屏藩時咏綠牡丹二律和者幾於盈千然皆刻畫景狀餘韻無存也此妙在不即不離。

錢紉惠

江南吳縣人太史諱中諧女武平令許廷鑠室○竹素以詩鳴吳中今之魯靈光也厥配亦高風格趨步唐音。

新安江行

乘潮渡漁浦。杳嶂夾江濱。下瞰綠波影。能令纖芥分。筏移疑入鏡。碓落自春雲。聽盡潺湲水。灘高易夕曛。
佳句。

度梨關

迢遞踰梨嶺。肩輿勝鶩驂。雄關限閩越。幽境極東南。地暖常多雨。雲開忽作嵐。鄉閭望不極。聊復上岳龕。

毛秀惠

字山輝江南太倉人諸生王榛室○存素娛情畫理不慕榮祿閩中人亦同素心讀其詩想見其幽居之樂。

屏水謠

綠楊深沉塘水淺。輾轉車聲滿疆畝。倒挽河流上隴飛。渴烏銜尾迴環轉。今夏旱久農心勞。西風刮地黃

塵高原田迸裂龜兆坼。引水灌之如沃焦。男婦足繭更流血。鞭牛日夜牛蹄脫。田中黃秧料難活。村村盡呼力已竭。其聲促。恰稱此題。讀雲漢詩可悟。

漁父圖

竹竿裊裊微風裏。失魚不憂得不喜。收綸放艇出蘆叢。白鷺橫空忽飛起。江臯落日江水清。水清無復見魚行。仙源有路渺何處。雲水蒼茫無限情。

錢塘懷古

京洛煙塵棄不收。西湖臺閣作金甌。流連秋色還春色。歌詠杭州勝汴州。自願苟安增幣帛。誰抒孤憤報仇讎。棲霞嶺畔將軍墓。只有南枝記舊邱。宋高苟安父讎不報。戊午譚議序極言之。閩關中亦見及此。

乙卯秋外赴金陵省試不售詩以慰之

新粧競掃學輕盈。俗豔由來易目成。誰識天寒倚修竹。亭亭日暮最孤清。寒女頻年織錦機。深閨寂寂掩重扉。卻憐鳩鳥爲媒者。空向秋風理嫁衣。重陽風雨滯幽齋。失意人難作遣懷。籬菊已花還覓醉。便須沽酒拔金釵。慰夫不遇喜無礁殺之音。

許飛雲字天衣。江南吳縣人。諸生王又溟室。

新月

遠望雲山暮靄浮。初生纖魄挂南樓。樹頭宿鳥驚弓影。水面遊魚怯釣鉤。淡淡畫眉微有恨。深深學拜便含愁。廣寒風動銀河淺。羅襪新裁夜出遊。此方虛谷所謂著題體也。中二聯寫景寫情。新字於末句借點布置極工。

許孟昭字景班江南元和人許廷鑣女。

寒夜曲

金翦生寒夜漏長。玉人纖手嬾縫裳。素娥偏耐秋光冷。來照鴛鴦瓦上霜。有義山絕句神味。

許楚畹江南元和人許廷鑣孫女。

寒夜曲

沉沉夜永漏聲添。倚戶蕭條對彩蟾。青女不知幽院冷。還吹霜氣入重檐。

陳奇芳字蘭佩江南吳縣人舉人時數五室。

秋風

乍覺商飈動。園林色漸非。井梧吹欲墮。梁燕送將歸。延爽開羅幕。迎涼捲紵衣。漢宮藏扇者。安命掩金扉。

周巽字順吉浙江山陰人仁和諸生沈心室著有頤曼閣小稿。

秋夜聞笛

今夕是何夕。忽聽蒼龍吟。成連之海上。千載有遺音。窺牖月如水。隔牆風滿林。漏深吹忽斷。不盡故鄉心。

通體高格。明人
中近徐昌谷。

汪瑤安。字雲上。江南新

寒山。自注。趙凡夫。棲隱處。

飛雨過羣嶺。籃輿陟翠微。幽徑入松際。輕風吹人衣。高士有遺跡。想見疏鑿時。老屋就深樹。寒泉瀉平池。墓梅雙虬龍。屈鐵盤高枝。緬懷碩人軸。偕隱賦樂飢。已辭梁棟材。自遠太廟犧。一門擅文藻。淵雅良可師。
自注。凡夫及子靈均。工古篆。配陸卿子。工詩。子婦文。椒工寫花鳥。予亦慕高隱。願采商山芝。鹿門期可遂。懷古生遐思。甲借隱人而已。亦願偕隱。志趣可知。

吳若華。浙江嘉興人。潘司吳嗣爵女。屈恬波室。○若華制藝極工。小題鏤刻。近隆萬人。王漁洋稱士女商婉。人能工制舉文。此其替人矣。

新磨古鏡

古鏡朦朧減舊清。一朝磨洗倍晶瑩。雲開夜月秋毫見。雨過菱花色相明。閱世興亡疑有眼。辨人好醜總無聲。玉臺粧罷時時拂。莫使浮塵又暗生。
五語寫古字巧。六語喻君子知人不自矜其名也。對偶較勝。

留別淮陰道署

三載依依玉鏡前。舊梳粧處最相憐。不知今後紅窗裏。又是何人點翠鈿。

秋風

滿耳蕭騷夢不成。殘雲涼月夜淒清。等閒吹落長林葉。雜入千家擣練聲。

宋凌雲字逸仙江南長洲人李博室○昔銓部宋南園先生嘗向余言孫女弱齡卽喜誦吾子詩粧臺側時手一編也今將四十年其言如昨而逸仙已歸泉壤矣俯仰三世可勝慨然

偶成

天外魚書絕。征人豈念家。可憐小兒女。夜夜看燈花。

憶父

吳樹燕雲斷尺書。迢迢兩地恨何如。夢魂不憚長安遠。幾度乘風問起居。欲歸未得悵空囊。兒女相思淚數行。苦憶寢門雙白鬢。朝朝扶杖倚闔望。

許

權字宜嫺江西江州人進士崔謨室

七夕

七月七之夕。家家望女牛。神仙不可見。涼風何颼颼。我疑天孫之巧轉近拙。東西隔斷難飛越。一年一度一分離。千古銀河響幽咽。不須乞巧向天孫。若賜巧來愁欲絕。君不見東家力田婦。耕鋤常相隨。旦暮共苦樂。白首不分離。又不見西鄰有才女。夫婿上玉堂。終年不相見。悵望悲河梁。玉露無聲夜清悄。盤中盼斷蛛絲遠。不知巧思落誰家。只恐巧多人易老。寄語人間癡女兒。寧爲其拙毋爲巧。

尹瓊華

字乘貞江南吳縣人卞培基室○乘貞淑慎敦孝行年二十三歿培基以有子不再娶重婦德也

題姜貞女畫

自注繪周女名桂字芳華

空閨工六法。取勢入微茫。野渡漲秋水。遠山明夕陽。古心無麗藻。淡墨有冰霜。不點雙飛鳥。圖中斷頰頰。

三四語正寫畫。餘俱從守貞著筆。不同泛泛。

韓韞玉

江南長洲人。宗伯文懿公幼女。西寧知縣顧渭熊室。○前輩韓東籬太史述幼妹少讀羣書。兼工詞翰。年三十時著述已富。病歿前。盡取焚之。不欲以文采見也。渭熊從書帙中檢得十

餘首。比於吉光片羽云。

詠鶴

丹頂玄裳白羽輕。芝田舊日得仙名。生來雲水原天性。望裏蓬壺是去程。代遠每過千歲壽。露寒常向九臯鳴。不隨衛國乘軒隊。穩臥松巔夢太清。

楊克恭

字德基。江南揚州人。少傳敏莊公孫女。德清徐志岩室。封宜人。

讀唐書李白傳

汾陽微日無人識。獨有青蓮賞最真。再造唐家緣救免。可知卓見出詩人。太白識郭汾陽於行伍中。為脫其罪。後白陷永王璘事。汾陽欲

解職以贖其罪。新唐書載之。蘇子瞻言之。後人翻駁謂無其事者。吹毛索癢。殊可不必。

金順

字德人。江南吳縣人。中書汪曾裕室。夫亡。以節孝稱。

題管夫人畫竹

墨妙由來數仲姬。閨房靜對寫風枝。王孫若解凌霜節。合署鷗波老畫師。題仲姬畫。卻從竹上。諷諭王孫。用意微婉。

袁

機字素文浙江仁和人太史子才之妹幼許字如臯高氏子後高以子有惡疾願離婚素文曰

火燒灼之姑救之毆母折齒既欲鬻妻以償博者不得已始歸母家長齋素衣孝養母氏高氏子

有鳳

有鳳荒山老桐花不復春死還憐弱女生已作陳人鏡影三更夢曇花頃刻身何如蝮與鶯鳴噪得天真

聞鴈

秋深霜氣重孤雁最先鳴響入空閨靜心憐永夜清自從成隻影同是感離情誰許並高節寒林有女貞

應自歸母家後作自憐隻影靜正守貞言外絕無怨尤可以哀其志矣

卷三十二

戒顯字悔堂太倉人以下僧詩○玩登黃鶴樓詩

登黃鶴樓

誰知地老天荒後猶得重登黃鶴樓浮世已隨塵劫換空江仍入大荒流楚王宮殿銅駝臥唐代仙真鐵

笛秋極目蒼茫渺何處一瓢高挂亂雲頭起有撼山岳吞雲夢之概具此胸次手筆

止崑字豁堂浙江仁和人著有同凡草○豁堂徐姓名繼恩國變後為僧嘗云人非金石立見消亡不若逃形全真自遊方外詩三卷王新城尙書目為湯惠休帛道猷之流

田家

田家無他望。所望在平畦。但恐終歲力。不得遂其私。何哉造物者。亦得厚我施。夜來微雨過。使我菜麥滋。登邱一憑眺。秀色遠參差。此時桃與李。豈乏好容姿。顧予朴野性。獨與此相宜。及時務耕作。那敢貪天時。
近陶公性情。不在面貌。

戲酬友人惠日鑄茶

幾日春遊徧若耶。入城布衲滿煙霞。正愁仙福難消受。又喫人間御貢茶。

月下由御教場下投淨慈宿朗公房

御教場中月直時。下山全不道歸遲。三松影落半湖水。一路沿鐘到淨慈。

南潛字月巖。浙江烏程人。○月巖董姓。說名本貢生。中歲出家。吳之靈巖寺。詩思路手筆俱不凡。然多偏缺。欠完善。茲錄其近情者。

招魂曲

夢魂夜逐青桐葉。飛落秋園作蝴蝶。一星鬼火入筵青。法王院榜招魂帖。靈旛翦紗錢。翦紙。月黑松搖古鬢鬢。高僧咒開枉死城。精靈隱隱啼秋怯。嘯聲認得故人魂。猶帶生前舊豪俠。
鬼氣近。昌谷。

宮人入道和唐人

聽斷昭陽鼓吹聲。道家衣向御前更。已拋團扇三秋怨。卻勝琵琶萬里行。留錦祗謀裝秘笈。買絲還擬繡

飛瓊。天家異日齋香使。白髮宮奴記舊名。和平之音。

聽雨

梧桐滴瀝客心驚。秋雨能吹白髮生。孤館燈昏惟對影。麗譙鼓濕不知更。前宵松月疑塵夢。明日泥塗聽屐聲。尋著漏痕當屋角。夜深百匝繞書行。

實訥

字可南。江南吳縣人。○詩從黃子若木處鈔得。無稿本也。氣清語削。滌盡塵俗。見我吳前此大有詩僧。

石公山

湖上山忽起。突兀孤雲中。洪濤日相擊。飛雪灑晴空。懸崖疑欲墮。怪異由天工。雨晴蒼翠濕。水落根玲瓏。時有好事者。閒來窮鴻濛。

傷范東生

茗水清。湖水渾。東西相望愁人魂。君今長別故山去。春光寂寂梅花村。湛園月下池光冷。冷侵芙蓉夜正永。於今何處問風騷。空向草堂弔清影。

江樓望月

江村猶不夜。月已到高樓。碧瓦光相射。虛檐影自流。山山皆在水。樹樹盡成秋。天迥空無著。西風一釣舟。
起與殘夜水明樓同妙。山山皆在水。寫得殘夜山水出。

爛溪訪周公美不值

晚風吹亂葦。簌簌鳴荒疇。山月白如曉。溪雲涼似秋。蟬聲在高樹。水氣生空舟。問主不相見。門前閒片鷗。

夜同凝父宿元朗齋頭有懷秋潭

簾外絲絲雨。因風亦易晴。孤燈照清話。一鉢了浮生。野鳥不依樹。閒雲偶入城。懸知溪上意。流水是經聲。

生新之句。時近賈長江。

答董然明

木落水容淡。寥寥獨鳥還。小樓明月上。照見隔溪山。貽我句何逸。想君心倍閒。前期倘不棄。掃石梅花間。

所選八首中。五首寫月。得月之神。并傳月下人性情。前身豈謝希逸耶。

顯謨字言成。江南吳縣人。

東陸長卿

爲別亦何易。山山盡是秋。曾期過一夜。不見到孤舟。風勁葉離樹。月寒人在樓。所思湖水闊。清夢得同遊。

海遐字介旭。江南宜興人。

送友之吳門

東風吹柳拭烟輕。折贈柔條空復情。一望吳山千萬疊。知君只在此中行。

同揆字輪菴江南吳縣人著有寒溪詩○輪菴文中翰啓美之子文肅公猶子也
滄桑後逃于禪所爲詩皆人倫日用盛衰興廢之感墨名儒行斯人有焉

鼎湖篇贈尹紫芝內翰

丁丑戊寅間先公受知於烈皇帝遵旨改撰琴譜宣定五音正聲被諸郊祀上自製五建皇極
百僚師師諸曲命先公付尹紫芝內翰翻譜鈎剔時司其事者內監琴張張奉命出宮嬪褚貞
娥等禮內翰爲師指授琴學頒賜紫花御書酒果縑葛之屬極一時寵遇迨闖賊肆逆烈皇帝
殉社稷諸善琴者偕投內池內翰恐御製新譜失傳忍死抱琴而逃南歸謁先公於香草垞言
亡國時事甚悉從此三十九年不復聞音耗矣癸亥秋余在寒溪內翰忽來相見如夢寐意欲
薙染事余學佛余傷之爲賦鼎湖篇以贈

鼎湖龍去秋冥冥驚風吹雨秋山青白頭中翰淚凝霰叫霜斷雁棲寒汀烈皇御宇十七載身在深宮心
四海一朝地老與天荒城郭依稀人事改當年刪定南薰曲內殿填詞徵召促琴張好學直乾清先公屢
賜金蓮燭雅樂推君獨擅場望春樓下拜君王高山一奏天顏喜奉勅新翻舊典章昭儀傳諭何諄切予
賚先頒女兒葛上林避暑撫絲桐溫語貞娥遵秘訣流泉石上坐相邀薇省風清玉珮搖神武門前輕執
戟永和宮裏薄吹簫如意初殤淚沾臆自注皇五子悼靈王那堪又報河南失鈿蟬零落葬田妃池水蒼茫尙凝碧
寒食花飛不見春冬青塚樹斫爲薪煤山一片淒涼月猶照疆場血化燐世間萬境須臾夢老臣剩有西

臺慟四十年來寄食艱。何人再聽高山弄。鑑湖南去雲門外。古寺松篁景掩靄。維舟無意忽相逢。恍惚夢魂同。晤對夕陽影裏話前朝。天壽諸陵王氣消。留得閒身師白足。滿頭白髮影飄蕭。吳梅村祭酒詩。道勝可被管絃。令讀者愀然傷懷。此篇竟似出梅村手。梅村道本身事。輪菴道先人事。其感一也。神來尤在後半。

過五經嶺

絕壑松杉合。懸巖冒雨登。雲中人種麥。天際我攀藤。路盡峯能轉。巢危石欲崩。寒烟滿蘿屋。應有未歸僧。阻風登采石磯云。去帆疑峽走。捲浪駭江飛。亦能作奇語。

吳翼生歸自塞上話舊

七載風霜雪滿韉。曾騎款段獨行邊。之官恰值初裁俸。作吏惟知不愛錢。薄宦暫歸仍是客。殘僧久別已忘年。地爐芋火深宵共。破院相依有夙緣。清空如話。吳洪雅之清味自見。吳後爲冢宰。

大燈字同岑。浙江秀水人。○以下五僧詩。皆得自選本中。

秋夜宿八峯山房

黃花籬下亂蛩鳴。古寺秋高嶺月明。夜半石牀清睡去。不知枕上落泉聲。

大瓠字筇。在江南宣城人。

澣墅留贈周玉鳧儀部

瓢笠飄然特訊君。連朝風雨惜離羣。青楊花覆山橋路。白石溪連竹屋雲。卻怪鴟鵂嘲鳳德。敢將驪裏應龍文。荒涼一逕空延佇。回首江關已夕曛。時儀部罷官家居。故有五十六語。

函可字祖心。廣東南海人。

丁亥春將歸羅浮留別黃仙裳

春盡雨聲裏。揚帆趁曉晴。路經三笑寺。歸向五羊城。末世石交重。餘生瓦鉢輕。悲涼無限意。江月爲誰明。

本源字兀菴。浙江湖州人。

過王儁菴舊居卻寄郡城

菴城摩詰在。久不住崑阿。白日攜筇到。青山送客多。林空一片月。澗落萬重波。知我無如子。秋深幾度過。

大寧字石湖。浙江錢塘人。

寄胡柏菴

時有渡江夢。孤懷歷歲深。澹雲歸鳥意。春樹野人心。岸草青連屋。山花紅滿林。好知千古事。明日幾回尋。

成鷺字跡刪。廣東番禺人。著有咸陟堂詩集。○上人姓方氏。本名諸生。九谷先生弟也。中年削髮。既爲僧。所著述皆古歌詩雜文。無語錄偈頌等項。本朝僧人。鮮出其右者。擬之於古。其惟儼祕演

之德歟。

祝髮呈本師

男兒愛身及膚髮。平生一毛不敢拔。蹉跎四十一回春。負此遺骸等株橛。蒙師爲我操慧刀。頭上不與留
纖毫。一朝四大輕鴻毛。昔日縫掖今方袍。縫掖翁。方袍子。本來面目應相似。鏡中見影不見形。莫道昨非
今乃是。請辭大衆入山去。山月松風供穩睡。莫道昨非今乃是。見爲儒未必非。爲僧未必是也。知其未必是而爲之。此何故耶。

羅浮采藥歌

朱明老仙能辟穀。日飯胡麻茹黃獨。輕身直上鐵橋行。踏破飛雲雲在足。四百峯頭種紫芝。千尋澗底萹
蒲綠。藥名藥品皆離奇。神農本草那得知。相逢一一爲予說。予心半信還半疑。老仙大笑導予去。指點深
山最深處。隨取隨有卻隨無。殺人活人不知數。傾筐不盈盈更歸。歸時忘卻來時路。縲縵欲仙。

秋鐘

寂寞秋原寺。霜鐘韻最幽。數聲生殿角。一夜白人頭。晶晶月當枕。蕭蕭風滿樓。何能此時節。還起景陽愁。

鏡

愛爾本無我。虛明識故人。滯形還偶影。顧笑復憐顰。虛室自生白。太虛誰寫真。所嗟承弁髦。一見一回新。
惟太空。所以無物不照。寫鏡寫心。是一是二。

問影

不辨誰賓主。何因有往還。憐君時一顧。笑我未能閒。世態膠難合。前塵跡可刪。終當事韜晦。相待掩重關。

登大科峯頂

愛山登陟不辭勞。直上嶽岑振敝袍。老去始知行腳穩。年來惟恐置身高。青天有路隨孤鶴。滄海無根仗六鰲。閑倚西峯發清嘯。下方誰識是吾曹。出世人何必作此語耶。

讀宋史偶筆

從來吾道本虛公。洛蜀何因有異同。端禮門前書姓氏。原來都在黨人中。洛蜀同異。總在黨籍碑中。一以見相爭之多事。一以見程蘇之

均不礙為君子也。此種詩可當史論。

大成字竺菴。湖南醴陵人。

山居

一株兩株老松青。松下結個小茅亭。三日五日來一次。肩荷柳栗手持經。讀經讀到山月出。聽松聽罷天落星。適然拋卷松間臥。夢與松根乞茯苓。有生趣。另備一格。

海岳字中州。江南鎮江人。

訪友不值

尋君復不見。寂寞出林間。落葉溪邊路。浮雲海外山。午煙桑柘隱。秋色戶庭閒。愛爾幽棲子。歸來不閉關。

天定字雙溪。湖北武昌人。

涵師峨嵋遊歸因贈

峨嵋西去似登天。見說親行到頂邊。古木千年都化石。衲衣六月總裝棉。陰風晝灑巖端雪。急雨宵聞洞口泉。袖得圖歸誇示我。芒鞋踏破意忻然。奇語卻是真境。故人黃尊古住峨嵋半載。為予言之。

僧殘字石溪湖南湘潭人。

古意

瘞琴峨嵋巔。知音何寥寥。埋骨易水旁。俠士魂難招。物性不可違。豈必漆與膠。嘗恨士不遇。白首空蕭騷。齊已能作雄壯語。如拔劍繞殘尊。歌終便出門是也。此更過之。

超遠字心壁。雲南人。○心壁出家西江之廬山。商邱宋公。巡撫西江。與酬接唱和。後移節江蘇。心壁復來吳中。又有唱和詩。時人以東坡得佛印比之。

竹湛

數家煙樹裏。竹湛最佳名。茅屋經秋補。山田隔歲耕。殘陽歸牧笛。零露咽蟲聲。更遇村翁說。生平未入城。

鐵鑱橋

萬山誰劃斷。一水界東西。地曠風逾急。天低雲易迷。半空橫鐵索。千尺跨虹霓。我欲橋邊宿。江猿休夜啼。

曉音字確菴。著有高雲堂詩集。○確菴主華山方丈。聖祖御製。有欲遊華山未往。七絕。確菴和至百首。進呈。大約以多為貴者。茲祗錄清真一章。重性情也。

過東寺晤天逸兄別來已二十六年白頭相對慨然有作

吳天楚地兩茫茫。尺素難憑雁寄將。隔絕五千餘道路。俄經二十六星霜。砥疑相對還成夢。敢定重逢在此方。顧我青年悲失恃。羨君白髮奉高堂。自注：兄有母年逾九十。

性休字尺木。前朝宗室後。未詳省縣。

漁父圖

東西南北任遨遊。萬里長江一葉舟。夢裏不知身是客。醒來大地忽新秋。從漁洋詩話采入。

德元字訥園。江南長洲人。著有來鶴菴詩。

玄墓看梅

謝卻蘭橈信杖藜。千峯盤磴入花畦。晴雲渡影迷三徑。暗水流香冷一溪。僧寺多藏深樹裏。人家半在夕陽西。登臨更上朝元閣。滿壁苔痕沒舊題。

石牆茅屋老梅叢。仄徑危崖處處通。半嶺人烟香雪裏。下方雞犬白雲中。溪邊楊柳萌新綠。谷口櫻桃綴小紅。還擬放舟明月夜。虎山橋北太湖東。

通岸字智海。廣東人。

采石謁李祠題峨嵋亭

江南雨過羣峯青。沙邊蘭槳時一停。青蓮居士不可見。千秋空有峨嵋亭。峨嵋山月還依舊。昔年曾照杯

中酒爲問騎鯨飛上天。不知更落人間否。

古芸字願來
廣東人

山行

出門無定所。一路喬松陰。流水道人意。青山太古心。偶然乘興往。不覺入雲深。獨立發長嘯。蕭蕭風滿林。

智朴字質菴
江南徐州人。○質菴生薊州之盤山。
作山志與新城商邱諸公往還其詩不多見。

盤山

蒼松亂插連雲石。石上苔痕行虎跡。拄杖來從飛鳥邊。下視蒼茫遠烟碧。

宗渭字紺池
江南華亭人。○紺池少學詩於宋荔裳觀察。中年後遊西堂允侍講之門。得所傳授。嘗謂門弟子曰。詩貴有禪理。勿入禪語。弘秀集雖唐人詩。實詩中野狐禪也。卽其議論。可以規其

品格

橫塘夜泊

偶爲看山出。孤舟向晚停。野梅含水白。漁火逗烟青。寒嶼融殘雪。春潭浴亂星。何人吹鐵笛。清響破空冥。

春潭五字。每於夜泊時遇之。

次韻酬九來

風急樹蕭蕭。思君夢易銷。鳥啼黃葉寺。僧語夕陽橋。得句霜鐘度。安禪佛火燒。十年詩律苦。珍重貯山瓢。

織簾先生書齋晚望時願伊人屬和

隱几澹無慮。日斜偶啓關。鳥聲寒顧竹。樹色靜疑山。世藉六經重。天留一老閒。落霞江岸遠。如爲暎蒼顏。

浦城下水

重過海印菴

三年重向虎谿遊。石路依然碧水流。鳥背斜陽微帶雨。寺門衰柳漸迎秋。弟兄誼重難爲別。師友情深竟莫酬。歎息此身閒未得。天涯明日又孤舟。

鳥背一層斜陽在鳥背一層微帶雨。又一層七字中寫出三層渾然無迹。

中秋同鹿洲坵授天行紫英業師坐月

銀河激灑碧雲鮮。徒倚柴門月正圓。影瀉蒼松清帶露。光搖秋水澹無煙。鐘殘自愛添衣坐。香燼何妨後客眠。皎潔一年惟此夜。莫教容易負嬋娟。

早起

宿雨散涼色。竹林煙未醒。流鶯三四語。啼破半窗青。

願光字心月

送陳少菴之楚謁所知

粵國千山外。言揚楚水脣。送君出江口。黃葉滿津亭。樹色寒雲夢。秋聲落洞庭。故人一相見。吟眺九疑青。

溥字蘭谷 廣西人。

劍閣

險絕惟雙劍。迢遙一線通。水分巴字峽。山接漢王宮。梯石來天上。穿雲入地中。無知憐李特。漫欲寄蠶叢。
五六極形其險。結意見竊據必敗。猶少陵敘公孫述割據後云。恐此復偶然。臨風嘿惆悵也。

虎邱訪賣花老人

緩攜柳栗訪山家。一路斜陽五色霞。不是閒園易花國。可留餘地種桑麻。
此正論也。勿謂方外人作殺風景語。

元龍字牧堂 江南華亭人。○牧堂與化李氏祖父遷華亭名家子也。聖祖南巡獻詩。命賦山色有無中。稱旨賜紫。初成詩取捷。晚歲自悔苦吟。存詩寥寥。故所收從略。

秋胡行

養蠶勝養兒。養蠶猶吐絲。養兒防親老。而乃離親闈。君憐采桑婦。不念桑榆人。桑榆景苦短。桑婦時悲辛。還君相贈金。請君斷諸妄。君意在桑間。妾情非濮上。攀條謝郎君。倚門人久望。
顏延年此題詩。詳敘列女自見。此渾括大意。明責其不能養親。而秋胡之不孝。顯見顏詩妙在詳。此詩又妙在簡。

乞食

林間纔定起。洗鉢出門行。童子亦知善。設齋非愛名。說經酬飯價。回施合凡情。果腹便歸去。寒山萬木平。

大寧字石湖。江南桐城人。

雜詠

峯頂屋三間。松邊石一片。早晚雲飛來。只有樵夫見。

元璟字借山。浙江平湖人。○借山以詩受聖祖知。居京師久。後放歸。丙午歲。與予遇於天宮佛寺。名流咸在。時炎月。借山裸程。指予曰。此卽長洲沈生耶。既出詩藪相質。爲點出敗闕幾處。輒心服。

別時。整衣途半里外。知非一例傲岸者也。惠天牧學士。不輕許人。向人每稱借山。卽詩品可知矣。

三忠祠自注。陸秀夫。張世傑。文天祥。

播越無全業。艱危不顧身。匡山傾一旅。柴市接三仁。棋到殘難算。金從鍊後真。崇祠妥海角。歲歲薦香蘋。

一覽樓

未放九峯舟。先登一覽樓。天清鶴孤唳。地盡海東流。佛土由來淨。神仙不易求。松風和梵籟。滌蕩客中愁。

十月朔入會稽山平陽寺參寒泉老人

雙眼平生隘八垓。江東法社半蒿萊。波光清泛耶溪曲。山色奇爭委宛開。鐘自萬松陰裏出。人隨一雁影邊來。須知水乳相投合。縋石磨甌挽不回。

蛟門

十丈帆張五兩風。笑談間已出蛟宮。兩拳石束被爭立。一隙門開天忽東。雲壓鼉頭蓬島黑。目翻魚眼柁樓紅。平生夷險經曾慣。要吐胸襟浩蕩中。與東坡泛海詩同一襟懷。乃偏出自學佛人。知不以禪寂自縛者也。

答徐文虎

偉長詩骨玉森森。顧我城南祗樹林。入夢幾人飛白鳳。登臺終古弔黃金。塵中歲月愁將老。霞外心期話自深。若得把茅靈谷近。瘦梅花底共清吟。

斥墩

五里與十里。一雙復一隻。送盡往來人。轉似無情客。

盧溝橋

日色纔分萬衆囂。黃塵漠漠馬蹄驕。題詩笑問桑乾水。曾有閑人過此橋。十四字中。寫盡往來名刹之客。不啻當頭棒喝。

馬家山

山腳山腰盡白雲。晴香蒸處晝氤氳。天公領略詩人意。不遣花開到十分。花取半開。詩意亦取不盡。此作者有得之言。

過楊鐵崖故里

玉削羣峯抱一村。甘泉如乳出雲根。負薪伐木扶犁叟。多是楊家十葉孫。此詩漁洋采入詩話。

睿字目存。江南吳縣人。○目存。工畫。山水花卉人物。俱師法古人。南宗北宗兼善。當路薦入京師。旋以疾告歸。方外中淡於榮利者。無詩稿。茲從畫卷中采入。

題簪花圖

莫摘濃香壓鬢鴉。懶將時勢鬪鉛華。他年得入維摩室。不許簪花許散花。圖寫張憶孌簪花。卷中題詠。幾及百人。獨此首甚超。

然修

字桐臯。江南長洲人。○桐臯詩筆清倩。蔡大將軍延之京口。欲其漸次主講席也。年三十餘歿。故詩稿不傳。錄其勒石金山一首。

金山

蒼茫落日下藤蘿。身在荆關畫裏過。飛去斷雲雙白鳥。浴成寒浪一青螺。蘄王有廟疎烟冷。郭璞無墳亂石多。千古寂寥俱莫問。且聽江月送漁歌。

岑霽

字懋亭。江南長洲人。著有柏堂詩。○上人將母柏堂。盡子道。喜讀儒書。敦友生誼。蓋隱於禪者也。詩品清澈無塵。遠近名流。爭欲識其面。懋亭歿。吳中無詩僧矣。

貫華閣晚眺

輕颺起長林。疎鐘應巖谷。一徑度修篁。高閣散遠目。江平颿去遲。樹暗雲歸速。春江淡容與。寒花正芬馥。物情愛和煦。人意耽幽獨。悠然酌山泉。夕陽下喬木。

柏堂對月和周昇逸

柏堂今夜月。雲物不能侵。對此碧空淨。聞君白雪吟。入簾明鶴髮。繞樹見禽心。坐覺清言久。疎鐘報隔林。

韜光寺

磴道盤紆上化城。松篁影裏亂泉鳴。徑隄黃葉行偏滑。鐘過白雲聲更清。帶雨秋潮歸海靜。盤空山勢到

江平道人尙有燒丹處。認得當年舊鼎鑪。自注有呂仙鍊丹處。

西山道中

扶攜筇竹上空亭。夾路長松不斷青。千尺澗泉飛洞壑。百盤螺髻入高冥。人行亂葉雲迷屐。雁下寒蘆雪滿汀。空谷誰能繼遺逸。移文應辱草堂靈。詩思清入骨。

自龍泉關過嶺宿白雲寺

萬丈雄關到始諳。空中斗插五浮嵐。白雲僧下山頭寺。黑雨龍飛石上潭。冰雪百層寒代北。波光一線認江南。閒身隨處堪投宿。直上諸天是蔚藍。

尋澗上先生故居

先民隱迹付寒煙。策杖相過一愴然。谷鳥飛鳴竹林外。山花開落草堂前。鑿坏而遜名難晦。采蕨爲糧世共賢。一曲山泉上沙出。何人溉灌種瓜田。是逸民。是遺老。伯夷邵平。一身兼之。詩品清絕。

露筋祠

沙草淒迷煙樹昏。荒祠寂寞託貞魂。靈旗高捲秋風晚。惟有清淮照墓門。賦此題者多黏膩近腐。王漁洋者同一寫景。而意言之外。仍復表其幽貞。故自耐人尋味。

蘋花

翠葉金花雜杜蘅。湘湖千里最知名。秋風颯颯過南浦。鄉思無端一夕生。

德亮

字雪牀。江南長洲人。○此吾友樹滋。陳上舍弟也。出家後。豪氣未除。能面斥人過。人以正理責之。亦拜而受。詩不多作。出語必欲勝人。

龍泉關

絕域龍泉限。橫關鳥道開。塞雲昏客路。虎氣伏山隈。風土猶三晉。人煙自五臺。當年頻設險。因憶出羣材。
沉雄無
蔬筍氣。

孤花

一點出塵綠。春情仍自深。香微憐土薄。開晚少人尋。雨漬猶堪賞。風吹略不禁。翛然苔石畔。誰爲表孤心。
極寫孤字。
形神俱有。

佛暘

字旭曇。江南江都人。

月夜過雷塘道中

誰唱吳歌古渡頭。一聲清怨過迷樓。淒涼滿地蘆花月。撩亂連天鴻雁秋。寒樹著霜猶是綺。廢塘埋玉尙名鉤。道人不爲繁華感。午夜行吟別有愁。

德暉

字潛谷。江南南吳縣人。

探梅

老戀繩牀嬾出村。偶攜筇杖破苔痕。到來晴雪迷巖谷。臥入寒雲冷夢魂。目既成餘唯有笑。心當醉處欲忘言。一瓢此際真堪挂。擬翦茅茨覆華門。王漁洋以蒼雪僧十日花開湖上路。半春家在雪中。山句采入詩話中。潛谷臥入寒雲冷夢魂。名篇正復不讓五六。尤覺脫盡

白窠

超源字蓮峯。浙江錢塘人。○蓮峯見知於世宗皇上。召入內廷。勅主吳中怡賢禪寺。一時尊宿也。而其詩揣摩王孟。舉釋典玄妙融化出之。殊有空山冰雪氣象。

題畫

溪口有亭巖邊有廬。不見人歸空留雲宿。向度滕公嶺有句云。石屋不見人。惟留白雲住。不意蓮峯先得我心。

夢故友程風衣

春雨何浙浙。春雲更沉沉。程君已隔世。宵夢來相尋。自言身朽心不朽。象外風月皆吾友。從前膠擾海天空。祇是泉臺無美酒。斜陽煙柳門前溪。欲別不別重牽衣。寄語淮陰小兒女。我今野鶴同翻飛。

友人枉過關化寺

青眼多情客。攜朋閣暮秋。人同山共瘦。時與水俱流。黃葉迷村路。清風滿寺樓。荒涼郊外景。肯向錦囊收。

題畫

春浦風生柳岸斜。好山何處著人家。白雲遮斷橋西路。不許漁郎問落花。漁郎問落花。韻事也。今云不許問。尤見其韻。

妙復字天鈞。江南無錫人。有石林吟藪。○天鈞與樂道。士洞。泉。村。太。史。雲。川。結。詩。社。稱。九。龍。三。逸。

兩鶴

昔年兩白鶴。巢我青松林。夜寒時警露。衆壑流清音。一鶴戀故栖。子焉守雲岑。一鶴忽遐舉。天路探幽深。神山境恍惚。浩浩誰能尋。驚飈吹未息。素羽愁難任。故林遙待汝。貞此巖阿心。作招隱詩讀

訪山中禪友

曉愛山氣清。晚愛山煙蒼。日夕常在山。遂與山相忘。相忘忽相憶。憶我山中客。松扉輕叩聲。或恐驚棲翼。

律然字素風江南常熟人著有息影齋詩○素風於詩友三五人外不慕貴遊不儲鉢資坐石經室幾六十年人品高故詩亦不落禪門偶頌體也柏太史蘊高許以穆如清風靜若止水人共信之

落梅

和風和雨點蒼紋。漠漠殘香靜裏聞。林下積來全似雪。嶺頭飛去半爲雲。不須橫管吹江郭。最惜空枝冷夕曛。回首孤山山下路。霜禽粉蝶任紛紛。

西齋小葺初成西澗露潛兩先生見過贈詩次韻

緇廬不厭如蝸小。喜是軒窗兩面開。種竹葉沾新雨露。移松根帶舊莓苔。偏多白髮攜筇過。儘放青山入座來。點檢階除忙未了。幽花野草按時栽。佳句

悼鶴次蔣迪甫太史韻

病久胎禽剩瘦形。朝來羽化竟冥冥。孤情望斷林間影。秃筆書殘石上銘。苔徑忽空新印跡。松巢忍見舊遺翎。高人從此添離索。哀怨還如失一丁。語語是悼。

元祚字木文。湖廣雲夢人。西洞庭山寺住持。著有鶴舟詩草。

獨樹堂散懷

得失吾何有。榮枯事盡刪。神常遊物外。名恐落人間。流水一聲磬。夕陽數點山。閒身倚枯樹。佇看鳥飛還。棕竹新添杖。扶來步步安。渾如得老友。從此共盤桓。天地孤身在。冰霜白髮寒。一編寫情性。只可自家看。

寄高澹游

賣盡青山說買山。高年正好學偷閒。洞庭儘有梅花屋。何不攜家住此間。澹游工六法。故有起句。

明印字九方。江南常熟人。吳中怡賢寺住持。

秋日過王岡齡山齋次韻賦答

良辰赴幽期。名園散清步。黃菊未辭秋。霜鴻正橫曙。逍遙玩泉石。參差數藥樹。主人出卷軸。精力所凝注。六法韻俱流。五字神或助。把翫媿不如。愛極翻成妬。我見猶憐何況老奴。妬極翻成愛也。此對面言之。一係佳人。一係釋子。不禁粲然。

陟級已梯空。登茲江畔樓。取適那在高。聊足恣冥搜。虛簷仰晴穹。疎檻臨平疇。西山送遙青。風前上簾鉤。趣以淡為賞。情以忘轉投。寒城送暝鐘。一笑還淹留。

編主五雲王

庫文有萬

種千一集一第

裁別詩清

冊四

選潛德沈

號一〇五路山寶海上

五雲王

人行發

路山寶海上

館書印務商

所刷印

埠各及海上

館書印務商

所行發

版初月十年九十國民華中

The Complete Library

Edited by

Y. W. WONG

TSING SHIH PIEH T'SAI
SELECTED BY SHÊN TÊ T'SIEN
PUBLISHED BY Y. W. WONG

THE COMMERCIAL PRESS, LTD.
Shanghai, China
1930

一八三五分

上海图书馆藏书



A541 212 0004 0702B

